


YÊYÈ ÛTU ÛCYÛKA.

WÊWÈ UTU ÛCYÛKA ANYÌ?

 Twasàkidila, Mwanèètù. Twánjààyi kushààla biimànyine kuulu bwà katanci kakesè mpindyewu bwà disambila. Mpindyewu ne mitù yètù miinyika, kudikù dilòmba dyà dijìkula patòòkè, anyi dimanyishiibwe ànu ku dyela dyà cianza cyèbè muulu, bu wèwè mwà kjuuula ànu cianza cyèbè bu, èyo, shààla ànu mukwàte dilòmbà dyèbè adi mpindyewu.

² Taatù wetù wa mu Dyulu, nyewù tuseemena cyàkàbìdi Kùdi, bwà malòmba aa àdi...bàdi ne byanza byàbò byela muulu. Ne bòbò bàdi ne dijinga mu dindà emu, Mukalenge, dyà bintu byàbùngì. Wèwè ngudi mumanyè cìdìbo bèèla meeji munda mwà mwoyi wàbò, bwalu Wèwè udi Díyi, ne Díyi n'Dijinguludi dyà meeji ne mapàngadika à mu mwoyi. Ndi nKulòmba, Nzambi Mutàmbe kwikala wa Ngàsà, bwà Wàdamunèku yònsò wà kudìbo bilondèshile majinga èndè, mumanyè ne, Wèwè neucyènzè bilondèshile diitabuuja dyàbò. Nènkù tupèeshèku diitabuuja patùdi twakula Díyi Dyèbè apa, Mukalenge, swàku bwà Dìbàtwàdìlè diitabuuja. Nkwàcìshèku bwà ngàmbe Díyi Dyèbè, bwalu Díyi Dyèbè didi Bulelèlà, bwà Dyàmòna mwà kutwàla diitabuuja bwà kufila dyandamuna ku malòmba aa. Ne pashìishe nkufwànyine kwikala bamwè kaaba aka, Mukalenge, bàdi balalàkàne buumùke mu kajila kabùmbàkàne aku, bàdi kabàyi bènda mu Bulelèlà bwà njila awu to. Tudi tulòmba, Taatù, bwà cintu kampànda cyènjiibwèku leelù ewu, ne cìmanyishiibwè, bwà bàalukilèku ne lùkàsà lwònsò ku kajila kàà bwobùmwè ne Kilistò aku. Matùkù adi ènda àpita, bubì bùdi ku nseke yònsò, kùdi dipidya dinène dyà diitabuuja. Nènkù tudi tulòmba, Taatù, bwà Ùdimanyishèku kutùdi leelù ewu, mu kwondopa kwà babèèdi munkaci mwètù, mu kwenza kwà bishima. Kí nnè bìdi bikèngela ànu Wèwè mucyènzè to, Mukalenge, bwà kutùmanyisha ne Wèwè udi Nzambi, kàdi mbwalu Utu mulayè bwà kucyènzà. Nènkù tudi bamanye ne Wèwè neùtupèèshè milayi Yèbè bu twètù ànu mwà kuyiitabuuja ne kumanya ne mmilelèlà. Tudi tulòmba dyèsè edi mu Dìna dyà Yesù Kilistò. Amen.

³ Nudi mwà kusòmbaayi. Mvwa mwanji kwangatakù ànu cipòòlò bwà kubala àmwè à ku malòmbà àdi matèèka apa aa, àdikù àbìdi anyi àsàtù, òmwè dyà ku òwò ndilòmba dyà disambila. Mu bushùwà bwà bwalu, kùdi mishwàlà yàbùngì mitèèkà kaaba aka yitwikala ne disànka dyà—dyà kusambidilapù ànu mu katanci kakesè cyanààna emu, patùtù tùumvwà ne Bwikadi bwà Nyumà Mwimpè bùkaadi—bùkaadi

mu kantòngòbèlâ Kààbù. Ki pântù nteeta bwà kusambila pa yôyi eyi, pàdi disangisha dyònsò, bònsò balaabiibwa ne Bwikadi Bwèndè.

⁴ Tudi tudyùmvwè bibi be bwà—bwà kutàcishangana, kùdi bààbùngì be biimàne kuulu, kàdi kakùyì myaba yà kusòmbabò to. Kàdi—kàdi edi nditùkù dyà luuyà lukolè mu cipidi cyà luuyà cyà citàmbe kutùmbùka, tudi tupicila pabwîpi ne lukàmà pa lukàmà lwà citeleela ne degrés mitwè ku makumi asàtù ne mwandamukulu, pa nàнку kùdi luuyà lukolè lwà kacya.

⁵ Nènku mvwa mumanyishe mu dindà emu bwà masangisha à dyondopa, anyi ki. . . Cindi ngambila ne ndisangisha dyà “dyondopa” cidi, mbwalu ndi mutèèke diitabuuja dyànyì mu citùYe mulayè. Nwamònu anyi? Mpindyewu, ncyèna mwà kwamba ne Yèyè neàcyènzè to, kàdi ndi ngeela meeji ne paanyimà pàà bamanè kuumvwa Dìyì Dyèndè ne bashindamijile diitabuuja dyètù pa bitùYe mulayè, dîbà adi tudi ne bukenji bwà kunana milayì Yèndè yà dyondopa ayi, ànu mutùtù tunana milayì Yèndè yà lupàndù amu.

⁶ Malòmbà àbìdi aa. Ncyèna mumanyè ní bàkaadi bakàngùle bisanjì bidì bikwàta mēyi bwà cyôci eci, anyi to. Mbifwànyine kwikala bìmpè. Èè, ngeela meeji ne mbîmpè bwà beena pambèlu, bantu bònsò kuumvwabò cyôci eci, ndilòmba.

Wèwè uvwakù mwambè cipròfetà ne kùvwa mwà kushipiibwa bantu bafiike mù—mùliyò mujimà pà. . . anyi civwa ànu ndimanyisha cyanaàna wèwè mwenzè ne kù—kùvwa mwà kwenzeka cyôci eci?

⁷ Mpindyewu, nwamònu’s, nkàadi misangu yònsò ànu munulòmbèlòmbe bwà kutàbaleela binùdi nutèèleja. Nwamònu anyi? Kùtu byàbùngì byà ku byòbi abi bidì ànu luseke lwà buntu. Kàdi misangu yònsò kwòkò cintu kampàndà cipàtuka, necìcyàmbè ne: “Cidi ng’EMU MMÛDÌ MUKALENGE WÀMBA,” nànsha mene too ne ku bikèènà—kumòna anyi ní ncinyi cyònsò. Bikèènà—kumòna pa cibùmbà cyà ku cyambilu apa, mu batèèleji emu, nwènu biinè mbàdi bàbyènzeja; kí n’Nzambi to, nnwènu. Nwamònu anyi? Nzambi kí ngùtu wenzeja cikèènà—kumòna aci to, wèwè mwinè ngudi ucyènzeja, ku diitabuuja dyèbè mu dipà dyà kùdi Nzambi.

⁸ Bu mukàji wàkalenga civwàlù Cyèndè awu, Yèyè kàvwa mumanyè ne ùvwa nganyì anyi lutàtù lwèndè lùvwa cinyi to, kàdi mukàji awu ngwàkacyènzà yèyè mwinè. Nwamònu anyi? Mpindyewu, aci kacivwa EMU MMÛDÌ MUKALENGE WÀMBA to. Civwa EMU MMÛDÌ MUKALENGE WÀMBA pààkandamunà Yesù ne kumwambila ne diitabuuja dyèndè dyàkamusungila. Kàdi, nwamònu’s, bikèngela nutàngilè bìmpè.

⁹ To, mvwa ngàakula ànu bwà Martin Luther King cyanaàna, pa dikèngà dinène dyà cimpicìmpi edi didìbo naadi mu Sud emu, ne ba—bantu bafiike. Mvwa mwambè ne: “Bu ne bantu abu

bàwva bapika, mvwa mufwànyine kwangata èkèleeziyà wanyi kuya ku sud bwà kwambulwishakù bantu abu bwà kupàtukabò mu bupika abu.” Ncyà bushùwà ne mvwa mufwànyine kuya, bwalu muntu ngudi ùvwija bantu bapika, kí n’Nzambì to. Tudi bònsò mashi àmwè. Tudi bònsò bafùmìne ku mucì wùmwè, ne kùvwa nkùdì Adàmà. Nzambì, ku mashi àmwè, wàkenza matùnga wònsò. Nènku nànsha twètù, makòbà ètù miikàle mafiikùlùke, anyì à kàlaabi, anyì makünze, anyì cyònsò cìdì cifwànyine kwikalakù aci, tudì bònsò bifùkiibwà byà Wa bukolè bwònsò, nwamònu’s, ne kabìvwa bìkèngela bwà kwikalakù dishiilangana munkacì mwètù to nànsha dikesè.

¹⁰ Cilumbù cìdì kuntwaku ncyà ne kùdì “ditàpuluja dyà bilongelu.” Mpindyewu, mèmè mvwa kuntwaku dìbà dyàkàjuukà ndululu yà kumpàla ayi, ne mèmè kucyùmvwa, nènku ndì—ndì mumanyè pàndì ngàakwila. Bantu bafìke bàdì ne bilongelu bilenga, mîngà misangu bilenga kutàmba bilongelu bikwàbò abi. Ne, cileejilu, mu Shreveport bàdì ne bilongelu bilenga kutàmba cilongelu cyà batòoke. Kàdì cìdì mmwènenu wa muntu kampànda udi ubàsonsola ne bìvwa bìkèngela ànu kuyabò kadìsanga naabò. Cyòcì aci, ngeela meeji ne ncifwànyine kwikala ànu cìmpè, kàdì bu muðìbi ne bantu bàdì bàcìtontolola, bantu bàà ku sud abu, dìbà adi bidì byènze dishiilangana ku cinyì’s twamb’eku twamb’eku?

¹¹ Nènku ndì ngeela meeji ne Martin Luther King mmusonsòdìibwe kùdì comunisme, cìikalà mwà kukafikisha bantu batwè ku mùlìyò mujimà kakùyì mpatà to ku butèyì bwà lufù. Nwamònu anyi? Ncyèna ngamba ne Mukalenge ngudi mungambìle cyòcì aci to. “Mèmè” ngudi wela meeji awu, nwamònu’s. Ne ndì ngeela meeji ne kabìvwa bìkèngela bwà kwenjiibwacì to. Ndi mèmè ngeela meeji ne bìvwa bìkèngela bwà bantu kwikalabò beena Kilistò ne kwitabanganabò muntu ne mukwèndè bu bânà bàà muntu. Nènku, kàdì ndì mèmè ngeela meeji ne ànu bwalu . . .

¹² États-Unis ewu, mpindyewu bukalenge ebu bùdì búngambila ne mèmè ncyèna nànsha mwà kutwà cyàlà pa shekè udi—udi . . . mumpèèbwe mèmè sungasunga. Nwamònu anyi? Awu mmakenji à mu mèyì makùlù à ditùnga manyènga, kàdì cìndì mwà kwenza pa bwalu abu ncinyi? S’ànù kutùngunuka cyanàànà, kwàjiki. Nwamònu anyi? Nènku bìkèngela bipicilè mu ndongolwelu mukwàbò kumpàlà kwà mèmè bu mwena mwàbò wa mu États-Unis mwà kwangacila kabèjì kàà shekè màkùtá, bìkèngela kupìcilacì ku èkèleeziyà ewu, pàtupù ncyèna mwà kukangacila màkùtá to. Nwamònu anyi? Nènku aci kí ncijaalàme to. Aci cìdì cibèngangana ne mukàndà wà mèyì makùlù à ditùnga. Kàdì cìndì—cìndì mwà kwenza pa bwalu abu ncinyi? Kakwèna cintu nànsha cimwè to. Mulàmbwishi wa bitàdì wa mùneemu emu ewu’s ngudi mungambìle ne ncyènàku mwà

kucyènta to, pa nànkù, èè, ki bwalu mbwabù's. Byòbì nànkù, kakwena bwalu. Nànkù bilekela's.

¹³ Ngeela meeji ne bìvwà ne cyà kwikalè mòmùmwè, bwa. . . bwà ne bânà beètù bàà balùmè ne bàà bakàjì bàà bafiike mu Sud mwàmwa kabivwa bikèngelabwà kwambulabò bya mvità bwà kulwisha bânà bààbò ne bintu byà mùshindù awu bwà kantu kakesè bu nànkù awu to. Ekèlekèle, ndishiilangana kaayi didiku bu nwènù mwà kuya mu cilongelu ní ncyà *penyi* anyi ní ncyà *cinyi*? Mvwa mumòne inàbànza mulenga wa bafiike mu dindà adi pàvwàbo. . . pàvwàbo bajuulè ndululu ku Shreveport kwàka, ne kùvwa mwambi mukùlàkàjì wa bafiike uvwa ànu wambila bampùlushì, wàmba ne: “Ndekèlàayi nyiikilè mèmè naabò.” Nènku ùvwa muntu mukùlàkàjì wa difwànà dyà Nzambi, kàdi kwimanayè mwaba awu è kwambayè ne: “Kacya mèmè ncitukù mwanjì kudyùmvwà bundù bwà dikòbà dyànyì to.” Yèyè ne: “Mufwimbi wàkamfwimba cindì eci, ne ncitukù kacya muumvwè bundù bwàcì to, kàdi, ànu mu dindà emu.” Kàdi yèyè ne: “Pàndì nnùmòna nwènù, bàà cisàmbà cyànyì, nwenza maalù mùshindù ewu,” yèyè ne, “dìbà adi ngàdyùmvù bundù bwà kwikala muntu wa bafiike.” Kwàkabiikidiibwa bankònga, kumwelabò cibingu.

¹⁴ Pa nànkù inàbànza kampànda mwímpè, mulongè tùlaasà, wa mmwènekulu mulenga kujuukilayè kuulu, mwikàle ne meeji, ekèlekèle, matùmbùke. Kwambayè ne: “Cyà kumpàla, ncyènakù muswè bwà bàànyì bânà bàlongeshiibwè kùdi mukàjì wa batòoke nànsha.”

Abu ne: “Bwà cinyi?”

¹⁵ Yèyè ne: “Bwalu yèyè kààkutàbaleela bânà bàànyì mùdi wanyì. . . mulongeshi wa bafiike mufwànyine kubàtábaleela to.” Ki yèyè ne: “Anjì tàngilàayi ànu bilongelu byètù byà mùneemu ebi. Cinùdi nwelela bibingu ki cinyi?” Yèyè ne: “Tudi ne biinà byà màyi à dyowela mu tulaasà twètù ne bikwàbò byònsò, kàdi bòbò kabèèna naabi kwàka to.” Yèyè ne: “Mpindyewu, cinùdi nwènù aba nwelela bibingu ki cinyi?” Kàdi kwelabò mukàjì awu cibingu èyò, nwamònu's.

¹⁶ Ncisonsola kùdi cintu cibì, nudi numòna's, nwamònu's, bòbò, bantu abu. Nènku ki bwà cinyi ndi ngamba nànkù, kì mbwà ne kùdi cipròfètà kampànda—kampànda pa bwalu abu to. Ncyèna ne cintu nànsha cimwè pa bwalu ebu cyà kùdi Mukalenge to. Nènku ikàlaayi batwìshìibwè mpindyewu ne, mèmè mwambè cintu kampànda cyà kùdi Mukalenge mùshindù awu, bwà kunwàmabila, cìdi misangu yònsò ànu. . . Udi wakula mpindyewu's mmèmè. Kàdi pàdìYe Yèyè wàkula, ndi ngàmba ne “Kì mmèmè to, ng'EMU MMÙDÌ MUKALENGÈ WÀMBA.” Ne ncyèna mwà kucyàmba pàdìYe kàyi mucìngabile to. Ndi mufwànyine kwikala mutùpàkàne ànu menemene mu meeji àànyì pa bwalu bwà Martin Luther King. Mèmè

ncyêna mumanyè to, ncyêna ne mwà kwamba to. Aci cidi ànu mmwênenu wanyì mêmè cyanààna. Cintu cyònsò cidi cijuulà ndululu, ki cidi ne cyà kwikala mu matùkù à ndekeelu. Ne byònsò abi mbisonsòla kùdì Sàtaanà, bwà kukòsolola bubanji bwètù busanga ne byònsò bitùdì naabi, cintu kanà cyònsò cidi cijuukà mûshindù awu. Pa nàнку mêmè ndi ntwa ku cyà bantu bàdì kuntu kwàka abu, kanwèdikù meeji ne ncyêna mutwè ku cyàbò to. Mêmè—mêmè ndi mwanyishe budîshikaminyi ne byònsò, kàdì kî mbwalu bùdiku mpindyewu ne bantu abu to. Kàdì cyènzàci, ngeela meeji ne necìbangè mvità mikwàbò yà ditombokela ditùnga pìikalà muntu kampànda kàyì mucímànyike to. Nwamònu's, ba-Communistes mbàdì bènza mudimu munkaci mwà bòbò bantu abu.

¹⁷ Mwaba nsanganyibwa mu Àfrikè pààkenzàbo cintu cìmwècìmwè aci. Nwamònu anyi? Ne ndi mumanyè ne kùvwa ba-Communistes babwelè muntwamu bàmbila bantu bàà bafùke abu ne: “Kaa, nwènù's nudi *cikampànda*, *cikansanga*, anyì *cikankènga*. Nudi *cikampànda*, *cikansanga*, anyì *cikankènga*.” Kàdì katancì aka anyì's, kufikishaci bantu bààbu binunu ku dishebeyibwa. Kàdì bàakafika penyì? Mwaba nànsha wùmwe, nwamònu's, mwaba nànsha wùmwe.

¹⁸ Kàdì mêmè—mêmè ntu munangè mwoyi wà muntu. Tùkwacilàayi Mukalenge mudimu. Bwètù Bukalenge bùdì mu Dyulu; kî ncintu nànsha cìmwè cyà eci cintu to. Pàdibi ànu tudì tudyà, tunwà, ne bafwànyinekù kupeta, cikwàbò kàbìdì cinùdì nukèba ki cinyì? Nwamònu anyi? Pa nàнку ndi mumanyè cidici cifwànyine kwikala. Ndi—ndi mmòna ne cidi cilela ànu lutàtù.

Mpindyewu, lukonko lukwàbò ndwòlo elu.

Yone Mubàtiji, pàakatwilanganaye ne Yesù, nwamònu's, bwà cinyì bwàkambàYe ne: “Nàнку bìdì ne mushinga kutùdì bwà twètù kukùmbaja bwakàne bwònsò”? Cìvwa cyùmvwija cinyì?

¹⁹ Èè, ndi mvùluka Docteur Roy Davis, mulundà wanyì wa—wa—wa katàpùlà—katèèka, wàkambàtiiza musangu wùmwèpèlè wùntùku pàanyi mubàtijiibwe awu. Ki yèyè kwamba ne Yone ùvwa ùsua kwamba, ndi mvùluka cyòci eci mu cilongelu cyàbò, yèyè ne: “Yone ùvwa mumanyè ne kacya kàvwa mubàtijiibwe to, yèyè mwine, pa nàнку yèyè. . . Yesù. Yone wàkiitaba bwà Yesù kumubàtiizaYè.” Èè, aci, mêmè—mêmè ndi mpangakana ne docteur munene awu—awu pa mwaba awu.

²⁰ Kabùyì bwà dikòkangana to, kàdì bwà bwalu bwà Bulelèlè mbùndì mufwànyine kwamba nùnkù. To, kùvwa bantu bàbìdì, balombodi bàbìdì bàà dìbà adi, Maasiyà ne mupròfetà Wendè bàakatwilangana mu màyi amu. Mpindyewu vùlukàayi ne, Yone ùvwa ùbàtiiza kabùyì bwà dilekelediibwa dyà mpèkaatù to, kàdì bwà kanyinganyinga. Kabùyì bwà dilekelediibwa dyà mpèkaatù

to, bwalu mulàmbù kawùwva mwanji kufidiibwa to, nwamònu's, kakùwva Mulàmbù nànsha wùmwe to. Ki Mulàmbù kulwawù kùdiye mu màyi amu. Mpindyewu mònaayi. Yone mmwenze ànu ùbànduluka ùmòna Yesù, kwambayè ne: "Mémè ngudi ne bwalu bwà kubàtijiibwa kùdi Wèwè. Kàdi bwà cinyi Wèwè udi ulwa kùndi?"

²¹ Yesù wàkamba ne: "Itàbà bìikalè nànkù," bwalu ki mùvwàbi. "Itàbà bìikalè nànkù, bwalu bidi ne musinga kutùdi, anyi mbikumbàne bwètù twètù, bwà kukùmbaja bwakàne bwònsò." Dìbà adi Yone, mwikàle mupròfètà uvwa Dìyi dyà Mukalenge dilwila kùdiye awu, ditu dilwa ànu kùdi mupròfètà. Yone, mwikàle mupròfètà, wàkumwva ne cìwva m'Mulàmbù. Ne bilondèshile Mikenji, bìwva bìkèngela bwà mulàmbù kusukudiibwawù kumpàla kwà kufidiibwawù, nènku ki bwà cinyi wàkaMubàtiiza. Nwamònu anyi? Yèyè wàkamba ne: "Bidi ne musinga bwà twètù kukùmbaja bwakàne bwònsò." Mulàmbù awu, wùwvawè mwikàle awu, wùwva ne cyà kusukudiibwa mu cyowelu kumpàla kwà kufidiibwawù bu mulàmbù. Nènku Yesù nguvva Mulàmbù awu; ne Yone wàkacimanya, ne wàkamanya ne Yèyè ùwva ne cyà kusukudiibwa kumpàla kwà kufidiibwa. Ki dyàkàmwè paanyimà, kuleejiibwaYè kùdi bantu bwà cilumbulwidi ne kulwaYè Mulàmbù bwà bukwàbantu bwònsò. Mukalenge ànùbènèshè.

²² Mpindyewu netwìkalè mwà kwangata kaaDiyiisha kakesè kípì, batwishìibwe ne Mukalenge neàtupèeshè mabènesha Èndè. Mpindyewu, pàmwàpa, mémè mwalùkile. . . ndi nguumuka mu lumingu lùlwalwà elu bwà kuya ne bânà mu diikisha dikesè ku tukùnà kwàka. Nènku dìbà adi mémè—mémè mwalùkile pa dìbà, tudì baswè kwakula mu dindà dyà dyàlumingu dilwalwà edi, bu byòbi byanyishìibwe kùdi Nzambì ne kùdi mpaasàtà. Netùnùmanyishè pàmbà lumingu elu kujika, nwènù bàdi pambèlù pàà cimenga abu, mu kunùfùndila kwà mukàndà. Ndi muswè kwakula pa cyena-bwalu ànu menemene cyà ne bwà cinyi tudì twitabuuja bintu bitùdi twètù twitabuuja bwà bwalu bwà Kilistò ebi, bwà cinyi bìdi ne cyà kwikala mùshindù ewu kàdi kabiyikù mwà kwikala mungà mùshindù to. Nwamònu anyi? Ne kucijaadika ku Mifundu. Mpindyewu, bu Mukalenge mwà kwanyisha. Mémè ncìyi mwenzè nànkù to, nènditacishè bwà kunùmòna mu muvù wa mashika anyi mu muvù wà luuyà wàlondà ewu, ewu anyi ewu, patwìkalà baalùkile, bu Mukalenge mwà kunènga. Netwàlukilè mpindyewu kumbèlu ku Arizona, bwà twamòna mwà kabweja bânà mu kàlaasà.

²³ Mpindyewu, mu dindà emu, ànu kumpàla menemene kwà disambidila babèèdi, netùbalè ndambù wa Dìyi dyà Nzambì. Bwalu, tudì bamanyè ne kakùyi Dìyi edi to, kabyèna mwà kwenzeka, kakwèna cintu nànsha cimwè cidì mwà kwenjiibwa to. Nènku ànu Dìyi ki didì mwà kupàtula mabènesha atùdi

tulômbela babèèdi ne bàdi mu lukèngelu aba aa. Nènku ndi muswè kubalakù ndambù mpindyewu mu Peetèlò wa Kumpàla, nshapità mwi5, kubangila ku mvensà 1. Ne pashiishe mu Mukàndà wà Ebèlù, ndi muswè kubala Ebèlù 2.2-4.

Ndi nkànkamika bakùlù bàdi munkaci mwènù, bu mûndi mémè pàanyi mukùlù, ne ntèmù wà dikèngà dyà Kìlistò, ne kàbidi mwabanyanganyi wa butùmbi bwàbuuludùbwà ne:

Dùshaayi cisùmbù cyà mìkòòkò cyà Nzambi cidi munkaci mwènù, nwàmbulè bujitu bwàyi, kabiyi bu benzeja ku bukolè to, kàdi ne budiswìle; kabiyi bwà mfrangà mibi yà bukooyà to, kàdi ne meeji madyànjila kulongolola;

Anyi kabiyi bu bakalenge ne bukòòkeshi kumutù kwà bumpyànyi bwà Nzambi to, kàdi biikàle bitembelu kùdi cisùmbù cyà mìkòòkò.

Nènku pàmwènekà Mulami munène wà mìkòòkò, nenùpetè cifulu cyà butùmbi cidi kaciyi cìfubidila to.

Byà mwomùmwè kàbidi, nwènù bansongà, kòòkelàayi mukùlù. Eyowà, nwènù bônso kòòkelanganàayi muntu kùdi mukwèndè, ne kanwikadi bavwàle... kàdi ikàlaayi bavwàle didipwekesha: bwalu Nzambi ùtu ùkàndameena badibàndishi, ne ùfila ngàsà kùdi badipwekeshi.

Dipwekèshaayi. . kwìnshì kwà cyanza cyà bukolè cyà Nzambi, bwà yêyè wàmòna mwà kunùbàndisha mu cikondo cikùmbàne:

Biikàle numwimikila ntàtù yènù yònsò; bwalu yêyè ùdi ùnùcyùka.

²⁴ Ne mu Ebèlù, nshapità mwi2, tudi tubala Méyì aa. Mpindyewu ndi nkeba bwà kafila cyena-bwalu cyà ne: “kwimikila ntàtù yènù.” Ndi... Cyena-bwalu cyànyi cidi ne: Yêyè Ûtu Ûcyùka. Wêwê Utu Ucyùka Anyi? Ndi muswè kubala katùpà aka mpindyewu, panùcidi nubuulula mu Ebèlù 2 apu, bwà nwamònakù dyu—dyumvwija dyà cyà bushùwà dyà Myakù eyi, cidiyi, cidi cyena-bwalu eci cyùmvwija.

Ki bwà cinyi bìwwa bikèngela bwà twètù kutàmba kutèya ntèmà ku maalu atùdi bumwè, bwà dibà kanà dyònsò katwìkadi twâlwa kuàlekela àfinuka àya nànsha.

Bwalu pìikalàbi ne dîyi dyamba kùdi banjèlò dîwva—dîwva dishimàte, ne dishipa dyònsò dyà mikenji ne cishikù byàkapeta difutu dibikumbanyine dyà mâtàpishi;

Mmunyi mutwàpàndukà, twètù balèngùlùle lupàndù bunènè nùnkù; lwàkabangà kwambùbwa dyàmbedi

kùdì Mukalenge, ne batùshindikilelù kùdì aba bääkamutèelejã;

Nzambi kábìdì mwikàle ùfila...bujaadiki, ne... bimanyinu ne maalu à kukèma byònsò, ne... bishimã bishùleshùlàngane, ne mapã à Nyumã Mwîmpè, bilondèshile diswa dyèndè yéyè mwinè?

25 Ndi muswè kwangata mwab'ewu cyena-bwalu eci, cyà ne: “Yéyè ùtu ùcyùka.” Ne: “Wèwè utu ùcyùka anyi?” PàvwàYe pànu pa buloba, Ùvwa ùcyùka bantu. Meeji à cyôci eci àdi àmvwila mu mutù ànu kumpàla menemene kwà kwakula anyi kwà kusambidila babèèdi, ncíyì ànu mumanyè menemene ne mulongo wà—wà babèèdi wutwikalà naawù ngwà mùshindù kaayi to.

26 Mémè, mémè...dyàmbedi, ne bwà kulenga cyôci eci, batèeleji bàdi ne cyà kwikala balaabìbwe ne diitabuuja. Wèwè—wèwè, wèwè kùyi ne diitabuuja to, díbà adi kabyèna—kabyèna mene ne dikwàcisha bwà kulwa bwà kukusambidilabò to, bwalu nebíkengele diitabuuja dyèbè ne diitabuuja dyànyì pàmwè; diitabuuja dyànyì bwà kuMwitabuuja, diitabuuja dyèbè bwà kuMwitabuuja. Pa nàнку katùpu aci mwoyi mpindyewu to pàndì ngenda nya apa. Bìdi bíkèngela twikalè ne cintu kampànda mu mùshindù wà mutòoke tòò, biikàle ne cishindiki, ki cìndi nswà kwamba, bwà twikalèku mwà kushindamijilapu diitabuuja dyètù mu citùdì tuteeta bwà kwenza. Bwalu muntu yéyè mulenge cintu kanà cyònsò cidiye muswè kwenza, kàyi ne diitabuuja búngì bukùmbàne to, mmwenzèjìbwe bwà kupangila bwalu. Kàdi bu yéyè mwà kucilenga ne diitabuuja búngì bukùmbàne, díbà adi mmwenzèjìbwe bwà kutuuta dyàkalenga piikalàbì bilondèshile diswa ne kiipàcilà kàà Nzambi bwa kubyèna.

27 Mpindyewu, mvwa munkaci mwà kwela meeji mùdiYe ùcyùka. Dilòòlò dishàale, mu mùshindù kampànda, wà pàbwàwù, mvwa mulombola kùdì Nyumã Mwîmpè. Mpàmvwà mwindile bantu kampànda bwà kulwabò kukwàcisha Mwanèètù Wood bwà kutèeka nzù—nzùbu wa bàtentemuna uvwayè mwenzè paanyimà pàà màshinyì èndè à cisemuna. Ncìvwa mumanyè ne mbwà cinyì mvwa nteeta bwà kupeta mulundà wanyì mwîmpè, Mwanèètù Evans awu to, ki mémè kuya, kubanga kubànda ne cibeeba. Ciinè aci, mukàjàànyì ne díkù dyànyì bàdi basòmbe paanyimà apa aba mbamanyè ne ncilelèlè. Nènku mu mùshindù kampànda, mu mùshindù wà dikèma's, mémè kukùdimuka e kwalukila ku mwaba kampànda, ku nzùbu kampànda wa cilàala-beenyi.

28 Kàdi, kaa, mùshindù mwinè wùvwàbi bitùpishe mwoyi wànyì ne disànkà bwà kumòna bààbúngì bàà ku balundà bàànyì bakúngwile kuntwaku mu tusunsa tutwè ku túbìdì twà díbà, mu mùshindù wà ne byàkajika kajila aku, tùshinyì katùciyikù mwà kupicilamu kábìdì to, ànu balundà bàà cyà bushùwà aba's,

bèndesha màshinyi ntàntà wà kilòmèètà nkàmà, kuumukila ku Géorgie ne ku Tennessee ne ku Alabama, ne mu nyùngulukilu mwònsò amu, ànu bwà—bwà kutèèleja disangisha. Ki meeji awu kumvwilawù mu mutù ne: “Dìbà adi ncinyi civwa cikèngelà bwà mèmè kwambila bantu bàba, mumanyè ne mu Ditùkù dyà Cilumbulwidi nebikèngelè bwà mèmè kulumbulula bwà bìndi mbàmbila?” Ne mèmè pàànyì’s ndi—ndi munangi wa mwoyi munènè wùcilwalwà ewu, ne ndi—ndi muswè kwikalàmù.

²⁹ Ki pashìishe mu mùshindù wà dikèma mèmè kuya ku mwaba kampànda kùngàakanyùngùlukà dinyùngùluka dyà bwalu bukolè. Pamutù pàà kunyùngùlukila kuntwakù, ngàkabànda bwà kwela cibèndà. Makènkè kupenyawù pa babàkà bàbìdì bananga pambèlu apu, nsongàakàji yìbìdì yà bitende milenga yìmvwà mfùma ku diswika mabàkà àyì ne bambi bàà bitende balenga bàbìdì. Nènku Sàtaanà, paanyimà pàà yèyè mumanè kumòna mwa—mwambi awu, umwè wà kudibò mudimu wèndè wà bwambi mukùtùke ne kwangatayè nyàà—nyàanèndè wa kwenda nèndè ànu mwab’ewu, ku cyoshelu eku. Kuyabò ne disànka mu dipetangana dyàbò dyà mulùme ne mukàji paanyimà pàà disèlangana, kàdi—kàdi mwena lukunà kudyèlayè pa nsongàalùmè ewu. Nènku ndi ngamba cyòci eci bwà kuumvwija cìndi ngamba eci ne: “Yèyè ùtu ùcyùka anyi?” Nànsha nànkù, biikàle ne diitabuuja dìdì kadiyì difwànyine kwitabakù “tòhù” to, bòbò kukùdimuka e kwalukila apa, bamanyè ne paanyimà pàà bòbò bamanè kuya kule mu (kule mu esètè) apa mu mwaba kampànda mu dipetangana dyàbò dyà paanyimà bamanè kusèlangana, kwalukilabò ne kushàalabò basòmbè, bindile. Ki mèmè kubwelamù, nsongàalùmè mwimpè kumòna; mukàjèndè musòmbè pambèlu, ùdila mwadi, yèyè ne nyàanèndè wà kànàkànà awu. Ne muntu mukwàbò ne mwanèètù mukwàbò bènda bàlwa, lubilu, mwikàle mulundà wa nsongàalùmè ewu, bàmba ne: “Kaa, Mwanèètù Branham, *cikampànda* ne *cikansanga* ncyenzèke’s.”

³⁰ Mèmè kuyakù è kumòna nsongàalùmè mulenga kumòna ewu musòmbepù, ànu mu nkànkala wa mwoyi wèndè, mulombodi wa bansongà, musòmbè mwaba awu, kàdi Sàtaanà mumuswika. Kàvwakù mumòne to, kàdi mèmè kwangata cyanza cyànyì (cyà dyàbakàji) bwà kumulabula ku cyèndè cyanza (cyà dyàbalùmè), bwà kumòna ní kùvwa disaamà kampànda dyà cipùpù dimukwàte. Kàdi kakùvwa cimanyinu nànsha cimwè cyà divwayila to. Mpàtuka buludi mu cibambalu amu nguuumukila ku kusambila ne kujila kwà byàkudyà, ne mwindile Mukalenge, dilaabiibwa dyà Nyumà Mwimpè divwa mwaba awu, ne ki bwà cinyi Wàkatùlombola, nwamònu’s. Ne pashìishe pàngàakamòna mundìdìmbì wà mìdimà ewu kumutù kwèndè, ncyàkambakù cìmvwà ngenza aci to, kàdi ndambù wa dìbà cyanàànà bìvwa biyè cyònsò, mashikà à ku byanza byèndè mayè mwamwamwa, ùvwa wèla mbilà ne ùtùmbisha Nzambi, mu ndambù wa

tusunsa bwà kudipetulula yêyè mwinè. Kàdi's ki bôbò aba basòmbè mwab'ewu mu dindà emu, basòmbè mu batèèleji emu. Mònaayi mùvwa Sàtaanà ùteeta kutònkola nsongààlùme awu, mu kumuleeja meeji mabi kampànda à cyena-bundù bwà kwalukilawù, cìvwa Nyumà Mwîmpè mumanyè, ne mèmè kucimòna ku cìkèèna-kumòna cyà Mukalenge. Kàdi Nzambi wàkacyùka muntu awu. Nzambi wàkacyùka nsongààlùme awu.

³¹ Ànu ncifuminaku ku difika mu katanci kakesè emu, inâbànzà kampànda—kampànda, ndi mmumòna musòmbè mu kajila emu, kàyì ne...wàpecikù ànu nkwasà mu mùshindù kampànda, bwà kusòmbayè. Yèyè kwamba ne: “Bidimu citèèmà, Mwanèètù Branham, bìndi muteetè bwà kukupeta.” Ki yèyè ne: “Nkààdi mushiikile ànu menemene! Ndi mufikè pashiishe kaaba aka, ne ncìyi nànsha mwà kupeta kartà kàà disambila bwà kwikala mu mulongo to.”

³² Billy, mu bushùwà bwà bwalu, mmèyi mamutùmina bwà kumònayè ne ncyèna mutàcishìibwe to, kumbweja ne kumpàtula. Kanùumvwidi Billy bibi to, mbamutùmine dìyi kùdi kasùmbù kàà balombodi aba bwà kwenzayè nànkù. Kàdi bu ne kàvwa wènza nànkù to, ncìvwa mufwànyine kwikala mukùmbàne kufika ku mulongo wa babèèdi, kubwela apa to. S'nudi nujungulula aci. Nwamònu's, bikèngela kwikalè ndongolwelu kampànda bwà cyònsò citùdi twenza. Bidi—bidi bikèngela ànu twikalè nendè, nwamònu's. Kàdi yèyè mwikalè wàmba ne: “Ndàaku, papa, ambùlùjà,” eci.

³³ Inâbànzà awu kwalukilayè paanyimà. Ki yèyè ne: “Mwanèètù Branham, ngàakulèku neebè ànu dìyi dimwè cyanààna.” Mèmè mwimàne mwaba awu, cìkèèna-kumòna kubwayikaci pa nsongààkàji wa citende mulenga ewu, e kumòna ne mwoyi wèndè wùvwa ne bujitu. Ne ùvwa ùteeta bwà kwenza mudimu bwà kupeta cyàkudyà. Nènku ci—cintu cinènè cìvwa cyenzèke kale, kale menemene mu cikondo cyà baledi bèndè, cìvwa cyenzè ne cintu cinènè eci cìmwenzèkèlè, ki Mukalenge Yesù kucisokolola ne kuleeja cìvwa bwalu. Nènku mwaba awu, mu katanci kakesè kàà díbà, kucyùmushaYè mukàji awu. Wàkaya eku ne eku wènda ùcyònkomoka. Nènku mpindyewu mmusòmbè neetù mwab'ewu mu batèèleji emu mpindyewu, ùcyònkomoka, ne binsònji, pàdiye ùkùpùla kwisù mpindyewu apa, mumanyè ne bulelèlè bwà bwalu bùvwa bumanyishiibwe. Nènku aci, cìvwa, mukàji mukesè mukwàte ne byà luse uvwa muyùngùlùke mutù awu ùvwa mubìndùlùke mu mùshindù wà kàyì mumanyè nànsha cyà kwenza bwènde yèyè mwinè to, nènku welà meeji ne bwèndè bùkaavwa butùùke, ne kakùvwa Nyumà Mwîmpè to, ne leelù ndyèndè ditùkù dyà ndekeelu. Ùkaavwa muteetètètè munda mwà bidimu citèèmà ne ùkaavwa ku ndekeelu kwà dishiikila dyèndè, Nzambi wàkacyùka mukàji mutekète uvwa muntu nànsha umwe kàyì ùcyùka awu.

Nwamònu anyi? Cikondo kaayipù's wè! Yèyè's ùtu ùcyùka cyà bushùwà.

³⁴ PàvwàYe pànu pa buloba, bu mündi ngamba, Yèyè wàkacyùka bantu mu mùshindù wà ne wàkondopa babèedi bààbò, kusàmba myoyi yàbò, kubàmbila bwà mwa—mwaba kampànda wùvwàYe mwà kuya kabàlongolwela, ne mwà kulwa cyàkàbidi bwà kubàngàta kùdiYe Yèyè mwinè. Wàkabàcyùka. Kàdi mònaayi ne, Yèyè wàkacyùkangana mu mùshindù wà ne, pààkamanyaYe ne Ûvwa ne cyà kuumuka bwà kutùtwàdila cintu cinène eci, Wàkamba ne: “Ncyàkunùshìya kanùyì busàmbi to, kàdi Nèntumè Nyumà Mwímpè, nènku Yèyè neàtungunukè ne dinùcyùkà Dyànyì,” too ne pààlukilàYe. Kakwèna muntu nànsha umwe udi ucyùkangana mùdi Yesù to. Bu mùdibi ne mubidi Wèndè, bu Mwakwidi Munène, mu mudimu wà butwàngaji wùdiYe munkaci mwà kwenza mpindyewu awu, Mubidi awu wùdi ne cyà kwikala mu Bwikadi bwà Nzambi misangu yònsò, bwà dyakwilangana, bwà Nzambi kàmònu mpèkaatù wa ngènzàmpèkàatù to; Yèyè ùdi ùmòna ànu Mashi à Mwàn'Èndè Sungasunga awu. Nènku mumanyè aci, Yèyè wàkaaluja Nyumà Mwímpè bwà kutùngùnuka ne kusàmba cisàmbà Cyèndè. Yèyè ùtu ùcyùka anyi? Cyà bushùwà ne, Yèyè ùtu ùcyùka. Mpindyewu, bìvwa bìkèngela bwà Yèyè kutùngùnuka ne kucyùka bantu, bantu Bèndè pa buloba apa, mu mùshindù wùmwèwùmwè wàkabàcyùkàYe pàvwàYe pànwapà awu. Bwalu mMwambè mu Yone Munsantu, nshapità wa 15, panwikalà baswè kwenza . . . Ndi ne tuntu tufùnda túsanganyiibwa mwab'ewu pàmwè ne Mifùndu yìndi ntèèla eyi, Yone Munsantu 15.26 ne 27.

³⁵ Ndi mmòna bààbùngì bèènù munkaci mwà kufùnda Mifùndu. Pa nànkù ndi mwà kuleedila ku cyòci eci panwikalà kanùyì bacìmanyè, misangu yàbùngì, ku Mifùndu. Ndi mfùnda Mifùndu, dìbà adi ndi mmanya cìndi ngamba kuumukila kaaba aka, bwalu cidi misangu yònsò ànu mu Dìyi dyà Mukalenge. Nwamònu anyi?

³⁶ Wàkamba ne, pìikalà Nyumà Mwímpè mulwè, Wikala Taatù mwà kutùma mu Dìna Dyèndè awu, Yèyè ùvwa mwà kuMufidila bujaadiki. Mu ngaakwilù mukwàbò, Yèyè ùvwa mwà kwenza cintu cìmwècìmwè cyàkenzàYe aci. Nyumà Mwímpè ùkwàcila mudimu mu ntèntè kampànda uvwaYe mujidile, ùvwa mwà kwenza cintu cìmwècìmwè cyàkenzàYe aci. Mpindyewu, cìvwà cìkèngelà bwà aci kwenzaci bwètù twètù! Dìbà adi tudi bamanyè ne ànu munkaci mwètù leelù ewu mene tudi ne Mukalenge Yesù musàmbi umwèumwè awu mu mmwènekèlu wa Nyumà Mwímpè, mudimu mukwàbò mùdi Nzambi Yèyè mwinè munkaci mwà kukwàcila mudimu.

³⁷ Yèyè nguvwa Busàmbi kùdi Izàlèèlèlè pàvwàbo mwà kubàndisha mèsù ne kumòna Dikunji dyà Kapyà adi, ne kutèèleja mupròfètà wàkula Mèyì àvwà malelèlè awu, ne Nzambi ùCishindika. Ki cìvwà Busàmbi bwàbò ncyòci aci.

38 Yèyè ùvwa Busàmbi pàvwàYe pa buloba apa bu muntu, Nzambi muvwijiibwe mubidi. Nzambi udileeja Yèyè mwinè ne wàkwila Yèyè mwinè mu—mu Muntu kampànda, Kilistò Yesù, Wàkalaya ne “Byenzedi bìndi Mèmè ngenza nenùbyènzè pèènú. Ne Ndi nya ku Taatù, ne nèntumè Nyumà Mwimpè, Wìkala Mèmè mu mmwènekèlu wà Nyumà awu. Nènku Nèngìkalè neenù, ne nènsòmbelè munda mwènù. Ne bintu ànu byòbì bimwèbimwè bìNdi mwenzè kaaba aka ebi, Nyumà Mwimpè neàbyènzè cyakàbìdi mu Dìnà Dyànyi, pààlwàYe.” Nwamònu anyi? Ki bwà cinyi Wàkamba ne: “Kwakula bibi bwà Cyòci aci” mpindyewu paanyimà pàà difuta dyà cibawu dimanè kwenjiibwa, cìvwa mpèkaatù uvwa kàyì mwà kufwidiibwa luse to, bwà “kupenda Nyumà Mwimpè.”

39 Ne Yèyè mwà kucyènta mu mùshindù wùm wèwùm wè awu, bwà twamòna mwà kumanya ne cìvwa mbusàmbi bùùmukila ku mmwènenù kampànda wa pa buloba, anyi tuvwa bafwànyine kumanya ne cìvwa mbusàmbi kampànda bùfùmina kùdi muntu mùshindàme kampànda uvwa mwà kutùjìngila mabòko kunshìngù ne kutwèlakù citupà ndambù ne kwenza bwà tudyùmvwèkù bìmpè, anyi—anyì cyakwidi kampànda cyà tèlòlòjì wa dingumba kampànda cyà cìfwànyine kwamba ne “mpindyewu wèwè washàadi wètù, ne twacìpeci; ne kwikadi wa ku bakwàbò bònsò abu nànsha, bwalu bòbò kabèena naaci to.”

40 Wàkavwija dyakàmwe cyòci eci cyà bushùwà, nwamònu’s: “Yèyè neakulè mu Dìnà Dyànyi. Byenzedi bìndi Mèmè ngenza nenùbyènzè pèènú, pààlwàYe pambidi pèènú.” Nwamònu’s, Úvwa mwà kusàmbà mu mùshindù wùm wèwùm wè awu, ku ditùfwila luse ku mpèkaatù yètù yònsò, wòndopa mäsàamà ètù wònsò, ne wàkula neetù bwà busàmbi bwà Bukalenge bùdi ne cyà kulwa. Nwamònu’s, ùDijaadika munkaci mwètù, mwàkaDijaadika Nzambi munkaci mwètù ku Yesù Kilistò amu. Ne mu—mu Timòtè Mwìbìidi...Timòtè wa Kumpàla 3.16, mbafunde mùshindù ewu, bamanyè pa bwalu bwà Nzambi ne: “Kakùyì dikòkangana to tudi bamanyè ne bwalu-busokoka bwà difwàna dyà Nzambi mbunène, bwalu Nzambi wàkamwèneshiibwa mu mubidi.” Twètù twàkamòna Nzambi mu mubidi. Cìvwa mbusàmbi bwà Nzambi, bwà kumanya ne Yèyè wàkalwa menemene (Wàkatùcyùka) too ne mwàkashàalàYe umwè wètù. Nzambi mumwèneshiibwe mu mubidi. Kàyì ànu muntu mukwàbò wa pàtupù to, kàdi Nzambi Yèyè mwinè!

41 Nènku mpindyewu bwà kutàmba kuciseemeja pabwìpi ku cikwàbò cidya, Údi útuma Nyumà Mwimpè bwà kucyùka bwà busàmbi bwètù, nènkù Yèyè mmusòmbèlè munda mwètù. Kaa, Yèyè’s útù ùcyùka cyà bushùwà!

42 Mpindyewu tudi ne cyà kutùngunuka kuya ku katùpà kakwàbò kàà Mufundu kaaba aka, anyi ku meeji makwàbò bwà kutwà cyòci eci nyama ku mikòlò. Kumpàla kwà mèmè kuya, ndi mufwànyine kwamba nùnkù: muntu yònsò kàtu ne

Musàmbi ewu to. Bôbò, bôbò kabèèna, kabèèna Nendè to. Pa nàнку cidì cyèenza ne kabèèkadi Nendè, mbwalu kabèèna bàMwitaba to. Ûdi bwàbò bôbò, kàdi kabèèna bàMwitaba to. Mpindyewu, ndi ntèkemena ne nudi bàà nyumà bikùmbàne bwà—bwà kubala cìndì ngamba eci. Nwamònu anyi? Ndi ngambila kasùmbù kàà bantu bàdi bàkèngela kusambidila munda mwà tusunsa tukesè emu. Ne tudi ne Busàmbi ebu mu Nyumà Mwìmpè udi mutùmiibwe bu Musàmbi awu, kàdi bantu bônso kabààkwakidila Aci to. Kabèèna baCìitabuuja to. Nwamònu anyi? Bôbò, bwà kwenzabò aci, dìbà adi bàdi bakùngwija busàmbi bwàbò bufùmìna ku nsùlù mukwàbò, mishindù mikwàbò kampànda. Bôbò kabàyi biitaba Musàmbi mulongolola wa Nzambi to, dìbà adi bikèngela bàpetè musàmbi mukwàbò kampànda, nwamònu's, bwalu kwèna mwà kwikala ne mwoyi kùyi ne cintu cyà kwikala ne mwoyi bwàci cyôci to.

⁴³ Ne ndi ntekemena ne yònsò wa kunùdi neumvwa cyôci aci, nangananga nwènu bàdi bakèngela kunusambidila abu, bàdi batacishiibwe bikolè mu dindà emu, pamwàpà ne ntàtù yidì bàngàngàbukà kabàyikù mwà kutwà mukòlò to.

⁴⁴ Twètù tudi twitabuuja ne bàngàngàbukà bàdi bàmbulwisha bantu. Mémè ndi ngiitabuuja ne Nzambi ùtu wondopela ku mudimu wà bàngàngàbukà. Nzambi ùtu wondopela ku dipandangana. Nzambi ùtu wondopela ku dyumvwa. Nzambi ùtu wondopela ku dinanga. Ànu dinanga dikesè cyanààna dìtu diya ntàntà mule. Muntu yèyè mwikàle musalùke yònsò, kàdi ùmuleejè ànu ne udi umucyùka. Nwamònu anyi? Nzambi ùtu wondopela ku dinanga. Nzambi ùtu wondopela ku disambila. Nzambi ùtu wondopela ku bishìma. Nzambi ùtu wondopela ku Dìyi Dyèndè. Nzambi ùtu wondopa! Nànsha ciikale nsùlù kaayi, Nzambi ùtu wondopelakù. Nzambi ngùtu wondopa, bwalu Yèyè wàkamba ne: “Mémè ndi Mukalenge udi ukwondopa ku màsaamà èbè ònsò.” Pa nàнку bivwa bikèngela bwà byònsò abi kukwàcilabì mudimu pàmwè, nènku bantu mu midimu mishìilèshìilàngàne yà bwambi kukwàcilabò mudimu pàmwè bwà cyôci aci. Nwamònu anyi? Mpindyewu, kàdi bôbò kabèèna bàbyèenza to, bwalu mîngà misangu bawù bàbàkàndika bwà kwimanabò pa Dìyi dyà Nzambi, bwalu màngumba àbò kampànda kaèna àbàànyishila bwà kwenzabò ciinè aci to. Kàdi aci kacýèna ciimanyika Bulelèlè to, nànsha nàнку, Nzambi ùdi ùtùngunuka ne kwondopa ànu bu ne kakwèna bwalu to.

⁴⁵ Nàнку bôbò bàdi bàteeta kusunyina busàmbi ku nsùlù mukwàbò. Twánji twàkulèbi dyàmbedi bwà musùkà.

⁴⁶ Tudi tusangana ne bantu bààbùngì bàtu bàteeta kupetela busàmbi ku dinwà dyà maalà. Nudi bamanyè ne, tutu ne cyakwidi cidì cimanyike bìmpè menemene munkaci mwètù leelù ewu, cyà ne—cyà ne bambi bààbùngì bàtu bànwà maalà yimwè misangu kumpàla kwà kubànda mu cyambilu, bàngata ma—ma—maluvu makolè àdi àkwàta. Bitu bimanyike ne bàtu bàmòna

bambi pa cibùmbà cyà ku cyambilu, biikàle mene bàtetuka ku bwenzeji bwà maalà makolè. Nènku kabivwa bikèngela bwà aci—aci kwikalaci nàнку to. Kabivwa bikèngela kwikalabi nàнку to. Mbwalu misangu yàbùngì tudi bafwànyine kupiisha muntu awu padibi pàmwàpa kabiyi bikèngela twètù kwenza nàнку to, bivwa bikèngela bwà twètù kujandula ne lutàtù lùdi cinyi. Bààbùngì bàà kùdìbo bàvwa bakùdimùne mucimà balekèle maalà à kapyà. Kàdi tudi tusangana ne, piikalàbo bàsanganyiibwa mu ngiikàdilù awu, bidi dipangila dyà ngàsà ne byà bundù. Kàdi kì nkadiwu kàdi kafwànyine kupita kàà kushima, kwiba, anyi kwalakana bakàjì to, anyi cintu cikwàbò kanà cyònsò cidi mu díyì ditùma adi. Nwamònu anyi? Ne pàmwàpà muntu mmulediibwe ne lukùka lutùmbùke, ne ùdi ùmòna tukàjì tujì twà maja twà tùvùùla ne bilàmbà etu mu mùsèsèsù, ne yèyè—yèyè udi misangu yònsò mu lutàtù. Nwamònu anyi? Yèyè, aci, muntu awu mmulela mùshindù awu. Mpindyewu, civwà cikèngela bwà yèyè kwenza, mwambi ùdi unwà maalà awu. . .

⁴⁷ Anyi mu—anyi mukàjì udi unwà mfwankà awu, anyi, udi uvwàla mrvàdilù wa masandi, mwikàle ùteeta bwà kupetela busàmbi ku diikala ne mbungakeenu mwimpè, mu mùshindù wà ne mmuswè kufikisha balùme ku dimutàngila. Kakwèna kabingilà kakwàbò to. Yèyè mmubùlùke ndambù. Nwamònu anyi? Mukàjì wa meeji nànsha umwe kì mmufwànyine kuswa kudivùùla bilàmbà kumpàla kwà muntu mulùme to, udi ne meeji èndè mu òwò awu. Nwamònu anyi? Kakwènakù kabingilà bwà bwalu abu to nànsha kakesè. Nènku mukàjì awu, kàdi ùdi ùteeta kucyènza, bàna bàà bakàjì batekète leelù ewu bàdi bàpàtuka mu mùsèsèsù, bàdi menemene. . . Èè, nwafwàyikù luse bwà cyakwidi aci. Nènku vùlukààyi ne, mukàbà wà mèyì ewu kawèna ànu bwà bantu bàdi apa aba to, wùyaaya buloba bujimà. Nwamònu anyi?

⁴⁸ Nènku mu—mukàjì udi muswè kudivùùla bilàmbà byà pambidi, bwalu mmumanyè ne kùdi luuyà lukolè. Kupàtuka pa muunya pààpa, butakà, ne pashiishe kupàtuka muvwàle bilàmbà kampànda, nènku ncyèpi cidi citàmbe kwikala cyà mashika? Ba-Indiens bàà mu Papagos ne Navajos mwàmwa; bàà mu Papagos, nangàngà, ne bàà mu myaba milamisha, bakàjì abu bàdi bàpàtuka badijingile mbùlankètè minène miluka ne mandà, ne bàsòmba pambèlu pa muunya pààpa bwà kulama citaleela. Bwà cinyi? Bàdi bàkòpakana, ne lupeepèle lùdi lùtuuta alu lùdi lùbàpèèsha citaleela, nudi numòna's. Kàdi bakàjì aba bòbò kabèèna ne kabingilà kakwàbò to pa kuumusha ànu. . . Kì mbacimanyè to, kabèèna bacijingula to. Ncyèna ngamba ne ncìdìbò bènza to. Bààbùngì bàà kùdìbo mbakàjì bàà maalu mimpè, kàdi ncyèna ncyàmba bwà kwikala ne cyakwidi cikàyàbàle to. Ndi ncyàmba bwà—bwà kuteetakù bwà—bwà—bwà kubàtàbuluja. Nwamònu anyi?

49 Cidi ànu n'Sàtaanà, nwamònu's. Udi ujingulula mubidi mukwàbò, mubidi wà bulùme mulengàmèene cyà mùshindù awu, kufila bwenzeji bwà mùshindù awu kùdìbo too ne mwikalàbo—mwikalàbo ne cyà kudidisha ndundu yàbò yà màshinyi ne kwela kashibà kàà mbwa wa—wa—wa diitu. Nènku—nènku—nènku cidiò bènzela ciinè aci ncinyi? Bakàji bàdi bàcyènza bwà kufikisha balùmè ku dyenza nàнку. Nudi nupàtuka bwà cinyi, mu luuyà lukolè lwà ditùkù alu, ne pa dîbà inaayi wà mapingaja, bwà kukòsa mashinde pàdi bantu bàfuma ku mudimu wàbò ne bikwàbò mùshindù awu? S'bidì bileeja ne nnyumà wa katombòtombò. Nènku ndi mumanye ne bààbùngì bààbò mbafwànyine kwikala ne Cipidi cyà Dimanya citumbùke ntàntà wà kilomèetà mùliyò mujimà kutàmba cyànyi mèmè, kàdi ndi nteeta cyèbè Cipidi cyà Dimanya aci ne Dîyi dyà Nzambi bwà kumòna kùdici cipàtukila. Nwamònu anyi? Ki Cipidi cyà Dimanya cyà bwena-leelù aci, kàdi cileeji ciinè ne mamuma à mu nsòmbelu's mbidi bijaadikà. Pa nàнку bôbò bàdi bàteeta bwà kupetela busàmbi ku byôbi abi.

50 Bààbùngì bàà kùdìbo bàdi bàmba ne: “Èè, mèmè ncitu ngenza abi to.” Kàdi's nudi nubàvwàdika bôbò biinè mvwàdilu wa kamfwishà mu mùshindù wà bàteeta bwà kwikala bàà cyena-leelù kutàmba mukàji wìkala mwà kuya kasòmba ku luseke lwàbò mu èkèleeziyà mu dindà dyàlondà, muvwàle cifulu citàmbe bwimpè anyi bilàmbà bitàmbe bwimpè, bwalu nudi ne mfrangà. Nwamònu anyi? Nwamònu's, mpèkaatù ùtu ùpweka too ne kwishì kule. Nènku bàdi bàteeta bwà kupeta busàmbi mu kwenza kwà nàнку awu. Bàà bwalu bàdi ne . . .

51 Ncilwè cintu cyà mu mùshindù wà ne kakùyi mpatà to ncikalengè too ne ditungà dijimà, kí ng'anu ditungà nkàayaadi to, kàdi buloba bwònsò nkòong. Ndi mufwànyine kwamba bintu byàbùngì mwaba ewu, kàdi, bwà kulaminyina dîbà, masangisha à dyondopa miikàle àlonda mu katanci kakesè emu, Ndi—ndi mufwànyine kwakula kwalabala pa cyôci eci, kàdi ncyàkwakulapù to. Ndi mutwishilbwe ne nenùmvwè cindi nswa kwamba aci. Eci, ncikalengè beena maalu à cidiidi, nsòmbelu wà maalu à cidiidi, nsòmbelu wa ne bantu, nsòmbelu wa maalu malenga à ditungà, wa bisàmbà byà pa buloba bujimà. Mbikafikè mu mùshindù wà muntu ùswa kwikala mwena cidiidi ànu bwà kwikala ne dîna dyà kwikala mwena cidiidi. Mupetè mfrangà bùngì cyanààna, mufwànyine kupeta tukàndà twà masungulangana ne kufucila màshinyi bwà kucyènza, ne—ne bikwàbò, ànu bwà dîna adi cyanààna, ne biikale biyiila mìliyò ne mìliyò yà ndola, nwamònu's, ànu bwà dîna dyà kwikala mwena cidiidi munène kampànda. Ngàmbi bikumbane pà cyôci aci, nudi bamanyè cindi ngàmàba aci.

52 Kàdi nsòmbelu wà ne bantu pèndè! Bantu bàdi bàteeta bwà kudyènza cimùkù mu nsòmbelu wà ne bantu wà dipaala ewu. Kanùngambidikù ne bàà pa buloba kí mbapàle to, kàdi

biikàlè bènza mùdibò bènza emu. S'mbapàle cyà bushùwà. Cyà bushùwà. Mbantu ne mitù minyungùlukè. Ne ku ngàsà wà Nzambì ki mùshindù wùmwèpelè wutwàpàndukàku. Mònaayi, mu nsòmbelu wà ne bantu ewu, bantu mbafikè mu mùshindù wà ne bàdi—bàdi bàvwija tusumbù tukesè tülwa twà nsòmbelu wa ne bantu, ne bàdi bàdimbwikamù ne bèèla meeji ne: “Tudi kasumbù kimpè kutàmba kàdi ku mutumba aka.” Nwamònu anyi? Ne ciinè aci, cidi cyènjiibwa ànu mùshindù awu. Ne nnsòmbelu mulenga, mbikalènge ne nsòmbelu mulenga wa bantu mu mùshindù wà ne, bwà kwamba menemene, balundà bàànyì, ncyèna mene ngiitabuuja ne (bàà pa buloba) mwaku “nsòmbelu mulenga” mmumanyìke munkaci mwà byà pa lukàmà makùmi citèemà byà bantu mu ditunga emu to. Bòbò kí mbamanyè nànsha cidi (bàà pa buloba) mwaku “nsòmbelu mulenga” ùmvwija to. Nci—ncibàbàfùke. Ne nciyènzè ne mayelè à dikemà.

⁵³ Sàtaanà mmudimùke wà wòò, nwamònu's, ne ùdi ùcyènza ànu bipeepèle nùnku, mu—mudimùke be, ànu katùpà kakesè cyanaànà *apa* ne kakesè *pàapa*, kàdi kucilekela. Yèyè udi ne díbà dyàbùngì, pa nàнку ùdi ùnyeemakana kakesè wàtwà *apa* ne kakesè wàbwela *emu* ne, katanci aka anyi, bantu bàkaadi bènda bàbwelamù ku ndambù ku ndambù. Cìvwa cifwànyine kwikala cyenzèkèle mukàji ncinyi, kale wàwa pàncìvwà mwànà wa balùme wa bidimu dikùmi ne bisambòmbò, bu yèyè mwà kwikala mupwèkè ne mùsèsù mùdiye wènza leelù ewu mu mmwènekelu wa mujì wa maja wa ùvùlù bilàmbà ewu? Mòna's, s'bàvwa mwà kwikala bamwele mu bùlokò. Èè, piikalàbi ne bìvwa bibì musangu awu, s'mbibì mpindyewu. Nwamònu anyi? Kàdi, nudi numòna's, Sàtaanà wàkabanga ànu kukòsa jipè ayi, ne kwenda kuyiipidija, ne—ne nebyènzèkè ne nekwikalè muntu kampànda wìkala mwà kulongolola kakesè kapite màyò anyi bikinì, anyi munùdi nubìikila cintu aci amu, kashààle kabèjì kàà mfigì. Nwikalàayi bavùluke! Ncyà bushùwà ne, necyàlukilè mene buludì cyànyimà. Nènku cidi, ki cidiku ciine patùdi twakula mpindyewu apa.

⁵⁴ Nènku mpindyewu tudi tusangana ne, bintu byònsò abi mbwalu bantu bàdi bàteeta bwà kupeta busàmbi. Bàdi bàteeta bwà kupeta cintu kampànda cìdibo. . . Nènku vùlukàayi ne, busàmbi bwènù nntèdelelelu wènù awu, ne nudi nuvwija bintu abi ntèdelelelu wènù. Nwamònu anyi? Mbyà luse be pa kujingulula ne lufù ndulààle kumpàla kwèbè aku mene. Nwamònu anyi? Mmu mùshindù wà ne, byònsò ebi bikaadi byenzèkè mu mùshindù wà ne bikaadi byenzè bu ne kí nkushààlekù ci—cishimikidi kampànda cyà cishindàme mu ditunga bwà kwibakilapù cintu nànsha cimwè to.

⁵⁵ Ngànji nnùkonkèku cintu kampànda. Kwèna mwà kwitabuuja cintu nànsha cimwè to, mbikolè, pa kuumusha ànu Bible. Twètù tucidi ànu ne Kilistò; twasàkidila kùdi Nzambì.

Nwamònu anyì? Wèwè—wèwè kwèna mwà kwitabuuja cintu nànsha cimwè to. Udi uya pa... Cileejilu, paùdi ukàngula ntèlèviziyò wèbè awu apu (nwènù bàtù ne cyà nàнку awu abu), nènku paùdi ukàngula ntèlèviziyò wèbè awu ne umòna—madiswishà à bungèndàmùshìngà, èè, muntu yèyè muteete bwà kwikala ne mwoyi ku cyà pa lukàmà cimwè cyà madiswishà awu, s'udi mufwànyine kufwà mu lumingu lumwèpelè. Nwamònu's, kwènaku mufwànyine kucyènta to. Nènku cintu ciinè kùkalà kùmpànyì kampàndà mwà kunyangakaja, bu cintu cyenza, ne kwamba ne: “*Cikampànda* eci ki cintu, kàdi kànwàngaci *cikansanga* eci to,” kàdi pèndè kùmpànyì umwèumwè awu mwikàle usùmbisha cintu cimwècimwè aci. Pashìishe didiswishà dikwàbò nedilwe, ne angàta *cikampànda* ku elu luseke kàdi kwàngaci *cikansanga* to, kàdi pèndè ànu kùmpànyì umwèumwè awu. Beena Àmèrikè bàdi bàkuupuka ku ciinè cintu cyà mùshindù awu aci, mu mùshindù wa ne cintu cyònsò mu kaabujimà cikaadi cilwe cibolè, mu mùshindù wà kakùciyi ditèkemenà to nànsha dikesè. Muntu nànsha umwe kí mmumanyè cyà kwitabuuja ciinè to. Kàdi mèmè nèngiikalè mwà kunwambila paanyimà pàà katanci cyà kwitabuuja, panwikalà baswè busàmbi, bu Mukalenge mwà kwanyisha.

⁵⁶ Bantu, bàdi bàshima, biibila, biiba, mu mùshindù wà ne bìdi byàmba kukukèngèla bwà kwikala ne mukàndà wà lupetu wà dikùbiibwa bwà kusombakù ndola yètù yìtaanu eyi kùdi muntu kampànda. Cìdi... Nudi bamanye's, Bible ùdi wàmba ne, ne kakwàkwikala dinanga nànsha dikesè to mu matùkù à ndekeelu pa kuumusha ànu munkaci mwà basungula. Ncyà bushùwà. Mifùndu yìdi yàmba nàнку, ne mulùme neàpangakananganè ne mukàjèndè, ne mukàji neàpangakananganè ne bàyèndè, bàna bàpangakagana ne baledi. Ànu munkaci mwà Basungula bàà Mukalenge ki mwikalàku mushààle dinanga kampànda.

⁵⁷ Èkèleeziyà mmikabwelè mu cintu cimwècimwè aci mu nsòmbelu wa ne bantu. Mbacìbwèjè mu èkèleeziyà, nsòmbelu wabò wa ne bantu awu ne bìdiidi byàbò ne bintu byàbò bikwàbò abi, mu mùshindù wà ne mbafikishe èkèleeziyà mu cibwejàkàji cyà kàciyi ùmánya cyà dyanza to. Mbabwejè cìdiidi mu èkèleeziyà. Mbabwejè kàbìdi nsòmbelu wa ne bantu, nsòmbelu wabò wa ne bantu mu èkèleeziyà, midimu yàbò yà ne bantu, twatà twà bingo anyi manàyi à mubèlà, anyi mwònsò mùdìbo bàcibiikila amu, ne byà didyà dyà dilòlò ne maja ebi, ne bikwàbò, mu nzùbu wa Mukalenge. Mòna's, bìdi—bìdi byènta luse's.

Bàdi bàmba ne: “Èè, mpindyewu, aci kacýèna, aci's mmu cibambalu cyà ku luseke.”

⁵⁸ Vùlukàayi ne, mùvwa mmu cibambalu cyà ku luseke mwàkatuucilà Yesù ba—bangèndàmùshìngà kubàpàtula pambèlù ne màshàndwishì abò awu, ne kwamba ne: “Bàakafùnda ne: ‘Nzùbu wa Taatù Wanyì ùtu mwenjiibwe nzùbu

wa Disambila, kàdi nwènú nudi bamuvwijè cisòmbedi cyà bìvì.” Nwamònu anyi? Mbibi, nànsha ciikàle mwaba kaayi. Pàcidi ànu èkèleeziyà . . . Èkèleeziyà kèna nangànangà ànu citanda to, mbantu bàdì mu citanda aci. Nènku piikalà bantu abu bàdìtwa mu cyòci eci, mona’s, s’mbibi. Nènku bòbò mbàdì batwàle cyenzedi aci.

⁵⁹ Mpindyewu tudi tujandula ne maèkèleeziyà, pàawù, àdi misangu yònsò ànu àlaya cintu kampànda, bu mùdi ntèlèviziyò ne bikwàbò, mu mùshindù wà kabàciyiku mwà kufika ku—ku cintu cyàkalayàbo aci to. Ànu múnkàadi mwambàmbe, dìyì kampànda dyà kale ne: “Muntu útu misangu yònsò ànu ùtùmbisha Nzambì bwà cyàkenzàYe, ùtùmbisha Nzambì bwà cyènzàYe (ùtèkemena cyènzàYe), ne pashiishe ùlèngulula cidìYe munkaci mwà kwenza.” Nwamònu’s, bàdi—bàdi—bàdi bàpangila. Nènku mùshindù awu ngùdìbo bàshàala bwalubulonda paanyimà pàà mutanci, bwà cidi cyonèke, nwamònu’s, bwalu bàdi bàpangila kukujingulula mpindyewu! Wèwè udi mwà kwakula bwà busàmbi bwàkafilà Kilistò misangu kampànda, ne kwamba bwà busàmbi bwàfilàYe mu bikondo bicilwalwà, kàdi ubènga busàmbi bùdìYe naabù kaaba aka mpindyewu bwèbè wèwè. Nwamònu anyi? Pa nshindameenu umwèpelè awu mpatùdi tucisangeena. Èè, s’ncilwè cintu cinène. Mpindyewu jandùlaayi ne bòbò—bòbò bàdi bàlwa . . .

⁶⁰ Aci mene ncilwè too ne mu Mpenta, mu maèkèleeziyà. Mbibwelè mu cipaapu cyà beena Mpenta, mu mùshindù wa ne bàdi misangu yònsò ànu bàlaya cintu kampànda cidìbo kabàyikù bàkafika to. Bidi misangu yònsò ànu ne muntu yònsò ùdi ne disaluka dishiilàngàne, kàdi—kàdi bàcyenza nànsha ciikale cyà mu Mifundu anyi to, kàdi bòbò bàdi bàlaya cintu kampànda cidìbo kabàyikù bàkafikakù to, mu mùshindù wà ne mbikafikè ku ne kabyèna bimwèka ne mbyà meeji matòòkè nànsha makesè to. Ba—bantu kabèènakù bàpweka too ne mu ndòndò wa meeji matòòke awu to. Ncijimije . . . Mwakù mene wà mu Anglais wà meeji matòòke mmujimije mushinga wàwù—wàwù kùdì bantu. Anyi, ku mùshindù wà—wà nsòmbelu udi nendè bantu, wùkaadi mujimije meeji awù matòòke kùdìbo. Mpindyewu kabyèna bimwèka bu ne bàdi bùmvwà to.

⁶¹ Nànsha mene too ne ku dyètù ditonda’s! Mpindyewu, ndi muswè bwà nwènú bàdi bàlwa abu, anyi apa ne biikàle bakwàte . . . anyi pa mukàbà wà—wà mèyì, Ndi muswè nutèelejè ne ntèmà yònsò mpindyewu dìyì dyamba edi bwà katanci kakesè. Didi—didi . . .

⁶² Ambà ànu wèwè ne meeji matòòkè à mu ndòndò! Kàdi kwèna mwà kwikala ne meeji matòòke paùdi kùyi umvwà mu mùshindù mujaalàme to. Wèwè udìcinkila, anyi ubùka, anyi utèkemena ne bìdi nàнку, díbà adi kakwèna mwà kwikala ndòndò yà meeji matòòke yìdì Nzambì ùlòmba to. Cìdi, diitabuuja, kí “nditèkemena nàнку to” anyi ne “ncifwànyine kwikala

cijaalame” to. bikèngela kakùyi mpatà to ciikalè “Amen!” Cìdi nkàmisha webè. Ki—ki—ki cyèbè—ki cyèbè cyezemenu. Ncintu cyùdi muswikiibwekù. Nwamònu anyi? Udi mufikè ku nkàmisha webè, wa ne “Cìdi Bulelèlà ne kùdi... Kî ncìngà cintu to ànu bulelèlà, ne Cìdi ne cyà kwikala nànkù!” Nènku díbà adi paùdi ufika ku djingulula aci mu meeji èbè, díbà adi bìdi bikukèngela bwà kuseemenaKù ne mwoyi wèbè mujimà, musùukà, mubidi, byònsò bìdi munda mwèbè, kulekelelakù ànu byònsò. Mùvwà Yesù mutùlongeshe ne ngàsà yònsò mu muntu uvwa usùmba mabwe à mushinga mukolè awu, ne kusanganayè Dyà mushinga munène adi ne kusùmbishayè makwàbò èndè ònsò bwà kupeta Dyòdi adi. Malelèlà ònsò ne byònsò bivwàye naabi, nànsha mùvwàwu mabwe mimpè à busàngà, yèyè—yèyè... edi Dyòdi dìvwa ne mushinga wàbùngi bwèndè yèyè. Nènku paùdi upeta Nkàmisha wa Nzambi, Dìyi Dyèndè, mulayi pa cintu kampànda, udi ne cyà kumanya dyàkèbedi ne n’Dìyi dyà Nzambi, bwà ne cintu cyùdi umòna munkacì mwà kwenjiibwa aci n’Nzambi. Kakwèna—kakwènakù—kakwènakù byà ne “pàmwàpa, ncifwànyine kwikala, mbimwèke ne mbifwànyine kwikala nànkù” to. “N’Nzambi!” Pashiishe paùdi ukafika pa kaaba aku, díbà adi ki Dibwe dyà mushinga munène ndyòdi adi, udi ne cyà kuya kule ne cintu kanà cyònsò cìdi muntu mukwàbò yònsò ùkwambila ciikalè cibèngàngàne naaCì. Kwèna ne cyà kweyemena cikaadi muntu mukumbàje to. Udi ne cyà kweyemena cìdi Nzambi mwambè ne cìdiYe mulayè, ne kuMumòna ucyènza, díbà adi ki webè Nkàmisha nyèyè awu mwaba awu mene. Nènku díbà adi cyònsò cyùdi, cyònsò cyùvwà, cyònsò cyùdi utèkemena bwà kwikala aci, cìdi ne cyà kutèekiibwa pa Cyòci eci ànu bu ne cìvwa ndufù ne mwoyi bwèbè wèwè pa díbà adi.

⁶³ Ngeela meeji ne cimwè cyà ku bintu bìdi bìpangishà bantu bèètù bwà kwondopiibwabò ndipanga dyà ditonda, ndipanga dyà ditonda dyà meeji matòòke. Mpindyewu, cileejilu, eci ncifwànyine kuumvwika cìbi ndambù, kàdi ncyèna ne meeji à kucyàmba mu mùshindù ewu to. Kàdi, pàndi ntàngila mukàjàànyì musòmbe mwab’ewu. Bu mémè mwà kupàtuka apa leelù ewu kuya keela mukàji kampànda mukwàbò mabòkò ku nshìngù ne kwenza nendè mananga, díbà adi’s ndi mufwànyine kumanya, paanyimà pàà mémè mumanè kwenza cyòci aci ne, ndi mupiilè, mupiilè ànu menemene. Mpindyewu, mu bushùwà bwà bwalu, Musàmbi wanyì mmufwànyine kundama bwà ncyènji cyòci aci to. Nwamònu anyi? Nwamònu anyi? Kàdi ndi muswè kwamba ne mémè—mémè mwenzè nànkù, ne mémè... byòbì byenzèke ne ndi mucyènzè anyì cintu cyà cifwàngàngàne naaci. Nènku díbà adi ndi mumanyè ne cintu cyà kumpàlà ncyà kwambila mukàjàànyì, kumpàlà kwà mémè kwambila Nzambi ne, “mfwilèku luse,” bwalu yèyè ngùndi mwenzèle mpèkaatù awu. Wèwè mulwè ku cyoshelu ne kuvùluka ne udi ne bwalu, anji ndààku ùkalongòlòlè bwalu abu, kumpàlà kwà kulàmbula

mulàmbù wèbè awu. Pa nàнку bikèngea nye kùdiye. Ndi ngiitabuujja ne mu ditonda mùdi kàbìdi dyakaja dyà maalu. Kí nditonda dilelèlèlà pàdìdi kadìyi nàнку nànsha.

⁶⁴ Ambàbi tǔng bu mèmè mwà kwamba mpindyewu ne: “Nènye kacitonda ne, ndi mwenzè bibì, ngàmbe ne: ‘Mukalenge mwímpè, Éyi Mulundà wanyì, Wèwè’s udi mumanyè ne ndi muKumanyè bímpè menemene. Nzambì àtumbè! Àlèluuyàh! Ndi—ndi—ndi—ndi ngeela meeji ne Udi Muntu mwímpè wa kale. Mfwilèku luse. Udi mumanyè’s, Mulundà wa kale, wa kale, nci—ncivwa ne meeji à kucyènza nàнку to’”? Nwamònu anyi?

⁶⁵ Mpindyewu, wèwè udi wamba ne: “Aci’s nkunyangakaja kwà cijila.” Mmwómo. Kwenza ditonda dyà mùshindù awu’s, mmwómo.

⁶⁶ Ambà tǔng bu mèmè mwà kuya kwamba ne: “Mukalenge, nci—ncivwa ne meeji à kucyènza mùshindù awu to, kàdi Wèwè nkwaçishèku nènku ncyàkucyènza kàbìdi to”? Yèyè neàbengè mulàmbù wànyì pàndì nciyi mwanjì kuya kacìlongolola dyàmbedi ne mukàjàànyì.

⁶⁷ Dìbà adi ambàbi tǔng bu mèmè mwà kulwa kùdiye ne dipanga dimwèdimwè dyà kaneemu adi, ngàmbe ne: “Ambà tǔng, mukàjàànà, mulundà wanyì wa kale, maamù mukolè wa bàna bàànyì, munanga wanyì wa kale, udi mumanyè ne tudi balundà kùkaadi mukùngùlù mule. Ambà tǔng, bìshi bu mèmè mwà kwela mukàji mukwàbò mabòkò ku nshingù? Ne wèwè mwinè udi wamba bìshi bwà aci, mwànà wetù, udikù mufwànyine kumfwìla luse anyi?”

⁶⁸ S’ndi ndifwànyikijila mmmwènekeli udiyè mufwànyine kwikala nendè. Mmufwànyine kudyàmbedi ne: “Mbwalu kaayi bùdi bwenzèkèle bàyaanyi ewu?” Nwamònu anyi? Mpindyewu, cyà kumpàla, kí mmufwànyine kumanya ne mbilèlè ngeela anyi kí mbyòbi to.

⁶⁹ Nènku kwèna uya mùshindù awu bwà kwenza ditonda kùdi muntu neebè anyi kùdi Nzambì to. Udi uya ne meeji matòòke à mu ndòndò, ne dibungama dyà difwànà dyà Nzambì dyà mpèkaatù webè. Dyàmbedi, udi ne cyà kwikala ne kanyinganyinga. Ndi ne cyà kumwambila ne: “Munanga wanyì, vwilàbi apa, cidì mwà kwikala ndekeelu wa nsòmbelu wetù wa mu dibàkà. Mukàji ùndi nsòmba nendè, ki yèyè munanga wanyì, ne mùshindù mwinè wúnkaadi mukunangè bidimu byònsò ebi. Kàdi mpindyewu udi mwà kunshiya, kuumukila ànu ku cyòci eci, udi mwà kubènga bwà kushààla naanyi, udi mwà kubènga bwà kungiiitaba. Ne mèmè ndi mumanyè nàнку. Kàdi nànsha nàнку, bwà kucìlongolola, bikèngela ndyàkàjè.” Bikèngela mmmwambilè ne ndòndò wa mwoyi wànyì.

⁷⁰ Pashiishe bikèngela ngàmbe Nzambì mùshindù wùmèwùmè awu. Ne ndi mbàmbila bònsò yèyè ne Nzambì, ne meeji matòòke ónsò ne, ncyàdyàkucyènzakù kàbìdi to, ku

ngàsà wa Nzambi. Nwamònu anyi? Mu bulelèlèlà kwènà ànu . . . Mpindyewu, ndi mufwànyine kumukutàkaja bwà kuciitabayè, ne yêyè (nwamònu anyi?) kayi ùcìmona to. Pàmwă muyiiki wànyì nendè mmufwànyine—mmufwànyine kumutwisha, kàdi muyiiki wànyì kawàkutwisha Nzambi to. Yêyè ùdi ùtàngila munda mwà mwoyi wànyì ne mMumanyè. Ne ndekeelu wa byònsò, ànu ndambù mukèsè kàbìdì wa bidimu pàmwè nendè, bu Nzambi mwà kwanyisha, ne netùùmushiibwè pa buloba ebu. Kàdi ne Nzambi, n'Cyendèlèlèlè, pa nàнку ndi ne cyà kwikala ne meeji matòòkè à mu ndòndò ne Nzambi. Nènku dîbà adi mêmè ne meeji matòòke, Yêyè neàngumvwilè. Kàdi mêmè nciyi ne meeji matòòke to, kabyèna bikèngela bwà mêmè kujimijila Nzambi dîbà bwà kuntèèlejaYè nànsha.

⁷¹ Nènku ki kùkààdìbì bikafikè leelù ewu, munkaci mwà bantu, kakwèna kumwèka bu ne kùdi ndòndò wa meeji matòòke uvwa—uvwa ukèngela kwikalabò nendè awu to.

⁷² Ne ndi ngeea meeji ne mulùmè anyi mukàjì udi ulwa bwà kumusambidilabò, bivwa bikèngela kwanjiyè kutonda byònsò bidiyè mwenzè, ne kulongolola bintu byònsò. Bwalu, nudi numòna's, nutu numòna misangu yàbùngì pa cibùmbà cyà ku cyambilu apa, nutu numòna, nutàngila numòna ne ntoo ne penyì pàtù EMU MMÛDÌ MUKALENGE WÀMBA ùkafika. Nwamònu anyi? Nwamònu anyi? Bantu, cikèèna—kumòna necivwijiibwe cyà bàlenga, mu bushùwà bwà bwalu, ne diitabuuja dyàbò, Nzambi ngutu mulayè aci ku dipà. Kàdi dyondopa ncintu cyà cishiilàngàne, nwamònu's; Nzambi ùdi ùcijingulula dîbà adi, nwamònu's.

⁷³ Mpindyewu, tudi tumòna ne, mbwena kwamba ne, bantu bàdì bènza ditonda dyàbò, bikèngela bàlwe ne ndòndò wa meeji matòòkè. Ndi mwaba ewu ne, ncyèna ne dîbà dyà kucibala to, kàdi mmu Binghamton, mu New York, ngeela meeji. Anyi, ndi mutùpàkane? Èyowà, Binghamton, ngeela meeji ne mmwòmò. Mwaba wùdi Kumpànyì wa Bisàbaatà wa Endicott ùsanganyiiibwa awu. Binghamton, ngeela meeji bàdi bawùbiikila ne m'Binghamton, Binghamton, mmmwòmò, mu New York. Tuvwa kuntwaku mu mwaba wà bisàbaatà wà mu Endicott-Johnson, dibalaasà dinène, nènku tuvwa twenzelamù disangisha. Nènku dindà kampànda, Billy Paul ùvwa ku mushikù wùvwà mulondèle wànyì mêmè, kùvwa mashikà à makolè, mpeepèlè yituuata. Nènku mêmè kusangana, munkaci mwà bantu, dipàngila dyà meeji matòòke, mùvwàbì bìmwèka's. Ki mêmè—mêmè kudìkonka ne mbwà cinyi. Mwab'ewu pàvwà muntu kampànda wàkondopiibwa, bwà bwalu bwà, anyi muntu umwèpelè pàà—pàà nkàâyendè ùndi ngàmba. Muntu awu uvwa ne lutatu lunène, ne yêyè kwondopiibwa dilòlò edi mwimane mwaba awu. Nènku kumpàla kwà twètù kuumuka, matùkù àtaanu, lutàtù alu kumwalukidilalù cyàkàbìdì. Nwamònu anyi? Mbwalu, mu Bwikadi bwà Nyumà Mwîmpè, Wakamuumushalù. Ànu

mwéñzèdìYe mukàjì mutekète ewu kùkaadi katanci mu lubànzà emu, nsongàalumè awu dilòlò dishàale, nwamònu's. Kàdi kùdi ne cyà kwikala meeji matòòke à mu ndòndò bwà kumanya ne Nzambì udi mwà kukuumushaci mpindyewu awu, ne dilaabiibwa òm̀wèdìmwè adi pambidi pèèbè, ùdi mwà kucilama kule neebà. Nwamònu anyi? Ki pashìishe Nyumà Mwimpè kwakula naanyi dindà kampànda, kwìsù kùkaavwa kwàm̀ba kutòòka, wàm̀ba ne: “Bànda pa cibùm̀ba cyà ku cyambu anyi mwaba kampànda, ne ambilà bantu aba bàbandèpu ne ubàfikishe ku ditonda dyà bintu byònsò bìdibo benzè, kumpàla kwà wèwè kubàsambidila.” Nwamònu anyi? Ndòndò wa meeji matòòke's!

⁷⁴ Bàa pa buloba bóbò kabàyi banyingàlale to, bàdi ne cyà kubùtuka. Nwamònu anyi? Ne ditonda ki didì bàa pa buloba bàkèngela leelù ewu, nditonda dyà meeji matòòke.

⁷⁵ Bidi bu mùdi bwanga bwà disaamà. Twètù bònsò tùdi mwà kubala pa kàlangì ne mmùshindù kaayi wà bwanga ne disaamà didibu—didibu ne cyà kwondopa. Kàdi, nudi bamanyè's, dibala byà dyenza, nèndyangatè bu dyà Bible, bilongelu byètù ne maasèminèrè bàdi mwà kubala Dìyì dyònsò. Kàdi, nudi bamanyè's, ànu kubala kwà byà dyenza ne mwà kubùnwa, kí—kí ncidi cyòndopà disaamà to. Nwamònu anyi? Cidi—cidi ne bwanga, pa nàнку budi ne cyà kwangaciibwa! Pa nàнку muntu ùdi mwà kwamba ne: “Mémè ndi mwena—mwena tèòlòjì. Mpindyewu, kwàkulu naanyi to, ndi—ndi—ndi... pa cikampànda, mémè ndi mumanyè Mifundù. Ndi—ndi mumanyè ne Bible ùdi wàm̀ba cikampànda ne cikansanga, *ne*.”

⁷⁶ “Ewu udi umvwa Dìyì Dyànyì,” Yone Munsantu 5.24, cileejilu. “Ewu udi umvwa Méyì Àanyi ne witabuuja Ewu wàkaNtùma, ùdi ne Mwoyi wà Cyendèlèlèlè.” Anyi, Roi Jacques ùdi ucifunda ne “wà kashidi,” mbwena kwamba ne “wà Cyendèlèlèlè,” mùdici mu cyòci. “Ùdi ne Mwoyi wà Cyendèlèlèlè bwalu witàbùùji.” Bantu bàabùngi batu bàmba mùdibo biitabùùje. Mpindyewu, aci ncilelèlè. Mufundù awu—awu—awu mmujaalame. Ndi—ndi mbala Kabèji kàà—kàà bwanga, ndi mbala cidi Kabèji kàà bwanga, ne Ncìpajamulungu bwà mpèkaatù wanyì, kàdi ndi mwà kuBùnwa anyi? Ndi mwà kwitabuuja anyi? Ndi mufwànyine kwamba ne “ndi mwitàbùùje,” kàdi ndi mwitàbùùje bulelèlè anyi? Ki cintu cidi cìlondà ncyòci aci. Ànu kuCibala cyanàànà ne kumanya byà dyenza, kí ncidi cyòndopà disaamà to. Lutàtù lùdi ne (mu bwètù bwalu ebu) katwèna baswè kunwà cidi Bwanga bwàm̀ba bwà kunwà to. Tudi ne Bwanga abu, kàdi katùyì baswè kuBùnwa to. Tudi twamba ne tudi tunwà, bwalu tudi mwà kuCibala; kàdi bwà kuBùnwa mu bulelèlè, katwèna tunwà to. Nwamònu's, Èvànjeeliyò ùdi mùshindù wùm̀wèwùm̀wè awu, bwanga, mu ebu bwalu. Pìikalà mubèèdi... Ne bwanga abu mbujaadikiibwe ne budi bwòndopa mubèèdi, ne mubèèdi ùdi ùbala byònsò bidi

bitàngilà di—dijandula dyà bwanga ebu, ne mumanyè kantu ne kantu kònsò kàà bwanga kàdi munda mwàbù, mumanyè dìnà dyònsò dyà—dyà mwena maalu à mamanya udi mujandùle bwanga kampànda ebu, bu mùdi cisàlù cyà Salk ne bikwàbò. Twètù—twètù bamanyè Díyi dyònsò pa Cyòci, kàdi tubènga bwà kuCyàngata, kaCyàkutwàmbulwishakù to. Nwamònu's, KaCyà—KaCyàkutwàmbulwishakù to.

⁷⁷ Kàdi, ne pashiishe mutùtù twamba ne: “Kàdi's tudi babùnwe!” Kàdi wèwè wamba ne udi mubùnwe, kàdi mubèèdi kàyi ùleeja bipeta, kàvwa mubùnwe to. Ki bwalu mbwabu. Mùshindù mwine, bu ne ntankù udi ku cimanu wàwa kàvwa ùya lubilu nàka, nwamònu's. Mvwa mwa kuswa kushààla apa ne kuya mu ndòndò menemene bwà bantu bèètù—bèètù, kacya Èvànjeeliyò wàshindikiiwba ku bintu ebi, kàdi bóbò bàdi bàlaka mukana bàmba mùdìbo baBùnwa, kàdi bàleeja ne kabèèna bàBùnwa to! Mmunyi mùdi muntu mwà kubala Mifundu pa kantu kakesè kàndi ngàmba aka, pa bìdi bitàngilà bakàji bàdi ne nsukì mibebula ne bavwàla tùpùtulù, ne bikwàbò byà bwena abi, mmunyi mùdìbo mwà kudibiikila ne mbeena Kilistò pàdi Bwanga Bwòbù bwinè bwena diina bwàmba ne mbishiilàngàne! Nwamònu anyi? Mmunyi? Wèwè udi wamba ne: “Kàdi's ndi mujè maja mu Nyumà, nkààdi mwakùle mu myakulu.” Aci kacýèna ne cìdici cyùmvwija to. Nsòmbelu webè wèwè mwine's ùdi ùjaadika ne kwèna muBùnwe! Nwamònu anyi? Wambì mùdi—mùdi muBùnwe, kàdi kwèna muBùnwe to! Bwalu, wèwè ucìdi ànu ùleeja bileeji byònsò byà disaamà bìdi Bwanga abu ne cyà kwondopa. Ne Bwanga abu, bwa pa bìdi bitàngila Èvànjeeliyò, s'ùdi ndyondopa dishindikiiwba! Bùdi ne cyà kwikala nàku. Mpindyewu, nudi numòna's, bikèngela ùleejè bipeta.

⁷⁸ Angàtà muntu kampànda udi wamba ne ùdi: “Ndi. Ndi mwena kwitabuuja. Ndi ngiitabuuja.” Bukènkè bwà Èvànjeeliyò bùdìdingè ànu bùmùlèngè, mwanèètù, yèyè's ùdi ùBwàngata ànu mpindyewu mene! Ne yèyè neàleejè bipeta. Cyà bushùwà's. Kwàkumònakù cyàkàbìdi muntu awu mu nzùbù yà manàyi à billards to, kwàkumumònakù pambèlù apa ne mucì wà mfwankà mu cyanza to, kwàkumumònakù ùnwa maalà to. Kaa, to. Kwàkumumònakù ùnàya nè bakàji bakwàbò to. To, to, to. Nànsha balekèlèle mibidi yàbò yà bukàji ayi kumpàla kwèndè bishi, yèyè neàkudimunè mpàla àmutàngijè mu maulu kùdi Kilistò. Ncinyi aci? Cìdi cileeja ne Bwanga mbufile bipeta. Ne Bwòbù kabùyì bufile bipeta to, wèwè udi wamba ne: “Èè, ndi mumanyè ne ndi muBùnwe,” èè, pashiishe udi penyì leelù ewu dîbà adi? S'udi munkaci mwà kupùnga ne lufù. S'ki mùdi ùleeja! Ndi nkutàngila pàndi njandula disaamà dyèbè, ku—ku Bible ne, wèwè ucìdi ànu mu mpèkaatù. Ne difutu dyà mpèkaatù s'ndufù. Ncyena ngeela meeji ne bìdi bikèngela bwà citàmbè kutòkeshiibwa to. Wamònu's, byenzi byèbè sungasunga's bìdi bishindika, byenzi byèbè sungasunga's bìdi bishindika

ne kwèna muBùnwe. Uvwa *udyàmbidila* múvwà muBùnwe. Amen. Udi—udi mufwànyine kwikala ne meeji matòòke ònsò mu dicyènza, kàdi kwènà munwè to! Bwalu, wèwè munwè, Nzambi mmulayè ne Bùvwa mwà kufila bipeta pa wèwè. Ne mpèkaatù wa kale awu ùcidi ànukù, ngiikàdilù wa kale wa Adàmà awu ùcidi ànu mutùngùnùke ne kwikalakù, bupidyà bwà kale abu. Cibì udi uteeta bwà kudyènza wèwè mwinè, ku mèsù kwà muntu neebè, wamba ne: “Èè, ndi mwena kwitabuuja. Kaa, butùmbi kùdi Nzambi’s wè! Èyowà, ndi mwena kwitabuuja.” Kàdi, udi umòna’s, kí mBukwambùlwishekù to nànsha kakesè.

⁷⁹ Pàmwápa mubèèdi yèyè mwinè awu kàvwa nànsha mudyànjila kulongolola ku—ku Bwanga abu to. Byòbì nànkù, kaBwàkufilakù bipeta to. Ncyà bushùwà. Nudi numòna anyi?

⁸⁰ Kàdi tàngilàayi mukàjì mukesè wa nsòmbelu wa masandi awu pàakamulengà Bukènkè abu, kùvvwa cintu kampànda citèèkùbwe mwaba awu bwà kucyùkaci ngiikàdilù wendè. Nwamònu anyi? Twètù twitabuuja ne tutonda ne meeji matòòke, Bwanga bwà njila wa Nzambi ebu bùdi bufila bipeta. Nzambi ùdi ne njila mulongolola bwà maalu aa.

⁸¹ Mpindyewu, nwamònu’s, muntu neàye, wàmba ne: “Èè, mèmè nkàadi mukashàale wa mu èkèleeziyà. Bwànyì mèmè aci ncikòse bwalu.” Awu kí njila mulongolola wà Nzambi to.

⁸² Njila mulongolola wa Nzambi n’kanyinganyinga, ditonda, ne mwikàle ùleeja bipeta, ùkwàma mamuma àkùmbanangana ne kanyinganyinga, àleeja meeji matòòke. Bu nwènù aba mwà kwenzakù ànu nànkù mu dindà emu, nwènù bìikalàbò mwà kusambidila abu, ne nwènù bàdi batèeleja mukàbà wà mèyi ewu abu, pa buloba bujimà, nènku paanyimà pàa mukàbà wà mèyi ewu mumanè kwediibwa, ne mwambi anyi muntu udi uwèla mu disangisha, tusùmbù tudi mwitu anyi nì mpenyi pònsò panùdi nusanganyibwa apu, udi wela mukàbà wà mèyi awu, neànji kunwènzeja ditonda dyà ditòòke tòò, nènku *pashùshe* nùlwe kanùyikù ne kantu nànsha kàmwè mu mwoyi wènù to, ànu diitabuuja, bwà bànùsambìdilè, kùdi, Bwanga nebùpetè kaaba.

⁸³ Yesù wàkamba ne: “Nyingàlàlaayi, yònsò wa kunùdi!” Ndi nswà kwamba ne Peetèlò ngwàkamba mu Ditùkù dyà Mpenta, “Nyingàlàlaayi, nùbatijiibwè mu Dìnà dyà Yesù Kilistò bwà dilekelediibwa dyà mpèkaatù yènù, nènku nenùpetè kupà kwà Nyumà Mwimpè.” Pàùdi unyingalala mu kaabujimà ne witabuuja Mukalenge, ne ubàtijiibwa mu Dìnà dyà Yesù Kilistò, udi uvwija Nzambi mwena mashimi wèwè kùyì mupetè Nyumà Mwimpè to. Piikalàbi ne... Yesù wàkamba eci, mudimu wà ndekeelu mutùma naawù èkèleeziyà Wendè ne: “Bimanyinu ebi nebifilè aba bàdi bìitabuuja. Bòbò batentèkèle babèèdi byanza, babèèdi nebàsangalè.” Nènku wèwè kumòna bimanyinu abi bifila mwena kwitabuuja, ne usemena ne mwena kwitabuuja awu ùkutentekela byanza, kàdi cintu nànsha cimwe kaciyi

cyenzèke to, díbà adi kùdi katanyì mu diitabuuja dyèbè amu. Nwamònu anyi? “Mwena kwitabuuja!” Nzambi ngwàkalaya njila mulongolola.

⁸⁴ Tudi tuteeta kupeta busàmbi pa kwamba ne: “Kabyèna bikèngela bwà mèmè kutèèleja to.” To, aci ncilelèlè, kabyèna bikèngela bwà wèwè kutèèleja to.

⁸⁵ Kàdi wèwè mulongolwela Mwoyi wà Cyendèlèlè, nèuCitèèlèjè ne nèuCisànkilè. Cidi Busàmbi bwèbè. Ncintu cyúvwa mujingèjinge matùkù èbè wònsò à mwoyi. Cidi—Cidi Dibwe dyà busàngà adi, dyà ne, udi—udi witaba bwà kulekela byònsò. Nwamònu anyi? Udi muDiswe bwalu udi mumanýè ne ndicyùka dyà Nzambi dyà dinanga bwèbè wèwè. Ncintu kampànda bwà kujikija cilumbù cyà mpèkaatù, kujikija bupidyà, kujikija byònsò, bwèbè wèwè, pawìkalà muDiswe. Ng’ewu udi usaama bikolè ne mumanyè ne ùdi ùsaama awu, ki udi wenda ukèbangana ne ngàngàbukà. Nwamònu anyi? Kí ng’ewu udi kàyì ùsaama, udi nendè dijinga to, mwàkambà Yesù. Kàdi ng’aba bàdi bàsaamà. Wèwè mwà kujingulula ngiikàdìlù ùdi, díbà adi’s bìdi bikèngela bwà wènzè mùdiYe mwambè bwà kwenza amu. Díbà adi cidi ne cyà kwenzeka, bwà cyanààna Nzambi mmwambè cintu cyà mafi. Nwamònu anyi?

⁸⁶ Bantu bààbùngì menemene misangu mikwàbò, masangisha à dyondopa, kanùtu nubangila ku ntàkù wa bwalu to. Bikèngela wikalè ne nsòmbelu musukula, bikèngela wikalè mu ngiikàdìlù, bikèngela wàmbè ànu mu bulelèlè ne: “Èyo, ndi nCìitabuuja,” ne bikèngela bwà aci cìfuminè munda mwà mwoyi wèbè. Díbà adi wèwè, kabyèna bikèngela bwà muntu nànsha umwe kukusengeleelayè to, wàmba ne: “Mpindyewu, kaa, mwanèètù wa balùmè munanga, mwanèètù wa bakàjì munanga, bìvwa bikèngela bwà wèwè kwenza *cikampànda*, bìvwa bikèngela bwà wèwè kwenza *cikansanga*.” Wèwè udi mwena kwitabuuja, kakwèna cidi mwà kukunyèngàCì to. Cidi muntu mukwàbò kanà yònsò mwà kwamba nànsha cìikàle cinyi, busàmbi nànsha bwà bìshi, musàmbi nànsha wa bìshi, ngàngàbukà nànsha wa bìshi, lùpitaadi nànsha lwà bìshi, dijandula dyà disaamà kanà dyònsò nànsha difwànyìne kwamba cinyi, kwènà ànu uciitabuuja to. Wèwè udi ànu muCìmanyè! Kabyèna bikèngela bwà kwamba cintu cikwàbò nànsha cìmwè bwà Cyòci aci to, udi muCìmanyè! Mpindyewu, ki cintu cishùwashùwàle ncyòci aci.

⁸⁷ Tudi ne ditentula bùngì cyanààna mu bintu byònsò. Bìdi bikèngela bwà bìikalè mùshindù awu. Kùdyùmvù bibì pa bwalu abu to. Cidi ne cyà kwikalakù. Cìtu ànukù misangu yònsò ne necìikalè ànukù. Kàdi ndi nzwàmbila mu dindà emu cidi Bulelèlè ne maalu malelèlè. Tudi ku cikondo cyà ku nshìikidilu. Tudi ne cyà kwadija cintu eci pànshì ku Bulelèlè, nwamònu’s, nènku kwenza bwà cìmanyè cidi Bulelèlè.

⁸⁸ Mpindyewu tudi tusangana ne bantu kî mbaswè kwangata njila wa Nzambi pa bwalu abu to. Mbaswè, bôbò. . . Nzambi ùdi ne njila mulongolola bwà busàmbi bwèbè. Nzambi ùdi ne njila mulongolola bwà bintu byônsò ebi. Kàdi bantu kî mbaCiswe to, bantu bàdi bálonda njila mikwàbò. Ne musangu wônsò wùdìbo bàcyènza mu mùshindù mukwàbò kampànda pa kuumusha njila wa Nzambi, bàdi batwàla ciiji cicolè cyà Nzambi pambidi pààbò musangu wônsò wùdìbò bènza nàнку. Éyowà.

⁸⁹ Ne bintu byônsò bîngămbi ebi, bidi bitùfikisha ku eci nunku, bàà pa buloba, bônsò bàdi bálondà bikwàbò byenzedi byà bulòbò byà maalu à mamanya, bálonda byenzedi byà bulòbò byà èkèleeziyà, bálonda bintu bishùlèshùlàngàne mbitùfikishe ku nshìikidilu wa buloba. Tudi ku ndekeelu. Kî nkushààle ditèkemena nànsha òmwè to. Tudi bashààle katùyi ne ditèkemena dyà kupànduka. Katwèna ne mpungà wa kupàndukila nànsha umwe to. Mpindyewu ngănji ànu ncisùnsùlùlèku bwà tusunsa tukesè cyanààna, bwà nnùjaadikilèci.

⁹⁰ Nèku yônsò wa kunùdi, nudi nupeta, nwènu kanùyi nupeta to, bikèngela nùpetè cibèjibeji cyà maalu à dyondopangana, bikèngela nùpetè Reader's Digest, ne bikwàbò, munùdi nubala byenzedi byà bulòbò ebi. Mpindyewu bwà kwenza. . .

⁹¹ Mwambi kampànda mwaba ewu ùdi ùtuma Mukenji ewu pa buloba bujimà. Bwà kwamba dîyi bu nàнку, dyà ne katwèna ne ditèkemena, dyà ne tukàadi basambùke cikondo cyà bupikudi, dyà ne tukàadi basambùke mukàlù wà pankaci pàà bupikudi ne cilumbulwidi, mpindyewu ndi ne cyà kupèèsha disangisha mwaba kampànda wà kushindamijilapù dîyi dyamba edi. Kùdi ne cyà kwikala kabingilà kampànda kàdi muntu, yèyè ne meeji èndè mu wòwò mùndi ngeela meeji ne ki mùndi, mmufwànyine kupàtula dîyi bu nàнку awu, bwà kwambila ditungà dyèndè, bwà kwambila disangisha dyèndè, bwà kwambila bantu kwàyadi pa buloba bujimà mu matunga makùmi àsàtù anyi makùmi ànaayi, pàmwàpa, mu nyungulukilu wa buloba bujimà, ne bisàmbà ne myakulu ne, “tukàadi ku cikondo cyà nshìikidilu,” mbujitu butwimikila bwà kwamba dîyi anyi—anyi—anyi kucyùmvwijakù ndambù too ne mutùdi tupweka too ne ku mutù wètù wà mwandà wùdi ne mushinga bwà mu dindà emu.

⁹² Tàngilàayi, mpindyewu twánjàayibi kutàngila kùdi maalu à mamanya ne dilonga dyà tulaasà bikatùfikishe, aci's ki cintu mene cidi muntu mwitabe pamutù pàà Dîyi dyà Nzambi, dyanyisha dyà maalu àà mamanya. Ne bitu bikèngela ànu bwà maalu à mamanya kwikalawù misangu yônsò àlekela civwàwu mambè aci. Mvwa mbala mwab'ewu kùkaadi cikondo kampànda mwaba wùvwà mwena maalu à mamanya kampànda wa beena France mwambè, kùkaadi bidimu bitwè ku nkàmà yibidi, anyi nkàmà yisàtù ne: “Kunyùngùlùja ndundu pa buloba,” e

kwambayè ne, “bu ndundu ewu, mu lubilu elu. . . Bu ne bàà pa buloba bàkaadikù basokòlòle cintu cipyacìpyà cyà mùshindù kampànda cìdì cifwànyìne kubènzeja lwendu mu lubilu lwà kilòmèètà mitwè ku makùmi ànaayi ne mwandamukùlù ku dîbà dimwè, cintu cyà mùshindù awu, mu nyungulukilu wa buloba,” cìdiye ùshindika ku maalu à mamanya’s, “ku bujitu bwàcì ncifwànyìne kutùntùmuniyibwa kuumushiibwa pa buloba kùdì bukolè bwà dikòkangana dyà mibidi.” Nwamònu anyi? Mpindyewu, nudi nwela meeji ne maalu à mamanya mmafawànyìne kwalukila ku cyòcì aci anyi? Nànsha kakesè. Aci mmu matùkù àkaadi mamanè kupìta, bwàbò bòbò.

⁹³ Mpindyewu, twánjààyìbì ànu kwelangana meeji mpindyewu, tutu bònso baswè kwamba ne: “Ndi muswè kucijaadikila ku maalu à mamanya.” Aci ki cìdì màngumba búngì cyanàànà à beena ntèdeleelu àmba leelù ewu. Bòbò mbaswè cijaadiki cyà mu maalu à mamanya. Èè, mèmè’s ndi mufwànyìne kukùdimuna ndundu kàdì kwamba ne: “Njaadikilèbi ku maalu à mamanya, Nzambì mu disangisha dyènù amu. Njaadikilèbi cintu kanà cyònsò, bilondèshile maalu à mamanya, cìdì cyà bushùwà. Jaadikà. . .”

⁹⁴ Cìdì cyà bushùwà ncinyi? Mwoyi. Ndi muswè ùwùmpetèlèku wà musinga wà meeya makùmi abidì ne ataanu, anyi—anyi ndekèlè mpaanyishè byònsò bìndì naabì, bwà mpetè citùpà cyà mwoyì aci. Ne mwoyi ngwà cyà bushùwà anyi? Wòwò kawùyi wà cyà bushùwà to, twètù bònso tudi apa bwà cinyi?

⁹⁵ Mwoyi, diitabuuja, dinanga, disànka, ditalala, mwoyi mule, kalolo, bupòle, lutùulù, maalu à mamanya kaèna mwà kubilengakù to. Nènku ki cintu cìmwèpelè cyà bushùwà cìdiku, cìdì cishààla kashidi. Cilwilu cijimà cyà beena Kilstò cidi cìtàngila ku cìdì kaciyi cìmwèka ne mèsù. Kàdì byumvwilu kabyèna bijikulakù abi bintu to, kàdì’s bidikù. Ki bwà cinyi bìkèngela diitabuuja bwà kubiitabuuja, ne dìdì dìlela munda mwèbè cìdì diitabuuja dijìkùle ne cìdì mwaba awu. Dìdì dikutwàdilaci, dyondopa dyà kùdì Nzambì ne bikwàbò. Kabèèna mwà kujaadikilangana cìdì cyòndopà mu mùshindù wà Nzambì to, kàdì mbamanyè ne kùdì dyondopa dyà kùdì Nzambì. Ndi. . . Kabèèna mwà kujaadikilangana cìdì cìsùngilà ku mpèkaatù to, kàdì mbamanyè ne bantu bàtu bàsùngidiibwa ku mpèkaatù. Pa nàнку kacyèna mwà kujaadikiibwa bilondèshile maalu à mamanya to, kàdì cìdì bilondèshile maalu à mamanya mu mùshindù wà Nzambì wà dicitàngila.

⁹⁶ Mpindyewu, maalu à mamanya mmatùtwàdile cinyi? Mpindyewu, nudi mwà kupeta cikùminà bwà katancì kakesè cyanàànà. Maalu à mamanya mmatùtwàdile mabèèdi, lufù, ne màsaamà. Mpindyewu, mbanùlongèshe ànu cibadi cìmwèpelè cyà cimfwànyì aci. Kàdì kùdì bibadi bibidì byààcì. Wèwè udi wamba ne: “Maalu à mamanya mmenzè *cikampànda*, *cikansanga*, ne *cikankènga*.” Èè, netùkwitabè bwà dyèsè

adi. Kàdi twánjààyìbì kutàngila cibadi cikwàbò aci. Maalu à mamanya mmatùtwàdìle mabèèdi. Maalu à mamanya mmatùtwàdìle màsaamà, ne lufù.

⁹⁷ Tàngilààyì! Disopakaja dyà mu maalu à mamanya nditwàdìle lukòngo elu lufù, ku byàkudyà ne bikwàbò. Ndivwijè bantu batekètàngàne bikolè ne bikwàbò mu mùshindù wà—wà ne balùmè ne bakàjì ncmòtù cyà buloba, nènku kamwèna—kamwèna—kamwèna nsànjinsànji mwómò amu to. Mbashààle mushikì wà bintu bitekètàngàne. Kabèèna mwà kwikala ne mwoyi kakùyì cìfidi cyà citaleela to, bàdi bàfwa. Kabèèna mwà kunàya manàyi à baseball to, umwe wa kùdibò yèyè mutuucike mwaba kampànda, cìdi cimushipa, mu cyalù cyà dituutangana dyà mànkòmò ne bikwàbò kàbidi. Nènku mbatàmbe kuteketangana mu mùshindù wà ne balùmè ne bakàjì, èè, bìdi bìbànyangkakaja.

⁹⁸ Nènku bàdi bàtwa ngombe nshìngì yà bintu bisopakaja ebi bìdi bikabwelè mu bukwa—bantu patùdi twakulangana apa, bilondèshìle maalu à mamanya ôwò miinè, ne cìdi cìbàvwija banyangkakaja. Bwalu, pàdi ngo—ngombe musopakaja, anyì cyàkudyà kanà cyònsò eci cisopakaja, cyàkudyà aci cìdi cyènza kabùlù kàà mashi, ne kabùlù kàà mashi aku ki mwoyi wèbè. Nwamòno cìdici cyenzè anyi? Ne pashiishe, mu munyìinyi, bàdi bàtwa nshìngì eyi mu munyìinyi, nènku mpindyewu mbijaadikìlbe ne nshìngì eyi yìdi ne bwenzeji pa bukwa—bantu. Beena maalu à mamanya's!

⁹⁹ Bàdi bàpwidija bwanga bwà ndàndà ebu mu madimi, mùmwàwà mumòne ditùkù adi, nènku mpindyewu tudi ne babèèdi nkàmà mwandamukùlù mu ditùnga emu bifumine ku didyà dyà mayi. Nudikù bàvùlùke ne kùkaadi bidimu pàmvwà kumpàla, patùvwà ne kazùbù kakesè mwaba ewu, ne ngàmà cipròfetà, mèmè kwamba ne: “Nebyènzekè mu matùkù a ndekeelu ne, kanùsòmbedi mu cibandabanda ne kanùdi mayi to.” Ndi naaci mu mukàndà wànyì. Mvwa ngeela meeji ne kùvwà cintu kampànda pa bwalu abu, ki mèmè kuya kacitàngila. “Kanùdi mayi to.” Aci cìvwa nkale wàwa mu cidimu cyà 1933. Mayi àdi ne cintu kampànda munda mwàwò mpindyewu, ne ndi mmòna mwaba wùdi maalu à mamanya àmba ne kabìvwakù bìkèngela bwà muntu wa bidimu bipite pa makùmi àtaanu kudyaye diyi to, bwalu ncintu citàmbe kukolela mwoyi cìdi mwà kudiibwa. Màsaamà's!

¹⁰⁰ Mabèèle, bivwa pa ciibidilu ne cyètù cyàkudyà cìcincika cìvwa mmabèèle. Bangàngàbukà nebàkwambilè ne: “Ùàjilè.” Àdi àsaamishangana mutù wà kapàla ne bikwàbò byònsò. Mmuntu ànu yèyè umwèumwè uvwa uànwà kale wàwa awu ne ùlààla bidimu kàyì ùsaamakù mutù wà kapàla awu to, kàdi disopakajangana ne bikwàbò mbinyàngàkàje nsànjìsànji wa mubidi wà muntu mu mùshindù wà ne cikaadi ànu cimòto

cyà buloba eci, dibùlù—dibùlù dyà mabèèdi. Cìdi cicyènzè aci ncinyi? Maalu à mamanya!

¹⁰¹ Tàngilàayi! Ncyenzèje bwà ngiikàdìlù pankaci pàà—mulùmè ne mukàji àteketè, butekètè bwà mubidi wà muntu, kupicila ku ngiikàdìlù ayi, ne divulangana dyà bàna bàà disaamà dyà tukùlákàji didi bu byà pa lukàmà makùmi àsatù. Bulèmà bwà ku cileledi bùdi bwènda bùbànda bipidi. Nènku mateketa à ku disopakajangana dyà byàkudyà bitùdyadyà bwà kwikala ne mwoyi ebi, ki bidì bitekeshà mubidi wètù, bidì bilelà kànsèrè, màsaamà à mu byeledi byà meeji, ne màsaamà à mishindù yònsò àdi àbwela mu mubidi wa buntu bwà butekètè bwàwù. Beena maalu à mamanya, bàdibùtula nkààyaabò, bàseesuka kule ne ndongamu wa Nzambi.

Yèyè wàkamba ne: “Dimiinu dyònsò divulanganè bilondèshile mùshindù wàdi.” Um-hum.

¹⁰² Nudi bamòne mwaba wutùdì anyi? Ndi mufwànyìne kutùngunuka ànu kutùngunuka; dībà dyètù didi dyènda dìjika. Kàdi, mònaayi, ncinyi cìdi cicyènza? Maalu à mamanya mmatwàle lufù, mabèèdi, ne kabùtù.

¹⁰³ Nènku mwawa mumòne ditùkù adi, mwawa nyiikilangana ne mulundà wanyì mwìmpè, Docteur Vayle udi musòmbe apa ewu ne, mwaba wùdi kaabwalu kàà ne bantu bàdi bàshipiibwa kùdi pènisiliinà. Mu bulelèlà kí mpènisiliinà to, mbukooyà bùdìbo bàlekela bùbwèlamù pàdìbo bènza pènisiliinà apu. Ndibweja dyà mfrangà, màyelè à lukùkà lwà mfrangà. Bangàngàbukà bàmpuèsha pàmwàpa kabàyi mene bamanyè njila wa kulonda bwà kwenza aspirine to, pààbi tatwèndè ùmutùma ku malonga bwà kushààlayè ngàngàbukà mupilùke mu cintu cikwàbò kampànda, kàdi kàyi nànsha mumanyè mwà kwondopa disaamà dyà munda mwà cinyèngù dyà mwànà to. Kàdi citùdi bapeté ncinyi? Lukùkà, bwenzeji kampànda, anyi kaacintu kampànda. Kabàcyèna kàbìdi ne ngàngàbukà wà cyena-kale wa ku musòko uwwakù ne ciibidilu cyà kunùsòmbesha ne kuyiikilangana neenù ne kunùsàmba ne kwenza bintu byònsò to. Bàdi bùùmusha buludì Nzambi mu cyalu, bwalu mbalondè njila yàbò sungasunga. Bwà kuumushabò Nzambi mu cyalu, mbafile tubingilà bwà kuumvwija mùdìYe kàyi ne mushinga. Ki bwalu mbwàbù's.

¹⁰⁴ Ki citùdi benzè ku disopakajangana ncyaci. Nudi numòna's, mubidi... Cìdi cyènza ne cikùnyìibwà ciikalè ne bukolè bwà mubidi, mbikole bwà cìshi kufikacikù. Mbikùnyìibwà bitenteka ebi, bikùnyìibwà bisopakaja bìdi bikèngelà bwà nwènù kulama ne dibìmyaminamyamina dyà manga misangu yònsò ebi. Ne bààbùngì bàà kunùdi mbabalè diyiisha dyànyì pa *Ntèndeleelelu Musopakaja*, bàmulama mummyamina manga ne mwengèleka ne—ne bikwàbò. Mònaayi, kàdi cikùnyìibwà cilelèlà

ne cishùwashùwàlè kacyèna cikèngela kwikala kucìmyamina manga to, cyòci ncyà cifùkulu.

105 Cidi cyèza ne disaamà dilwe ku mubidi wà muntu ncinỳi? Mbwalu mubidi wùdi . . . Mùtùbo bandondèle kùdi ngàngàbukà mulundà wànyì wà musinga mukolè, ùndi nciyi muswè kutèela dínà bwà mpindyewu to, kàdi mmwanèètù wa maalu malenga be, ùmbadila matùkù mashààle aa mu cikàndàkàndà cyà maalu à manga, mukàndà mu bìrò byèndè mùtùye ùlamina mikàndà mímpe yònsò eyi ne bintu byà ndekeelu byà myandà yà bungàngàbukà. Mbutekète. Nùmònè muntu kanà yònsò udi menemene . . . Paùdi wamba ne mubidi wèbè mmucyòkàkàne, udi upeta cimpumpu ne lùkàsà lwònsò. Ncinỳi ciinè aci? Mbutekète bwà mubidi wèbè bùdi bùpàtula lulembwelembwe lwà mu tujilu twà mubidi wèbè. Nènku, mu cyòci aci, ki mùdi kishì kàà cimpumpu kàsòmbela nènku wèwè upeta cimpumpu. Kàdi bu mubidi awu ne dikàndà, wùvwa muwànyine kwipata kishì kàà cimpumpu aku, kakàvwa mwà kuwùlenga to.

106 Pa nàнку, nudi numòna's, pààkiibakà Nzambì muntu ku cibangidilu, ùvwa mutwibwe cisàlù cyà kubènga kupeta disaamà kanà dyònsò. Nwamònu anyì? Kàdi bupidyà ne maalu à mamanya, maalu à mamanya ne dilonga dyà tùlaasà ki cìvwà cìntu cyà kumpàla cyàkaseemejà muntu kule ne Nzambì, ne cìcidi ànu cimuseemeja.

107 Tàngilààyì ànu cidi mfwankà ne dinwà dyà maalà, ne bajì bàà maja bàà bàvùùla ne bilàmbà aba ne bikwàbò, mbyenzè bwà kupwekesha lukòngò elu. Ngeela meeji ne nutu misangu yònsò ànu nudikonka . . . Nèngìikalè mwà kwamba dỳyì kaaba aka. Ncìvwa muswè kucyèenza to, kàdi ngeela meeji ne nèncyènzè.

108 Nwamònu's, bàtu mîngà misangu bàdikonka, bàtu misangu yònsò bàngambila ne: "Mwanèètù Branham, cidi—cidi cyèza ne wikalè misangu yònsò ànu ulwisha bintu byà mùshindù awu ncinỳi? Wèwè kwèna ucyùmva to . . . Wamba ne udi uya ku èkèleeziyà wa muntu kampànda, mòna's, ndi mwà kutwàla cisùmbù cyànyì cyà bantu bakàjì kàdi kabàyi nànsha mwà kusòmba bacyankàme mu mwaba wùdi wèwè wakula to. Misangu yèbè yònsò wèwè udi ànu ubàtândisha, èè, bwà nsuki yàbò mîpì, ne bwà divwàlà dyà bilàmbà bìdi bikùmbànyine bantu balùme, ne bintu byònsò byà mùshindù awu ebi. Ambà tũng, udi ucyèenza bwà cinyì?" Mpindyewu mèmè—mèmè—mèmè ndi . . .

109 Edi didi mwà kwikala Dìyiisha dyànyì dyà ndekeelu too ne ku movù wà luuyà wùlwalwà ewu, nudi bamanye's, kàdi ndi muswè kunwàmbila. Bidi nùнку. Nyumà wa dijingulula bwà matùkù à ndekeelu aa, udi mumanyè ne aci ncintu cyela mulawu kumpàla kwà Nzambì. Ntu ànu ndikonka mîngà musangu ní mwambi kampànda ùdikù ne dijingulula kampànda dyà matùkù à ndekeelu? Nzambì mwinè udi wamba pa cibumbà cyà ku

cyambilu apa ngiikādilù yèbè wèwè ne byúdi mwenzè, ne—ne cyúvwà mwà kwikala, ne—ne ntàtù yúvwà naayi awu, Nyumà umwèumwè awu munda mwèbè's údi ùtàngila pambèlu ne mwikàle mwà kujingulula bimanyinu byà cikondo, ne Kàyi mwà kudikanda bwà kutàndisha to. Nnyumà wa dijingulula, bwalu Nyumà Mwimpè Yèyè mwinè's údi wamba ne cintu aci mmpèkaatù, ne yònsò udi ucyàbanyangana neàbutukè. Ne díbà adi mmunyi mündiku mwà kubingishiibwa ku mèsù kwà Nzambi, pàndi mmòna bànà bèètù bàà bakàji ne bàà balumè bàsanganyiibwa mu ngiikādilù wa mùshindù awu, mèmè ncíyi ncitàndisha? Nànsha bóbò bamfiikile munda, ndi ànu ne cyà kutungunuka ne kucitàndisha. Ndijingulula's. Míngà misangu bàdi bàpangakana pa bidì bitàngilà Díyi ne bikwàbò, kàdi's ndipanga dyà dijingulula. Lwàku ùkungamanganè naaci ku Díyi. Nwamònu anyi? Nwamònu's, twètù tudi—tudi bamanyè ne mbulelèlè. Èè, cidi, nkumanya ne mbulelèlè. Ndijingulula dyà matùkù à ndekeelu.

¹¹⁰ Mpindyewu tudi tumòna pa bidì bitàngilà maalu à mamanya, ncyèna—ncyèna muswè kuya kule kupita apu to, díbà dyànyì dídi ànu divùkùte lubilu dyènda dìjika. Mpindyewu twoshàayibi dísu diibìdi pa dilonga dyà tulaasà ne kumòna cididi dycenzè. Nwamònu anyi? Mpindyewu tudi ne èkèleeziyà yibìdi pa kutangila yònsò.

¹¹¹ Mpindyewu, twájingùlùlù ne cívwa ncyòci aci ne, ki cívwa kabingilà, dilukakaja dyà lungènyi dyètù dyà pàtupù edi ndyàkenzà ne ndundu wa mpèkaatù àbangè kubùnguluka ku cibangidilu. Dívwa ndilukakaja dyà lungènyi pa cinyì? Dilukakaja dyà lungènyi dyà dibèngangana ne Díyi dyà Nzambi. Pàakambilà Nzambi Adàmà ne Evà ne: “Ditùkù dinwàkùdyà, ditùkù adi ndinwàfwà,” aci's ncikòse bwalu, s'ki cyònsò cìdiku. Ne Yèyè wàkabàkolesha bwà kubakùba ku mwena lukunà, paanyimà pàà Díyi Dyèndè. Kàdi Evà, mu kutèeleja kwà dilukakaja dyà lungènyi dyà Sàtaanà, nwamònu's, nkolèshilù, luumvu, dilonga dyà tulaasà, diya dyà kumpàla, nwamònu's, kupàtukayè paanyimà apu ne kutèelejayè dilukakaja dyà lungènyi dyà Sàtaanà, ne kwenzayè cintu cívwa Nzambi mwambè ne “kwenji” aci. Nènku piikalàbi ne dilukakaja dimwè dyà lungènyi, kutèeleja dilukakaja dyà lungènyi ku Díyi dyàkalela cimvundù cinène cyònsò eci, dilukakaja dimwè dyà lungènyi ku Díyi cyàkàbìdi kadyàkukulawa ku mwaba wùmèwùmèwè awu to, bwalu mbifwànyine kwikala bikùtākàne bishi bwà Nzambi kwaluja muntu pa cishimikidi cimwècimwè pàakamuumushàYe apu. Nwamònu anyi? Nwamònu anyi? Bikèngela ùlwe ku Mashì à Kilistò ààkeediibwà panshì awu. Dìngumba dyèbè kadyàkukùmbana to, ne dilukakaja dyèbè dyà lungènyi kadyàkukùmbana to. M'Mashì ne dileidiibwa, ne Dyòdi ndìdi dipàtula munda mwèbè cifùkiibwà cipyacipyà, Kilistò, nènku ukààdi ne mwoyi bilondèshile lwidi lwà Kilistò,

bwalu Bwanga bûdi wangata bûdi bùleejà ne ki Bûdi bùshipà mpèkaatù wa bupidyà, bùbèngangana ne cintu kanà cyònsò pa kuumusha ànu Dìyì dyà Nzambi.

¹¹² Dilonga dyà tûlaasà didi dîtùpèèsha...mwaba awu... Tudi ne èkèleeziyà yìbìdì mwab'ewu mu dindà emu. Umwe wà ku yôyi ng'Èkèleeziyà wa Mpenta wàkalongolodiibwa ku Mpenta kùdi Nyumà Mwîmpè awu; mwibìdì ng'èkèleeziyà wa Katòlikè kàà cyena-Loomò wàkavwijiibwa bulongolodi ku Nicée, ku Rome awu. Umwe wa ku yôyi ndilediibwa dyà nyumà; mukwàbò mbuumambàlà bwà meeji à mu mutù. Ku mwinè èkèleeziyà awu ki kùdi kufùmìne beena Mishòònyì bònsò, kùdi kufùmìne màngumba ónsò. Adi ki divwà dingumba dyà nzànzànzà. Màngumba ónsò mmáfùmìne ku dyòdi adi ne àdi mu bulongo ne dyòdi adi, Bwàkabuulwibwà 17 ngudi wamba nàнку ne: “Yéyè ùvwa mukàjì wa masandi ne ùvwa mamwèndè wa bandumbà.” Ncyà bushùwà. Pa nàнку kakwènakù. . .Bukwà-ncimà kabùyà kùpendangana mapòkò to, nwamònu's, bwalu ncyà—ncyà bushùwà, mbyòbi ànu bîmwèpelè. Mmudyènzè bulongolodi, nkumanè kujika, ùdi mu Loomò. Nànsha ciikàle cinyì, kwèndè nkumanè kujika! Bible, tudi bafùmè ku dilonga bikondo byà èkèleeziyà abi, bwà kujaadika cyòci aci. Umwe mmushìndamijila pa dìjingulula dyà nyumà; mukwàbò mmushìndamijila pa mmwènenenu wa dilonga dyà tulaasà ne mamanya à mu mutù.

¹¹³ Mpindyewu, aci cidi citùpingaja cyàkàbìdì buludì mu budimi bwà Edènà, buludì ku mwaba wùm>wè>wùm>wè awu. Mukàjì (èkèleeziyà) nyéyè wàkatèèleja, kí ng'Adàmà to, mukàjì! Mpindyewu bòbò mbaswè kwikala èkèleeziyà—maamù, túngunukàayi's! Ncyà bushùwà menemene. Kakwèna cintu nànsha cimwè cyà kacyì mu cikondo to. Bàdi bènza ditonda dyàbò bòbò biinè, nwamònu's. Nwamònu's, baalùkile buludì ku cintu cimwècimwè aci, ku dibènga kwitabuujà Dìyì dyà Nzambi! Ku Nicée, ku Loomo, pàakajuukà lukonko lwà dibàtiiza dyà mu màyi, pa bintu bikwàbò byà mùshindù awu, ne bwà dibàtiiza dyà Nyumà Mwîmpè, bèè—bèèpiskòpò bònsò pàmwè bààkenza bulongolodi bwàkabiikidiibwà ne ng'èkèleeziyà wa Katòlike abu, uvwa wa “bumfùmù” bwà cyena-Loomò awu, mwàkamubiikilàbo. Ngáfumu ku dyangata maalu-malonda makèlèlèlè awu, ne ngàtèèleja, ne nkenketulula. Nènku cìvwa bwà kwikala ànu Loomò nkàayèndè, mu Loomo mmùvwà èkèleeziyà wa bumfùmù. Mikwàbò yìvwa ànu èkèleeziyà yà mikesè myàna yàbò kùdiye, yìbìkidiibwa ànu ne n'Katòlike.

¹¹⁴ Wètù Èkèleeziyà ùdi pèndè kàtòlike, Èkèleeziyà wa buloba bujimà, cidi dii—diitabuja dyà buloba bujimà dyà beena kwitabuja bònsò. Umwe wa ku yôyi mmulediibwe kùdi Nyumà wa Nzambi ne ùdi ne Nyumà Mwîmpè munda Mwèndè, nènku ùdi ùjaadika ku Mwoyi wèndè, ku Dilongesha, ne ku cyenzi ne, Nyumà Mwîmpè ùdi munda amu, bwalu Yéyè ki Musàmbi

uvwa Kilistò—Kilistò mulayè, munkaci mwà kukwàta mudimu mu èkèleeziyà Wèndè, wènta cintu cimwècimwè cyàkenzàYè ku cibangidilu aci. Mùshindù awu ngwàkenza Bwanga bwà lupàndù lwà Kilistò abu ku cibangidilu, Ki mùdiYe ùkwàta mudimu leelù ewu nànkù, ùtwàla cintu cimwècimwè aci.

115 Mukwàbò ùdi mmwènenù wa mamanya à mu mutù wa dngumba kampànda mukwàkaja kùdi kasùmbù kàà bantu, mwikàle ne “cimwènekèlu cyà difwàna dyà Nzambi,” mùdi mupròfetà mutwàmbile, “kàdi ùvila Bulelèlà bwà Bukolè ebu.” Mpindyewu, aci’s ncitòoke ànu tòò mùndi pàanyi mumanyè mwà kucitòokèsha.

116 Mpindyewu, ki èkèleeziyà yibìdi ayi nyayi. Umwe wa ku yòyi wàkalediibwa ku Nicée; ne mukwàbò wàkalediibwa ku Mpenta. Ne—ne umwe ùtu misangu yònsò ànu ùlwishangana ne mukwàbò. Tudi bakenkète munda ne paanyimà bikondo byà èkèleeziyà bwà kuciijaadika, ewu ùdi ùlwishangana ne mukwàbò. Umwe wa ku yòyi udi èkèleeziyà mulenga, wa kuneemekiiibwa, wa mamanya à mu mutù mwikàle ne bamanyi baa mabàla balenga ne bikwàbò; mukwàbò mmutèèkiibwe bu “musùmbà wà bansantu babùnguluki bàà mu malaba.” Ùvwa ku cibangidilu, “bakwàcike maalà, balòbi bàà mishipa kabàyi balongè tùlaasà,” ne ncintu cimwècimwè aci leelù ewu, ùcidi ànu mutèèkiibwe mu mulongo wùmwèwùmwè awu. Umwe wa ku yòyi ngwà maalu à mamanya; mukwàbò yèyè ngwà nyumà. Umwe ndilongolola dyà maalu à mamanya; mukwàbò ndijingulula dyà nyumà dyà Dìyi. Umwè mmulongolola bilondèshile maalu à mamanya, cidi tusùmbù twà bantu twàmba, mwèpiskòpò wa mamanya à mu mutù. Mukwàbò yèyè kakùyi mpatà to mmulediibwe ku Nyumà wa Nzambi, ne ùdi ne mwoyi ku Nyumà wa Nzambi, ne ùdi ùkùmbaja ne wènta bwà Méyi àvwa Nzambi mulayè ùlè. Cidi cileeja bwanga bùdi unwà’s. Udi munwà bwanga bwà dilonga dyà tùlaasà anyi? Udi mupetè Bwanga bwà Nyumà Mwimpè anyi? Nwamònu anyi? Èyo.

117 Kaa, budimù bwà Sàtaanà abu’s! Mùshindù wùdiye yèyè mwà kuzòla cimfwànyi aci’s, mu mùshindù wà mamanya à mu mutù’s ùdi mwà kufikisha muntu udi kàyi mulediibwe kùdi Nyumà wa Nzambi ku dinyùnguluka ànu kunyùnguluka! Nènku kakwèna mùshindù nànsha wùmwè, bilondèshile mamanya à mu mutù, bwà kubàpwekesha milongo ku cyòci aci to. Kakwèna mùshindù to.

118 Ndijingulula dyà ku diitabuuja, nwamònu’s, dijingulula. Tudi tumòna cidi Dìyi dyàmba, tudi tuDìitabuuja.

119 “Dìbà adi, Mwanèètù Branham, bòbò’s bàdi bàmba mùdibo ne dijingulula.” Dìbà adi Nyumà Mwimpè’s àpatulè ànu menemene civwàYe mulayè bwà kupàtula, dìbà adi’s netùcitàbùùjè. Nwamònu anyi? Ki cileeji Cyèndè ncyòci aci.

120 Bwanga bûvwà bwènza munyì pàvwàBu bùlenga muntu? “Bimanyinu ebi nebifile aba bàdi bìitabuujà,” mwàkambaYe. Bu Bwanga mwà kulenga cyôci aci, díbà adi aci ncîmpè. Nwamònu anyi? Pa nàнку bàdi bàtùtwàdila . . .

121 Eci cidi citùfikisha mpindyewu, bwà kwoya, mu tusunsa tukesè tùdi tùlondà etu, bwà kutùumushaci ku Abèlè ne Kaayinà, kutùfikisha ku cilumbulwidi cyà mu cikondo cyà Noà, kutùumusha ku dilwa dyà matùkù à Noà adi. Mpindyewu, kumpalà kwà twètù kwenza mulongo wà babèedi, tèelejàayi ne ntèmà pàncidi ndondesha yimwè Mifundu mwab'ewu mu kaamutù-wà-mwanda ka—kakesè apa.

122 Tudi tusangana ne paanyimà pàà bàà pa buloba bamanè kwangata mmwènenu wàbò wa mamanya à mu mitù wa Diyì awu, bantu abu bàakalwa bantu banène, bantu bàà luumù. Ki mùdi Bible wàmba, mu Genèsè 6.4. Bantu bàà luumù bènda bàlondangana ne bakàji balenga ne bikwàbò, bu mutùvwà ne bàà pa buloba bujimà amu. Tudi ànu baciyiilè pa *Makènke Makünze Àdi Àkèlebukà*, mutùvwà baakùle dilòòlò adi mùvwà bakàji ne cyà kutàmba kulengela mu matùkù à ndekeelu, mùvwà balùme, balùmè bàà luumù, bu mùvwà cilèndwishì mu Angleterre ne mu Ètats-Unis. Nènku necitungunuke ne kujanduludiibwa dimwè dyà ku matùkù àdi pànshì aa. Nwamònu's, kanwèna ànu bamanyè cidi ndumba yònsò eyii ne bikwàbò byònsò munkaci mwa dyenza to. Nwamònu anyi? Nudikù bamanyè ne kùdi beena mudimu bakàji bàà ku cinwinù cyà maalà kutàmba balongi bakàji bàà mu tulaasà tubàndile anyi tutùmbùke bàsàtù pa umwe anyi? Beena mudimu bakàji bàà ku cinwinù cyà maalà bàsàtù pa mulongi wa bakàji wa mu tulaasà tubàndile ne tutùmbùke umwe. Nudikù bamanyè ne, byà pa lukàmà bùngi kampànda, ncyèna mwà kubivùluka mpindyewu to bwalu kabyèna kumpalà kwànyì eku to, ncìvwakù mubifunde to, kàdi pabwìpi ne cyà bisàtù cimwè cyà bânà bàà mu tulaasà tubàndile mu ditunga dijimà emu mbijaadikiibwe ne mbendi bàà masandi anyi mbenzèjiibwe bwà kwalukila kumbèlu bwà kuyabò kalela anyi? Nudikù bamanyè ne kunwà kwà pènisiliinà bwà kujikija mäsàsà nkubwejè ànu dinyanguka munkaci mwà bantu, pàabi, cintu aci kî ncifwè anyi? Kàdi nànsha nàнку, nwamònu's, Nzambi wàkamba ne civwa mwà kunyookiibwa too ne ku lukòngo lwinàyi. Cidi cilela Bulèma bwà ku cileledi ne bikwàbò byònsò, nènku bânà bàdi . . .Kaa, mùshindù mwinè wùdi mpèkaatù, mùshindù mwinè wùdiye ne budimù's wè! Mùshindù mwinè wùdi bantu abu, bambi abu mwà kwimana kàdi kubènga kuyiisha bàbènga bajì bàà maja bàà bàvùula ne bilàmbà mu mùsèèsù abu, kàdi bàbàlekela bìmba mu kòralè, ne byònsò byà nàнку awu, ne kumòna ne ki cintu ciinè cyàkatùmà ditungà dyètù mu ifèrnò ncyôci aci, cyàkatùmà cisà cyètù mu ifèrnò. Ncyà bushùwà. Pa nàнку tudi tusangana mpindyewu ne paanyimà pàà bintu abi

bimanè kutonda Nzambi, mûndi ngiitabuuja ne mbiMutondè leelù ewu emu . . .

123 Mpindyewu nkàadi nkafika ku cyena-bwalu cyànyi. Ntu ne mùshindù wà pabwàwù wà kutwàla . . .ntu muswè kukungwija bintu byàbúngì kàdi kushiishà kulenga cyena-bwalu cyànyi. Mpindyewu, tudi tusangana ne mu matùkù à Noà, pàvwà Nzambi ne cyà kulumbulwisha buloba, pààkalwàbu ànu mudibu mpindyewu emu, bwalu Yesù wàkamba ne ki muvwàbi, Yèyè wàkacyùka anyi? Yèyè wàkacyùka anyi? Yèyè, ncyà bushùwà ne Wàkacyùka. Wàkacyùka cinyi? Mpindyewu, paanyimà pàà Yèyè mumanè kumanya ne cilumbulwidi civwa cilwa, ne mumanè kutùndubula cilumbulwidi aci, Wàkacyùka aba bàvwà bàcyùka abu. Nènku mbyà mwomùmwe ne mùdibi leelù ewu. Wàkacyùka aba bàvwà baswè kucyùka abu. Nènku tudi tusangana ne Yèyè wàkabàtumina mupròfetà bwà kubàludikayè, kuludikayè cisàmbà Cyèndè cisungula ku njila wàci mulongolola bwà dipànduka dyàbò. Yèyè ùdi umwèumwè awu makèèlèlè, leelù, ne kashidi. Nwamònu anyi? Tudi tusangana ne Nzambi wàkacyùka cisàmbà Cyèndè. [Katùpà kàà mukàbà wà mèyi munda mutupù—Muf.]

124 Tukàadi ku ndekeelu, ne tudi tumòna ne tukàadi ku ndekeelu's! Kakwèna mùshindù nànsha mukesè wà kwibakila pa dibola adi nànsha. Mmunyi mutùdiku mwà kwibakila cimenga pa bibùndù byà mu Sodomà ne Gomolà byàkooshàbò? Mmunyi mutùdiku mwà kucyènza's? Nkushàale cintu cyà cidikà ànu cimwèpelè, ne aci ndilwa dyà Mukalenge Yesù; kaa, ekèlekèle, dizekuziibwa dyà kupicila mu cikondo cyà Dikènga dinèna, bwà kupingaja dyalujulula dyà buloba, bwa cisàmbà cidì cijaalàme ku mèsù kwà Nzambi ne cidì ne mwoyi ku Dìyi Dyèndè.

125 Mònaayi, Wàkacyùka aba bàakacyùkà bwà kupànduka mu matùkù à Noà, ne Yèyè wàkabàtumina mupròfetà. Nènku mupròfetà ewu wàkabàludika ku njila mulongolola wa Nzambi. Mpindyewu, ki mùshindù wà dyenza maalu wà Nzambi ngwòwò awu. Nwamònu anyi? Nzambi wàkaakula ne Noà, civwa n'Dìyi (kacivwa Dìyi difùnda musangu awu to), ne wàkambila Noà bwà kulongololayè bwàtù bwà disungidiibwa dyà bantu, ne bwà kudimwija bantu bònsò ne Yèyè úvwa ne “njila umwèpelè wa lupàndu.” Ne muntu ewu úvwa mupròfetà mushindika wàkabàjaadikila njila wa dipàndukila. Mònaayi ne, badipwekeshi ne bàà meeji matòokè bààkatèèleja muntu ewu ne kumwitabuuja, ne bààkapànduka. Bààkapànduka ku cinyi? Lufù lwà buloba bwà mpèkaatù bwàkabütudiibwà mu ditùkù adi abu, bààkapànduka ku njila wa lufù uvwa usanganyiibwa pa buloba bujimà awu. Nzambi wàkatàmba kucyùka's! (Éyi Nzambi, kwàcishàku bwà eci cipwekè mu ndòndò mpindyewu, kumpalà kwà mulongo wa babèedi.) Nzambi wàkacyùka!

126 Mmutàngile pa buloba leelù ewu patùdi twakulangana apa, ne Yèyè wàbiikidi Wàbiikidi, kàdi bòbò bàadyombòlù ne

bábèngi. Kùwwa mpùngà wa kanyinganyinga ku cibangidilu. Pàakambilà Nzambi Yeshàayi bwà kubàndayè katèèka... kambila Hezèkiyà ne ùwwa ne cyà kufwà, Hezèkiyà wàkanyingalala ne wàkapeta luse. Pàakambilà Nzambi Yona bwà kuyayè ku Niniwà ne kwela mbilà, bwalu munda mwà matùkù makùmi ànaayi Yèyè ùwwa ne cyà kubùtula cimenga aci, bààkalòmba luse ne mbilà mikolè ne kwàkalwa kanyinganyinga. Kàdi pàdìbo bàcibènga, kî nkushààle cìngà cintu to ànu cilumbulwidi! Kàdi ditùnga edi ndibènge Kilistò. Bàapangidi bwà kutèya ntèmà ku dibiikila, pa nàнку kî nkushààle cìngà cintu to tudi ànu bakùngàmàngàne ne cilumbulwidi.

¹²⁷ Mpindyewu, Nzambi ùdikù ucyùka aba bàdi banyingàlale anyi? Yèyè mmubàsebèèlekù njila anyi? Mpindyewu netwikalè mwà kumòna cyàkenzàYe mu bikondo bishààle.

¹²⁸ Cikondo cyà Noà, Wàkacyùka! Yèyè wàkatùma mupròfetà, ne Wà—Wàkatwàla njila ne Wàkabàleeja njila, ne Wàkabàsebèèla njila wa kupàndùkilabò ne bòbò bààkapànduka ku cilumbulwidi aci. Wàkabàcyùka kàbìdi. Tudi tusangana ne Yeyè ùdi ùbafikisha mu mùshindù wà ne Yèyè, mu matùkù à ndekeelu, ku mwaba (wà bònsò) kumpàlà kwà cilumbulwidi cinène aci kulwaci, Yèyè wàkabàcyùka bikolè mu mùshindù wà ne Wàkalongolola njila bwà bààmòna mwà kubwelamù ne bààfwànyinakù kwikala kabàyi bàlengiibwa kùdi manyooka ònsò àvwà alwa awu to.

¹²⁹ Mpindyewu, Aci ki cyàkenzelàYe Basungula abu—abu. Mpindyewu, bwà aci kaayi tudi bamanyè. Aci ki cyàkenzelàYe Basungula, ànu Basungula nkààyaabò, mpindyewu! Bòbò abu mbàvwà biitàbe mutòlokù wà Mwoyi ewu. Bòbò mbàvwà badyànjila kulongolola bwà kucimònabò. Bàvwa mbòbò. Twètù bònsò, piikalàbi ne tudi twitabuuja Bible, bikèngela twitabuuje didyànjila-kulongolola. Nwamònu anyi? Ncyà bushùwà. Kî nnè Nzambi mmuswè bwà muntu nànsha umwe àjiminè to, kàdi Yèyè ùwwa mumanyè ne nganyi uvwa mwà kuCyàkidila ne nganyi uvwa mwà kubènga.

¹³⁰ Wàkacyùka kàbìdi cisàmbà Cyèndè cisungula mu matùkù à kabùtù kàà Èjiipitù. Bàvwa mu Èjiipitù mwàmwa ne bashààle bapika. Mu matùkù à Mòsà, Yèyè wàkacyùka cisàmbà. Wàkabàtùmina cinyi? Mupròfetà, cyàkàbìdi. Ncyà bushùwà anyi? Nènku Wàkatàpulula cisàmbà Cyèndè ne bàà pa buloba beena bupidyà, kubùumusha ku cilumbulwidi civwà cilwa cyà ditùkù adi aci. NcyàkenzàYe anyi? Yèyè wàkacyùka pàkaavwà Èjiipitù muungwije mpèkaatù yèndè mushikì mibànde mu mùshindù wà ne byàkakèngela bwà Nzambi àtumè cilumbulwidi, bwalu Ùkaavwa mumanè kwambila Abraham ne: “Nènku Nèngìikalè bwalu ne cisàmbà aci.” Pa nàнку pamutù pàà kubàpongolwela bònsò abu cijji Cyèndè cìkolè, Wàkabàtumina dibàcyùkà Dyèndè. Wàkabàtùmina Musàmbi Wendè. Wàkabàtùmina Dìyi Dyèndè. Ne Yèyè ùtu misangu yònsò

ànu ùtùma Díyì Dyèndè kùdì mupròfetà Wendè, mwàkenzàYe mu cikondo cyà Noà. Wàkenza cintu cimwècimwè aci mu matùkù à Noà. Mu matùkù à Eli- . . . à Mòsà, tudi tusangana ne Wàkenza cintu cimwècimwè aci. Wàkabàtùmina mupròfetà Wendè, e kutàpulukabò ne beena bupidyà. Mpindyewu, bàà mùshindù awu ki bààkapàtukà. Bàà mùshindù awu mbààkaCiitabuujà. Bàvwa biitàbùùje Mòsà ne, ùvwa. . . Ku mèsù kwà Pàlò, yèyè ùvwa mukoleshi wa maalu, ùvwa mwena majimbù, ùvwa mwena lubombo, ùvwa cintu cyà cikwàcisha bwòwà. Kàdi bwà bantu bàvwà basungula, bàvwà bapàtùke bilondèshìle Díyì dyà Nzambi (“Mémè nembàpàtùlè”) abu, yèyè ùvwa mupròfetà kùdìbo. Ùvwa njila mulongolola wa Nzambi. Ne yèyè kàbidì. . . Mònaayi, bààkamwitabuujà ne bààkapàndùka ku cilumbulwidi cyà ditùkù adi. Bààkiitabuujà Mòsà.

¹³¹ Ne Wàkamba ne Wàkabàcyùka kàbidì bwà kubàpàtula, ne Wàkabàcyùka mu lwendu paanyimà pàà bòbò bamanè kupàtuka. Amen. Ànu mwàkadì cyòcì aci mu mubidì amu, eci mmu cipaapu cyà nyumà. Wàkacyùka! Bwà cinyì? Wàkalongolola byònsò bìvwwà bibàkèngelà pàvwàbo mu lwendu apu. Kí mmwómò anyi? Wàkabòndopa pàvwàbo bàsaama. Wàkalongolola dyondopa, Wàkalongolola njila bwà mabèèdi àbò. Wàkalongolola nyòka wa—wa cyamù cyà kabanda, bwà bààmòna mwà kutàngila nyòka wa cyamù cyà kabanda awu, cimfwànyì cyà mpèkaatù, ne kwondopiibwabò. Wàkabàdiisha pàvwàbo mu njila apu, mwaba wùvwà kawùyì dyàmpà Yèyè kulòkesha màmpà àfùmina mu Dyulu. Wàkabàdiisha. Kaciyi ànu aci to, kàdi Wàkabàvwàdika, bileeja ne Ùdi ùcyùka aba bàdi bàcyùka.

¹³² Bòbò biitàba bwà kutonda ne kunyingalala ne kwitabuujà ne kwitaba, Nzambi ùdi ùcyùka! Kàdi bìkèngela wànjì ùcyukè dyàmbedi, bìkèngela witàbè cidiYe mukutùmine aci. Wàkatàmba kubàcyùka mu mùshindù wà ne bàvwa bafwànyine kutwishii bwa ne kakùvwa mwà kwikalakù ntùpàkànyì to, Wàkashindika mupròfetà Wendè ku cimanyinu cyà Dikunji dyà Kapyà, bwà kufikisha bantu ku dimòna ne kàvwa ànu muntu ewu uvwa wendakana mwab'ewu awu to, ne ùvwa n'Nzambi mene kumutù kwèndè, Ùvwa n'Yèyè uvwa ùlombola njila. Nzambi ùtu ùcyùka bantu bàdi bàcyùka. Nzambi ùtu ùcyùka aba bàtu bàMucyùka. Pa nàнку Yèyè wàkashindika muntu ewu ne wàkajaadika ne ùvwa musadidi wa Nzambi, pa kubàtùmina Dikunji dyà Kapyà bwà kubàlombola too ne ku buloba abu mene. Nènku bàvwa bamanyè ne bu mùdì cimanyinu eci cyà Kapyà aka, Dikunji dyà Ditutu ne Kapyà divwa dyènda dibàlonda. . . Yèyè kwamba ne Yèyè “kàkuumusha Dikunji dyà Kapyà ne Ditutu to.” Ùvwa naabò bidimu ne bidimu mu cipèèlà, bidimu makùmi ànaayi. Ncyà bushùwà anyi? Dikunji dyà Kapyà adi ndìvwà dibàlombolà! Tudi mu cyètù cidimu cyà makùmi àsàtù ne ciisàtù, kushaala bidimu mwandamutekète

bwa kuleeja mu cimfwànyì cimwècimwè aci. Èyo, Dikunji dyà Kapyà ndivwà dibàlombolà. Wàkabàcyùka. Ne Wàkatàmba kubàcyùka mu mùshindù wà ne Yèyè wàkabàmanyisha ànu ne—ne kacivwa cintu kampànda cyà maalu à mamanya to, kacivwa cintu kampànda cyà cikwatakaja to, kàdi Yèyè ùvwa ùshindika Mukenji awu, ùWùjaadika.

¹³³ Wàkatàmba kucyùka mene ne mukàji kampànda ùvwa wa pambèlu, kàyi mwena Izàlèlèlè to. Kàvwa wa mu kasumbù aku to, kàdi ùvwa muntu wa pambèlu, Presbytérienne, Méthodiste, anyi cintu kampànda, ùvwa ku lukwàbò luseke alu. Kàdi mmwenzè anu ùmvwa anyi! Dìná dyèndè ùvwa n'Laahàbà, ùvwa musòmbèle. . . ùvwa ndumbà. Kàdi pàakumvwàye mùvwà Nzambì mu Dikunji dyà Kapyà ne mwikàle ùbàlombola, kwambayè ne lekèlaayi. . . kusòkayè Nzambì, ne kuleejayè luse kùdi batentekedi bàvwà balwè bwà kutentekela ditùnga adi. Nènku bu mwàkacyùkàye ne yèyè ne beena fàmiyè wendè, Nzambì wàkamucyùka. Mu mùshindù wà ne ndumbà ùvwa mufwànyine kufila mwoyi wèndè kùdi Kilistò ewu, bwà Kabingilà aku, bwalu ùvwa mumòne cimanyinu cyà Citàmbe-mfùkìlu cyà Nzambì, ne ùvwa ùsadila tunzambì twèndè mu dingumba dyèndè sungasunga. Kàdi pàakamònàye cimanyinu cinènè cyà Citàmbe-mfùkìlu eci, kudilayè mwadi ne ùlomba luse, ne luse bwà fàmiyè wendè, nènku Nzambì wàkamucyùka mu mùshindù wà ne cimenga cijimà aci cyàkuupuka, umwe pamutù pàa mukwàbò, kàdi kakùvwakù dibwe nànsha òmwè dyàkuumushiiwbà ku nzùbu kwèndè yèyè to. Ùdi ùcyùka! Nànsha mùvwàye wa pambèlu amu, kàvwa mu kasumbù aku musangu awu to, kàdi Yèyè wàkacyùka. Yèyè ùtu misangu yònsò ànu ùcyùka.

Wàkacyùka Eliyà pàvwàye, ànu yèyè nkààyèndè, mucyùke Nzambì.

¹³⁴ Àlèluuyàh! Ki kùyaayàci kuupuka. “Mwimikilaayi Yèyè ntàtù yènù, bwalu Yèyè ùdi ùnùcyùka.” Peetèlo, pàvwàye wàkula ne bakùlù basungula, bakùlù ne aba bàvwà mu èkèleeziyà, wàkamba ne: “Mwimikilaayi Yèyè ntàtù yènù, bwalu Yèyè ùdi ùnùcyùka. Tèèkaayi byònsò mwaba awu, bwalu nudi bakezùke kumpàlà kwà Nzambì. Nudi—nudi nwenda bu basadidi bàà Nzambì.”

¹³⁵ Nzambì wàkacyùka Eliyà bwalu Eliyà ùvwa ùcyùka Nzambì. Bayiishi bakwàbò bònsò bàkaavwa bajimije cikeènà-kumònà cyà ditùkù adi, bàkaavwa bajimije diswa dyà Nzambì ne dinanga dyà Díyì Dyèndè, ne byònsò byàkashàala byà cyena-leelù. Kàdi nànsha mùkaavwà Izàbèlèlèlè mubàvwijè bàà cyena-leelù mùshindù kaayi, mukàji wa mfùmù wa ditùnga adi, nànsha mùvwà bayiishi bakwàbò bàlekela bakàji bàditwàla ne bènza maalu mu mùshindù kaayi amu. Eliyà wàkacitàndisha, mu Dìná dyà Mukalenge. Yèyè wàkacyùka civwà Nzambì mwàmbè, ki Nzambì kucyùka civwà Eliyà mwàmbè díbà adi, bwalu

wàkamba Dìyì dyà Mukalenge. Nzambì ùdi ùcyùka paùdi ucyùka, kàdi bikèngela wànjì kucyùka dyàmbedi. Èyowà.

¹³⁶ Mònaayi, Yèyè wàkacyùka pààkabiikilàYe Eliyà, ku Dìyì Dyèndè, kumuumusha munkaci mwà màngumba. Bìvwa bimwèka bu ne ùvwa mufwànyine kwikale mufwè lwà nzala, bwalu kakùvwakù mwà kwikala byàdiikùmi ne milàmbù bilwa kùdiye to. Kàdi Wàkacyùka Eliya, mu mùshindù wà ne Yèyè kààkamulekelakù ùfwà ne nzala mu cikondo cìvwàye ùtùmikila Dìyì dyà Nzambì aci nànsha. KutùminaYè bikòlòlò dìyì bwà kumudiishabi. Wàkacyùka Eliyà bwalu Eliyà wàkaMucyùka, ne Yèyè ùdi Dìyì.

¹³⁷ Wàkacyùka Danyèlè pàvwà Danyèlè ùtamba kucyùka Dìyì dyà Nzambì bwà kusambila ne meeji matòòke. Nànsha mfùmù mwambe ne: “Ncyèna muswe kàbìdi byà nàнку byènzekè to,” Eliyà wàkakàngùla ànu màdidiishi è kutàngilayè ku Yelusàlèma è kusambilayè. Eliyà wàkacyùka Nzambì, ne— ne Nzambì wàkacyùka Eliyà. Danyèlè wàkacyùka Dìyì dyà Nzambì, ne Nzambì wàkacyùka Eliyà. Wàkatùma Dikunji dyà Kapyà dyàkawkàcishà nyama wa ntambwe awu bwòwà kàyi mwà kusemena pabwìpi nendè to ne kushààlayè panshì apu bufùkù bujimà. Nzambì wàkacyùka bwalu Danyèlè wàkacyùka. Èyowà’s, mukalenge. Kusambilayè ne meeji matòòkè, mumanyè ne cìvwa cyùmvwija dyediibwa dyà mu bwinà bwà ntambwe bu yèyè mwà kushikukila mēyi matùma à cyena-màngumba. Kàdi wàkatwà binù pabwìpi ne dididiishi, kàyi ùciina cìvwà muntu mwambè to. Yèyè wàkanzulula màdidiishi bwalu cìvwa ndìyì ditùma dyà Nzambì, ne ùvwa ùsambila ne meeji matòòke ne mwoyi mujimà kùdi Nzambì wendè ditùkù dyònsò. Wàkacyùka Nzambì ne dìyì Dyèndè ditùma, ki Nzambì kukudimuka è kucyùka Danyèlè ne dìyì dyèndè ditùma, diimana dyèndè. Danyèlè wàkacyùka Nzambì ne Dìyì Dyèndè, ne Nzambì wàkacyùka Danyèlè ne ditwà dyèndè dyà Dìyì nyama ku mikòlò. Neàcyénze dìbà dyònsò. Amen.

¹³⁸ Wàkacyùka bàna bàa beena Ebèlù pààkaneemekàbo ne meeji matòòke ònsò ne bacyùke diitabuujà dyàkafidiibwà kùdìbo musangu wùmwe cyendèlèlè, Dìyì dyà Nzambì. Wàkabàcyùka mu mùshindù wà ne pààkeelàbo mpungi. . . Bàvwa ne dìyì ditùma dyà kùdi Nzambì dyà ne: “Kwinaminyi kanzambì kanà kònsò kàà bampàngaanù nànsha, nànsha mpingù kaayi. Kuyinàminyì ne kuyikuukwidì nànsha.” Ki cìvwa dìyì ditùma. Nènku pààkeelàbo mpungi ne kwambabò ne “netwèlè mu cikùtù cyà kapyà aba bàdì bàbènga,” bàkacyùka mu mùshindù wà ne bààkakoma lupingù alu nyimà. Ncyà bushùwà. Nzambì wàkabàcyùka, mu mùshindù wà ne pààkalwà luuyà lukolè lwà mudilu alu, KutùmaYè Muntu mwinâyì muntwamu mu cikùtù cyà kapyà amu ne wàkabàlama mu citaleela. Wàkacyùka bwalu bóbò bààkacyùka.

139 Wèwè muswè kushààla ànu kacya wakwàtá ku twitabàayi kampànda, Nzambi kèna ùcyùka cyùdi wenza aci nànsha. Wèwè muswè kwenza nàнку, Yèyè kààkukucyùkakù nànsha, bwalu wèwè udi wenza cidì muntu mwambè. Kàdi wèwè mukwàte ku Díyì dyà Nzambi, ditonda dyèbè dilelèlè dyà meeji matòòke ne witabuuja ne Nzambi mMwondopi adi, umwèumwè awu makèlèlèlè, leelù, too ne kashidi, Yèyè neàkucyùkè.

140 Yèyè wàkacyùka díbà adi, Wàkacyùka bânà bàà beena Ebèlù abu, nènku Wàkabàtùmina Muntu mwinàyi bwà kubàsungila, uvwa Kilistò awu. Aci tudi bamanyè.

141 Pàakeelà mwena nsudi awu lubilà ne: “Mukalenge!” Beena nsudi dikùmi bààkalòpoka beela mbilà ne meeji matòòke ne: “Mukalenge, tǔm̀vwilèku luse.” Bàvwa ne dicyùkà dilelèlè majinga àbò sungasunga, Yèyè ùvwa ne bukolè bwà kubàcyùka. Wàkacyùka mwena nsudi awu bwalu mwena nsudi awu wàkacyùka pa kwenza kwà ditonda dyèndè, ùMubiikila ne “Mukalenge!”

142 Wàkacyùka, pàvwà kààmàndà kàà màsàlaayi lukàmà awu mucyùke bikolè bwèndè yèyè mwinè bwà kutùma bantu bwà kukèba dikwàcisha dyà kùdi Yesù. Pàvwà kààmàndà kàà màsàlaayi lukàmà awu muji-. . . muleejè ku diitabuuja dyèndè, mudyulè bikolè mpingù yèndè yà ku Loomò ayi, ne mucyùke bikolè (ku bujaadiki bwà patòòkè) bwà kuMubiikidisha bwà kulwa kwondopa mwanèndè wa balùme, Yesù wàkacyùka bikolè bwà kuya kamwondopa. Útu ucyùka paùdi wèwè ucyùka. Bidi bikèngela bwà wèwè wànji kucyùka dyàmbedi, nànsha nàнку. Yèyè wàkacyùka.

143 Wàkacyùka pàakacyùkà Yayilò bikolè bwà Yesù. Yèyè ùvwa mwena kwitabuuja wa mu musokoko. Úvwa mwitabùuje ne Yèyè ùvwa mubingè, kàdi ànu bwà ditwà dyèndè dyà nyama ku mikòlò dyà cyena-màngumba adi yèyè kàvwa mwà kupàtukila patòòke ne kucijikula to, kàdi pàakasaamà mwanèndè wa bakàji mutekète ne kufwàye, Yayilò wàkamanya, mutàngile lufù lwà mwanèndè wa bakàji awu ne, anyi kujikula dicyùkà dyèndè, wàkacyùka bikolè bwà kudyula beena bupidyà bàvwa bamunyungùlùkile abu, ne kwasayè kafulu kèndè kakesè kàà bwambi aku, ne kuyayè katwilàngana ne Yesù. Pàakaleejà Yayilò ne ùvwa ùcyùka, Yesù wàkaleeja ne Úvwa ùcyùka bikolè bwà kulwa kubiisha mwànà wa bakàji awu ku bafwè. Mwimikilaayi Yèyè ntàtù yènù, bwalu Yèyè ùdi ùcyùka! Nànsha ciikàle cinyi, Yèyè ùdi ùcyùka!

144 Wàkacyùka bikolè pàvwàku kakùyikù nànsha díyì ditùma diinè nàнку to, kakùyì cintu nànsha cimwè cyambiibwè nàнку awu to, Yèyè kacya kàvwaku mucitèeje to, kàdi Wàkacyùka bwalu mukàji neebè awu kàvwa ne mùshindù wà kubwela mu mulongo wà babèedi to, ki yèyè ne: “Bu mèmè mwà kulenga luzemba lwà civwàlù Cyèndè, mèmè’s ndi muMwitabùuje.”

Wàkacyùka diitabuuja dyà mukàjì awu mu cyôci aci, mu mùshindù wà ne Wàkakùdimuka ne kumubiikila ne díyi dikolè mu batèeleji amu, ne kumwambila ne diitabuuja dyèndè dyàkamusàngaja. Wàkacyùka bwalu mukàjì awu wàkacyùka.

¹⁴⁵ Wàkacyùka pàvwà muntu munyùngùlùke mutù uvwa ubiikidiibwa ne Legònà awu mucyùke bikolè, mu dikàndameena, bwà kudinyòndayè kupàtuka mwínshì mwà mabwe à pa majambu à badémóns ne kupàtuka kuya katuutakeena ne Yesù, ne kupònayè mikokwela. Pàvwà, Legònà! Badémóns abu nùnkù kí mbalwèku to nànsha kakesè bu Legònà kàyi mudìpengèle njila mupàtùke bwà katuutakeena Nèndè. Kàdi pààkambàye kucyùka bwà kwenza diditácisha adi, diimana adi mu diitabuuja dyèndè, Yesù wàkacyùka bikolè bwà kwipata musùmbà wà badémóns ewu munda mwèndè, ne disaamà dyèndè dyà mutù munyùngùlùke adi kujikadi. Yèyè ùdi ùcyùka paùdi wèwè ucyùka. Èyowà's, mukalenge. Yèyè ùdi ùcyùka paùdi wèwè ucyùka.

¹⁴⁶ Mpindyewu, pàakeelà mpofo lubilà ku ciibi cyà Yelèkò ne: “Éyi Yesù!” Bu mùvwàye mwena Yudà, wa ba-Orthodoxes, mu bwobùmwe mu nsunàngòngà. Kàdi pààkambàye ne: “Awu mmutooyi kaayi wùdi wùpita awu?”

Bòbò ne: “Yesù wa mu Nazalèetà ngudi upita awu, Mupròfetà.”

¹⁴⁷ Yèyè ne: “Yesù, Wèwè Mwànà wa Davidi!” Kaa, ditàndisha kaayi divwàci bwà mpaasàtà wèndè ne baakwidi bèndè bàvwà biimàne mwaba awu's wè. Kàdi kààkacyùka cìvwà mpaasàtà, mwakwidi, anyi cintu cikwàbò cyambè to, yèyè ùvwà musànkishibwe! Kàdi wàkacyùka bikùmbàne bwà kupetulula lumònò lwèndè, ki kwelayè lubilà lukolè! Nènku pàvwà mpofo awu mudilongolola, ne mucyùke bikùmbàne bwà kwela lubilà lukolè alu, Yesù wàkacyùka bikùmbàne bwà kumwondopa. Yèyè ùdi umwèumwè awu makèlèlèlè, leelù, too ne kashidi! Yèyè ùdi ùcyùka paùdi wèwè ucyùka, kàdi bikèngela wèwè wànji kucyùka dyàmbedi. Bìdi bikèngela ùjaadikè ne wèwè udi ucyùka.

¹⁴⁸ Wàkacyùka bikolè mu mùshindù wà ne pàvwà mukàjì kampànda, uvwa musòmbe ne balùme bàsambòmbò, mujandùle ne mumanyè ne mujingùlùle cimanyinu Cyèndè cyà Maasiyà cyà dijingulula aci, Yèyè wàkacyùka bikùmbàne mu mùshindù wà ne Wàkamufwila luse ku mpèkaatù ne mpèkaatù yònsò ne kumupèesha màyi àvwàye kàyi ùlwa kuntwaku bwà kusuna to, bwalu wàkajingulula. Yèyè kwamba ne: “Mukalenge, ndi njingulula ne Wèwè ewu udi mupròfetà,” pààkamwambilàYe cìvwà cimutácisha. Nènku bòbò, mukàjì awu ùvwà mwindile ditùkù adi bwà kulwadì, cibi ùvwà mwela yèyè yònsò mu kasùmbù kàà èkèleeziyà, kàyi mupetèku mpùngà wa kucyènza to. Kàdi pààkamònàye Muntu Ùvwakù mwà kumwambila cìvwà cimutácisha, kwambayè ne: “Mukalenge, ndi njingulula ne

Wêwè ewu udi Mupròfetà. Ndi mumanyè ne pààlwà Maasiyà Yèyè ngwènza bintu ebi.”

Yèyè ne: “Mémè ki Yèyè awu.”

¹⁴⁹ Aci ncikòse bwalu! Mukàji awu wàkacyùka. Kushiyayè mulòndò wèndè wà mâyi awu, ne kuditwayè mu cimenga, ki kwambayè ne: “Kanùmonàayi Muntu Udi mungambile bintu bìndi mwenzè. Ki m’Maasiyà mwinè anyi?” Úvwà mwenzè ànu bu mùvwà Lahàbà amu, wàkacyùka mu mùshindù wà ne wàkalubakaja bantu myoyi mu cimenga cijimà amu. Yèyè wàkacyùka bwalu cintu kampànda cyàkenjiibwa, Mufùndu mùshindika wùvwà mufikishiibwe ku dyula ne muvwijùibwè mulelèlè menemene, ki kucyùkayè! Yèyè kàakacyùka civwà bantu abu bàmba anyi civwà muntu kampànda mukwàbò wàmbà to; yèyè wàkaCimòna, úvwapù pàvwàci cyenzèke. Wàkacyùka. Ne yèyè wàkacyùka cisàmbà cyèndè mu mùshindù wà ne wàkambila yònsò wà kùdibo, ne cyàkafikisha cimenga cijimà ku diitabuuja Yesù Kilistò. Mukàji awu wàkacyùka, ne Yèyè wàkacyùka. Cyà bushùwà, Wàkacyùka.

¹⁵⁰ Yesù wàkacyùka bikùmbàne bwà Mukenji wà leelù ewu bwà kufikisha bintu bìmwèbìmwè ebi ku dyanzekabi ànu muvwàYe mwambè, mu mùshindù wà ne Yèyè wàkafwa ne kubiiika ku lufù bwà kubitùma ku Nyumà Mwímpè, Musàmbi awu, bwà kuleeja mudimu Wèndè wà bwambi leelù ewu ne Yèyè ùcidi ànu ne mwoyi. Wàkacyùka bikùmbàne. Twètù katwènakù baswè kucyùka anyi? Ki cintu ncyòci aci, katwènakù baswè kucyùka anyi? Wàkafwà bwà mudimu wà bwambi ewu. Wàkafwà bwà Nyumà Mwímpè wàmòna mwà kwikala kaaba aka mu ditùkù edi bwà kuleeja bintu ebi. Wàkakucyùka wèwè awu. Wàkacyùka bwà kuMutwàla pànwapa. Wàkacyùka bwà kujìkula dîyi adi. Wàkacyùka bwalu Yèyè wàkakunanga. Wàkatàmba kucyùka bwà kucyènza, bwà kutùma Nyumà Mwímpè kùdi eci, kwenza mudimu wà bwambi ewu leelù ewu.

¹⁵¹ S’ki mwàkajaadikàYè ne Wàkacyùka mu ditùkù adi, bwalu Wàkalwa bwà kushindika civwà Nzambi mwambè ne ki civwàYe mwà kwikala. Ki bwà cinyi mukàji awu wàkaMujingulula. Wàkamba ne: “Ndi mumanyè ne pààlwà Maasiyà, Yèyè m’Mupròfetà. Pààlwà Maasiyà, Yèyè ki watwàmbila maalu aa.” Nwamònu’s, Wàkatàmba kucyùka Dîyi dyà Nzambi bwà kumushindikilaDì. Amen.

¹⁵² Mpindyewu Yèyè mmutùme Nyumà Mwímpè, bwà ne mu ditùkù edi dyà mmwènenu wa mamanya à mu mitu, bwà Wàmòna ku Nyumà Mwímpè umwèumwè ewu mwà kujaadikila ku twètù ne Yèyè ùcidi ànu Maasiyà awu, ùcijaadika mu mùshindù wùmwèwùmwè awu. Yèyè ùdi umwèumwè awu makèlèlèlè, leelù, too ne kashidi. Mpindyewu bwalu bùdi ne, wèwè udi ucyùka anyi? Udi wela meeji bishi bwà bwalu abu? Cidi mwab’ewu. Cikaadi cijaadikiibwe misangu ne misangu. Wèwè

udikù ùtàmba kucyùka bwà kuciitabuuja anyi? Udikù utàmba kucyùka bwà kutonda mpèkaatù yèbè, bwà ne udi mupiiile anyi? Tondà bupidyà bwèbè ne ucitàbùùjè. Udikù utàmba kucyùka bwà kuciitaba anyi? Yèyè wàkatàmba kucyùka bwà kufwà ne kubiiika ku lufù, bwà kukutwàdilaci. Udikù utàmba kucyùka bwà kuciitaba. Ngeela meeji ne ncijaadikiibwe too ne ku ndekeelu, kuumukila ànu ku cikondo cyà Noà, kuumukila ànu ku Genèsè kwàka too ne ku ndekeelu. Katwèna ne dîbà dyà kufika ku byònsò abi to. Kàdi's nudi numòna ne Yèyè ùdi ùcyùka, ne Wàkafwà bwà wèwè wamòna mwà kucyùka, bwà wamòna mwà kupetakù njila kampànda. Ne Yèyè wàkatwàla njila awu. Wàkamba ànu menemene cìvwa njila awu mwà kwikala mwenzè, mwà kwenza, ne mpindyewu s'ki Yèyè ewu leelù ewu munkaci mwà kuleeja ne m'Bulelèlè. Mpindyewu, mu dîbà dibì mutùdi ne mwoyi emu, wèwè udikù utàmba kucicyùka, ne mwoyi wèbè wònsò, uciitabuuja anyi?

153 Nànsha wèwè ulwa mu mulongo wà babèèdi kampànda anyi nì ncinyi cyònsò cidiku aci, kí ng'aci to, wèwè udikù ucyùka anyi? MwiMikilè ntàtù yèbè, Yèyè udi ùkucyùka. Ikalà ne meeji matòòkè pa bwalu abu. Tàmba kucyùka bwà kwikala ne meeji matòòke, bwalu Yèyè mmujaadike ku Dìyi Dyèndè dishindika ne Yèyè ùdi ùcyùka. Yèyè wàkalaya bwà kuCìtuma, Yèyè's mmucyènze! Mmulayè mu Dìyi, s'ki Cyòci eci's! Yèyè ùdi ùcyùka, mpindyewu kàdi wèwè? Cìdi, wèwè ngùvwa bwà kucyùka, pashiishe.

154 Wàkatàmba kucyùka, Wàkatàmba kucyùka bwà kukucimwina mwena lukunà yònsò, mu mùshindù wà ne cyònsò cìdi cikèngelà wèwè kwenza nkwikala ne meeji matòòke ne kuciitabuuja. Wàkacimuna lufù. Lufù ki ncintu nànsha cìmwè cyà mèmè kucimuna nànsha; lwòlò lùkaadi lumana kucimuna. Disaamà ki ndyà mèmè kucimuna nànsha; ki ndyà Kilistò kucimunaYè to; dikaadi dimana kucimuna. Bìdi bikèngela ànu bwà ntambè kucyùka bwà kuciitabuuja. Wèwè udi ne bwòwà bwà cìdi muntu kampànda mukwàbò mukwambile anyi? Udi ne bwòwà bwà dijandula dyà disaamà dyà ngàngàbukà anyi? Udi ne bwòwà bwà biikalà èkèleeziyà mwà kukwambila anyi? Udi ne bwòwà bwà kwimana mwaba awu, kukungamangana ne dyabùlù anyi? Kwamba ne: “Ngàatondù mpèkaatù yànyì, ngàtèeki byònsò ku luseke. Ngítàbùùji Dìyi dyònsò. S'ki mèmè ewu, Mukalenge. Fùkaaku dicyùka mu mèmè. Mèmè. . . Wèwè wàkancyùka, mèmè ndi nKucyùka.”

155 Ndi ngeela meeji ku musambu wà kale wà ngàsà awu wà ne: “Ùdi ùkucyùka. Mu myunya anyi mu malèji, Yèyè ùdi ùkucyùka.”

Twinyikààyaaku ànu mitù yètù mpindyewu, katwèna mwà kuya kule kupita apu to.

Ùdi ùkucyùka,
 Ùdi ùkucyùka;
 Pa muunya anyi mu dileji,
 Ùdi ùkucyùka.

TuMwimbilààyiwù, ne mitù yetù miinyika, ne mwoyi wètù.

Ùdi ùkucyùka . . .

Tùmonààyiibi byônsò bidìYe mwenzè.

Ùdi ùkucyùka,
 Pa muunya anyi mu dileji,
 Ùdi ùkucyùka.
 Ùdi ùkucyùka . . .

Mpindyewu, pawikalà ucyùka, ela cyanza cyèbè muulu paùdi uwimbà apu.

Ùdi ùkucyùka;
 Pa muunya anyi, mu dileji,
 Ùdi ùkucyùka.

¹⁵⁶ Taatù wa mu Dyulu, pa cikondo eci mu dîbà dyà ndekeelu dyà ditùkù edi, tudi tutonda byùmukila mu ndòndò wa mwoyi wètù ne, tudi bamanyè ku Dìyì mpindyewu ne Wèwè utu misangu yônsò ànu ucyùka Bèèbè Sungasunga. Kàdi lutàtù, Mukalenge, ndwà ne, twètù tutu tucyùka anyi? Tudi baswe ànu kupeta dilonga dyà tùlaasà, twamba ne: “Èè, mèmè ndi ne dipòlomè dyà bu docteur, anyi—anyi LL.D.” anyi? Aci *nkumanya* Mukàndà wà bwanga, kí nkuBùnwa to.

¹⁵⁷ Nzambì, ndi ndòmba leelù ewu bwà yônsò wa kutùdì àbwejè tunyinganyinga twà Kilstò munda mwà mwoyi wèndè, twàmbulè makèngà Endè pambidi pèètù, bwà kujingulula ne tudi ne cyà kutwala kàbidì bundù bwà Dìnà Dyèndè, butùdì ne cyà kutwala. Nènku swàku bwà twikalè bu bayiidi bàà kale abu, twàlukila, twenda tucyònkòmoka ne tudi babadiibwè bàà dyèse bwà kwambula bundù bwà Dìnà Dyèndè. Enzàku nànkù, Taatù.

¹⁵⁸ Nèngìikalè bwà kulòmba Nzambì bwà babèèdì, Mukalenge, kubàtentekela byanza. Mbeelè byanza muulu, bààbùngì bàà kùdìbo, nènku kudi bààbùngì bàà kusambidila, ne mbakwàte twartà twà disambila mu cyanza. Ne bàmwè bàdi mwaba ewu bàvwà kabàyi babwelè pa dîbà bwà kupeta twartà twà disambila to, kàdi bôbò—bôbò—bôbò nebiitabuujè, Mukalenge. Bàvwà mwà kwela byanza byàbò muulu, mùvwàbi bimwèke, bwànyì mèmè, bu disangisha dijimà. Bààbùngì bàà kùdìbo bàdi bàsaama. Mishwalà nyeyì yisanganyiibwa mwab’ewu, biikàle tuumvwa Bwikadi Bwèbè bwà Bunzambì ku Dìyì dilaaba, bwòndòpèku, Mukalenge. Enzàku bwà dilòmbà dyàbò dyàndamunyiibwè.

¹⁵⁹ Nènku kuumukila ku mishwalà eyi, too ne mu batèeleji mwàmwa, mu bantu bàdi basòmbe mwab’awu bàsaama. Kaa, Bwikadi bwà Mukalenge, swàkù Bùlwe, Taatù, ne bùbòndòpèku

bônsò. Swàku, mu dindà emu mu ngàsà wa Nzambi, patùdi tutonda apa, Mukalenge. . . ? Mèmè musadidi Webè, ndi ntonda dibènga kukùmbana. Ncyèna mene ne cintu nànsha cimwè to, Mukalenge, cindi mwà kuKuleeja bu dikùmbana. Twètù katwèna bakùmbànyine to. Nànsha umwe wa kuttùdi kènàku mwà kwenza aci to, Mukalenge. Katwèna bakùmbànyine bintu bitwikalà mwà kulòmba abi to. Kàdi, Mukalenge, tudi bamanyè ne Yesù wàkaya, mubànde mu Butùmbi, ne mwômò amu munkaci mwà kulongolola mwaba bwà kulwaYe kutwàngàta KùdiYe. Ne Yêyè mmutwàmbile ne Ûvwa mwà kutùtùmina Musàmbi, uvwa mwà kwikala Nyumà Mwímpè awu, ne Yêyè ùvwa mwà kwenza mudimu Wèndè ne kushààla neetù kashidi.

¹⁶⁰ Éyi Nyumà Mwímpè, Nyumà wa Nzambi, lwàku cyàkàbìdi pambidi pèètù mu dindà emu, ùshindikè Bwikadi Bwèbè, Mukalenge, mu mùshindù wùmwèwùmwè wuWàkenza pa Ûvwa wendakana pa buloba apa, bwà batèeleji aba baamònakù mwà kumanya ne Wêwè udi kaaba aka mu matùkù à ndekeelu aa bwà kushindika Díyi Dyèbè, ne bwà kujaadika ne “ànu mwàkadìbi mu matùkù à Lotà, ki mwikalàbi kàbìdi ku dilwa dyà Mwànà wa muntu.” Mukalenge, mbwà buneemè ne butùmbi Bwèbè butùdi tulòmbela nùnkù, patùdi tudilekelela Kùdi ku ditonda dyètù apa. Tùkezùlèku ku Mashi Èbè, Mukalenge. Tùsukùlèku ku màyi à Díyi, ne tùkezùlèku mu Mashi. Ne tùleejèku, Mukalenge, bu “bileejilu,” mwàkamba Peetèlò mu kubala kwà mu dindà emu amu, kudi beena bupidyà. Bwalu tudi tulòmba nùnkù mu Dìna dyà Yesù Kilistò. Amen.

¹⁶¹ Nèndombèku mwanèètù wa bakàji awu mpindyewu ne. . . ne pyànò, katanci kakesè cyanààna. Tudi mwà kwikala pashiishe ndambù leelù ewu, kàdi, kaa, ncitu mpeta mùshindù wa kulwalwalwa misangu yàbùngi to. Ikàlaayikù neetù lutùlùlù, ànu, bantu bônsò badikù ànu mwà kushààla bwà tusunsa tukesè mpindyewu, netùsambidilè muntu yònsò. Billy, Billy Paul, ùdi penyì—ùdi mwaba ewu anyi? Nkwèpì kùdi mufile, udi mwabànye twartà twà disambila anyi? Civwa ncinyi? B, umwe too ne ku lukàmà. Twangatàayi ànu ndambù wa twà B atu bwà tùmònèbi Yêyè ní wàtùpèèsha dijingulula. Mbímpe nànkù anyi? Tùmònàayibì Yêyè ní ùdi neetù kaaba aka. NùMulòmbaayi ànu cyanààna, nudi nwitabuujà ne Yêyè neàcyènzè anyi? Ngàayiishi ne mvwa—mvwa mulabiibwe, kàdi mpindyewu ngàmànyì kuciyiisha, nwamònu’s.

¹⁶² Nènku tùmombàayi bantu bwa bàjuukilè kuulu. Èè, netùbàsambidilè bônsò, nànsha bìshi, kubangila ànu ku nombà umwe. Nganyì udi ne B, nombà umwe? Juukà kuulu, wèwè udi ne kartà kàà disambila aku awu. To, nèngìikalè ànu mwà kubàfikisha apa mu nyùngulukilu emu, bàdi bàpàtukila mu kajila aka bàpweka. B, nombà umwe, nganyì udi naakù, kartà kàà disambila kàà nombà umwe? Mbwena kwamba ne kakèèna mu citanda emu anyi? Eyo, netùbangè. . . Kaa,

mfwilèku luse, inábànzà. Mbímpè, èyo. B, nombà ibìdì, díbà adi piikalàbi ne tukàadi babangile kùdì ùmwè. Twàla B, nombà ibìdì. Nganyì udi naakù, udikù mwà kwela cyanza muulu mùshindù ewu bwà twamònakù mwà kucimòna anyi? Lwàku apa, inábànzà, mwaba ewu mene. Isàtù, nganyì udi ne isàtù? Mpindyewu twèlèlàayi mulongo wètù mulonde cimanu, twenda tutentemuka, anyi twalukila paanyimà mùshindù awu mwaba kampànda. Pa nànkù, èyo, kartà kàà disambila nombà isàtù, nganyì wàlwa? Nyèyè inábànzà awu udi ulwa mwab'ewu awu anyi? Ncivwa mumòne cyanza cyèbè to, mfwilèku luse, mwanèètù wa bakàji. Nombà inaayi, nganyì udi ne kartà kàà disambila kàà nombà inaayi? Udikù mwà kwela cyanza muulu bwà mmonè ne wèwè udi nganyì anyi? Muntu udi paanyimà pààpa wàwa, mwanèètù wa balùme wa bafiike wàwa, udikù mwà kulwa buludì apa anyi, mukalenge, nombà inaayi. Nombà itaanu, nganyì udi ne nombà itaanu? Nsongaàlùmè yà nsongo yidi paanyimà pààpa yàya, nudikù mwà kulwa apa anyi bu nwènù mwà—mwà kuswà? Nombà isambòmbò, nganyì udi ne kartà kàà disambila isambòmbò, udikù mwà kwela cyanza muulu anyi? Lwà apa nùnkù, èyo, isambòmbò, mukalenge. Mwandamutekète. Mpindyewu, eci necyènzèku bwà kanùkungwidi to. Mwandamutekète, èyo, lwàku kùneeku, mwandamutekète. Mpindyewu nombà mwandamukùlù, ànu bu mùdì. . . Udikù mwà kulwa anyi, mukalenge? Nombà citèema. Èyo, mukalenge. Nombà dikùmi. Èyo, mwànà mukesè wa balùme.

¹⁶³ Patùdì twelakù meeji apa, cintu cidi citàmbe kwikala cyà kalolo, díbà dingàabwedi mwaba wàwa, mwànà wa balùme mutekète mmwambe ànu—ànu kunshipa pa kwela meeji pa bwalu abu's, mwànà mukesè wa balùme kampànda ùvwa mwimàne mwaba awu katancì aka, kwambayè ne: “Mwanèètù Branham, udiku mwà kungenzela cintu kampànda anyi?” Wamba kwikala bule bwà mwànà mukesè wa kambodyoto ewu.

Mémè ne: “Ncinyi ciinè aci, mwanàanyi wa balùme?”

¹⁶⁴ Yèyè ne: “Sambidilàku mààmù wanyì.” Yèyè ne: “Ùdi ànu utèèla Dìna dyà Nzambì citèelatèèla, ne ùdi ne nsòmbelu ànu mubyàmùbyalè.”

Mémè ne: “Wèwè utu musòmbèle penyì? Muneemu mu cimenga emu anyi?”

Yèyè ne: “Èyowa's, mukalenge.”

¹⁶⁵ Ùvwa muswè bwà mamwèndè ikalè mukàji mwímpè. Ne, kabyèna bikèmesha to, pààkambà Yeshàayi ne “mwànà mukesè neàbàlombòlè.”

¹⁶⁶ Nombà dikùmi, kî nombà dikùmi anyi? Èyo, nombà dikùmi ne umwe. Èyo, nombà dikùmi ne ibìdì, nombà dikùmi ne ibìdì. Èyo, nombà dikùmi ne isàtù, dikùmi ne inaayi. Èyo, dikùmi ne itaanu. Dikùmi ne itaanu, ncivwa mumumòne

to, nombà dikùmi ne itaanu. Dikùmi ne isambòmbò. Êyo, nyùngulukilà lwà kwàka ùlwe nàka, mukalenge, bu wêwê mwà kuswà, dikùmi ne isambòmbò. Dikùmi ne mwandamutekète, dikùmi ne mwandamukùlù. Dikùmi ne mwandamukùlù, ncìwva mumumòne to. Êyo, inàbànzà, anyi mwanèètù wa bakàji, dikùmi ne mwandamukùlù. Êyo, mpindyewu yilà kwàka, inàbànzà, bu wêwê mwà kuswà, pàtukilà lwà kwàka. Mpindyewu tàngilà, bu mulongo wà babèèdi, abu mbungi bukùmbàne bwà kwimanabò musangu wùmwe.

¹⁶⁷ Pàdi mulongo wa babèèdi wùbanga kukèèpèla, nwamònu's, nènku Billy Paul anyi umwe wa kùdìbo mwab'ewu kuumukila ku cibùmbà cyà ku cyambilu eku...Mwanèètù Neville, Mwanèètù Neville, Mwanèètù Neville paanyimà pàa katanci, pawàbàmònà...Mpindyewu, panwàmòna Mwanèètù Neville ùmòna mulongo wà babèèdi wùlwa...neàleejè ne cyanza nùнку ewu, bwalu nènsambilè bwà Nyumà Mwimpè...

¹⁶⁸ Mpindyewu, muntu ewu, udi ne kartà kàa disambila, wêwê udi mu dikalu dyà balèma ewu anyi, mukalenge? Yêyè—yêyè—yêyè ùvwa ne kèndè kartà kàa disambila. Êyo, mpindyewu udi mwà kumubweja buludì mu mulongo wà babèèdi. Mpindyewu, kùdikù muntu kampànda mukwàbò udi—udi—udi mwab'ewu, udi kàyì mwà kujuuka kuulu anyi? Muntu kampànda àmukwàcishèku piikalàye...pàakùmbanà dyèndè—dyèndè dîbà, nwamònu's. Mpindyewu, elàayi ànu meeji, kubangila kaaba kàmvwà mwimànyine aku bu ku dikùmi ne mwandamukùlù anyi makùmi àbìdì nàнку awu, mwaba kampànda awu, pashishe nùbangilàayi ku makùmi àbìdì ne ùmwè, makùmi àbìdì ne ibìdì, udi mumanyè kaaba kèèbè pawàbwela.

¹⁶⁹ Mpindyewu nudi nucyùka anyi? Nudi nwitabuuja ne Yêyè ùtu misangu yònsò ànu ùcyùka anyi? Udi witabuuja ne Yêyè ùdi ùcyùka mpindyewu anyi? Piikalàbi—piikalàbi ne Yêyè—piikalàbi ne Yêyè wàkacyùka musangu kampànda, neÀcyuke misangu yònsò. Nudi nwitabuuja nàнку anyi? Mpindyewu ndi muswè bwà bantu bònsò biikalè mu kaneemu kàa menemene, lamà kaaba kèèbè ne sambilà. Mpindyewu, nwènù bàdi mu batèèleji abu, sambilaayi pèènù. Mpindyewu, Yêyè wàkacyùka munyi? Bwalu Yêyè kàvwa mwà kucyùka kupìta to, ne kakwèna muntu nànsha umwe anyi mupròfètà nànsha umwe, muntu mukwàbò nànsha umwe kèna mwà kuya dyàmwàmwà dyà mikàlù yà mudimu mulaya wà Nzambi to. Ncyà bushùwà anyi? Mpindyewu, ncyèna ncyùka to bwà mpindyewu, udi mufwànyine kwikala mubwelèbwèle mu milongo yà babèèdi misangu lukàmà, kàdi mpindyewu wêwê udi mwimàne kuulu ne wêwê ùdi musòmbe panshì awu, kwòkò mpèkaatù mu nsòmbelu webè, anyi bupidyà, ùbùtondè ànu mpindyewu. Kùdidìngi wàlwà mwab'ewu kùyi mwenzè nàнку to. Bu wêwè—wêwè mwà kulwa kupicila mwaba ewu ne nànsha muntu mulabiibwe mùshindù

kaayi, ne mufwanyine kwimana ne kukutentekela byanza, neucipangile bushuwa menemene mu ntanta wa ki—kilomeeta lukama ne makumi asambombò wewe kuyi mucitabuuje to. Udi ne cyà kuciitabuuja. Bikengela ucijikule ku mishiku. Udi ne cyà kwenza nanaku. Nwamònu's, dibà adi nwènu batangle apa, mushindu wudiku. . . Ndi ntékemena ne nudi numone cimfwanyi aci. Nwamònu anyi? Kabyena mwà kwenzekaku to nansha bishi bwà Nzambi abenge kushaala mulamate ku Dyi Dyende bwèbè wèwè, pawikalà wèwè mushaale mulamate ku dyèbè diyi bwà Nzambi. Nwamònu anyi? Wèwè mucitabuuje bulelèlè, kakwèna cidi mwà kukweleshaci mpatà to. Cikondo, cipaapu, cintu nansha cimwè kacyènakù mwà kukweleshaci mpatà to. Wèwè udi uciitabuuja. Nudi nuciitabuuja anyi?

¹⁷⁰ Mpindyewu, mpindyewu nengikalè mwà kutangila mulongo wà babèedi ewu too ne kwinsi kwawu. Ku dyanyi paanyi dimanya, ambà ànu ne muntu udi apa ewu, ndi mumanyè; ne ndi mumanyè nanaku, ndi mumanyè Gene Slaughter wawa, ndi mumumanyè; pa kumusha aci. . . nènku ncyènakù mumanyè cidi—cidibo biimanyine mwaba awu to. Ncyènakù ne cingenyinyenyi cyà cidibo biimanyine mwaba awu to. Nzambi ngudi mumanyè. Nènku mpindyewu panwikalà nwènu bõnsò bamanyè ne ncyèna mumanyè kantu nansha kamwè pa bidì binutangila, elàayi byanza byènu muulu, nwènu bàdi biimane mwaba awu abu. Mpindyewu, mbanganyi mu batèeleji emu bàdi bamanyè ne ncyèna mumanyè kantu nansha kamwè pa bidì binutangila, elàayi byanza byènu muulu. Mpindyewu mbanganyi bàdi bamanyè ne Yesù Kilistò mmumanyè maalù ènu?

¹⁷¹ Ne mbanganyi biikalaku mwà kwanyisha bwà kwamba eci ne: “Ndi ngiitabuuja ne mwoyi wanyi wõnsò ne Yesù wakangondopa paakapoopediibwàYe pa nkurusè ku Kàlvariyo apu”? Ncyà bushuwa. Nwamònu anyi? Mpindyewu, piikalabi ne Yèyè ukaadi mumanè kucyèna, dibà adi's bidì bikengela diitabuuja dyèbè dicitabè. Mpindyewu, Yèyè wakatamba kucyuka bwà kucyèna, wèwè udikù utamba kucyuka bwà kulekela mpatà yõnsò, ne kuciitabuuja anyi? Mwimikilè ntàtù yèbè pambidi, bwalu Yèyè ùdi ukucyuka.

¹⁷² Mpindyewu, pawikalà usaama, pawikalà mu lutàtù, nkàadikù mumone, èè, nudi bamanyè's, binunu makumi kuvudija ku binunu byà bintu bidì Nyumà Mwimpè mwenzè. Ne nudi bamanyè nanaku; disaama dyà tukulakaji, dyà dikafikisha too ne ku difwà.

¹⁷³ Muntu kampànda wàkàdishinda kufwà pa cibumbà cyà ku cyambilu apa, ànu apa kumpalà kwètù eku, kùkaadi mbingu mitwè ku yisàtù. Mukajèndè mmungàngà mumanyike udi musòmbe mwaba ewu. Ki mulùme awu kudibyankulayè buludì pànshì. Mmusòmbe kaaba aka mu mwaba kampànda. S'mmukajèndè ewu musòmbe mwab'ewu mpindyewu, ne—ne mulùme's nyewù apa mwaba kampànda mpindyewu.

Ëyowà, s'nyewù mwimàne kaaba aka mene. Mèsù àkapiluluka, mandàmùke mashààle mafìike mùshindù ewu, ànu... kudishindayè, ki mèmè kutùuluka. Mukàjèndè kumuteetayè, mwoyi mwimàne, dituuta dyà mashi kadiyikù. Mèmè kumutentekela byanza (ùkaavwa muyè) ne kubiikila ànu nyumà wèndè cyanààna, mu Dìna dyà Yesù Kilistò, ki kujuukayè. Nwamònu anyi? Nwamònu anyi?

¹⁷⁴ Ncinyi aci? Yêyè ùdi Dibiiikà dyà ku lufù ne Mwoyi. Kàvwa mmèmè to. Awu ùvwa mMusàmbi awu wàkenza cyenzi aci, Nyumà Mwimpè mwikàle ùtwàkwila. Nwamònu anyi? Tudi baMwitàbe, mpindyewu bwalu mbuMutàngile bwà kutwàkwila. Kàdi mmùshindù kaayi wùndiku mufwànyine... Nzambi ùvwàkù mufwànyine kukusùngila bibèngàngàne ne diswa dyèbè? Nànsha kakesè. Yêyè kèna mwà kukwondopa bibèngàngàne ne diswa dyèbè to. Bikèngela ùcitàbùùjè.

¹⁷⁵ Mpindyewu, eci ncifwànyine kwikala cinyi, bu—bu Yêyè mwà kujaadika, bu Nzambi mwà kundekelakù ku dipà kampàndà dyà kùdi Nzambi nnùleja ne Yesù Kilistò udi neetù kaaba aka, ne Musàmbi ewu n'Yesù Kilistò, Yêyè udi Dìyi. “Ku cibangidilu kwàkadi Dìyi.” Mmwómò anyi? “Dìyi dyàkadi Nzambi. Ne Dìyi dyàkavwijiibwa mubidi ne dyàkasòmbela munkaci mwètù.” Ne Bible mmwambè, mu Ebèlù 4 ne: “Dìyi dyà Nzambi nditwè kupita mwelè wà mvità musàkisha nseke yìbidi, Dijinguludi dyà meeji à mu mwoyi.” Ncyà bushùwà anyi? Nènku ki cyàkenzà Yesù bwà kujaadika ne Yêyè nguvwa Dìyi dilaaba adi, Maasiyà. Kaa, ekèlekèle! Kanwènaayikù numòna aci anyi? Maasiyà ncinyi? Mulaaba maanyi Awu. Cinyi cilaaba? Dìyi dilaaba! “Ne Dìyi dyàkavwijiibwa mubidi.” Yêyè ùvwa Dìyi dilaaba adi! Udi umòna aci anyi, Mwanèètù Vayle? Wamònu's, Yêyè ùdi Dìyi dilaaba!

¹⁷⁶ Nènku mpindyewu paùdi udilàmbula kùdiYe, díbà adi Yêyè ùdi ùkwàta neebè mudimu kupita ne pa ciwùdi wêwè mumanyè aci, ùjaadika ne Yêyè ùcidi ànu Dìyi dilaaba, Dijinguludi dyà meeji a mu mwoyi adi. Kaa, mmunyi, mmunyi mùdi muntu kanà yònsò ewu mwà kwela mpatà's? Itàbùùjà wêwè ànu cyanààna. Kwèdikù mpatà to. Nènku mpindyewu nwènù bàdi basòmbè aku abu, ndi—ndi mulengè cyena-bwalu aci mu dindà emu. Pàakacyùka mukàji kampànda mukesè bwà ne kàvwa ùbwela mu mulongo wà babèèdi apu, pàmwàpa, kàdi wàkalenga luzemba lwà ciwàlù Cyèndè ne Yêyè kukùdimuka. Nudi nwitabuujà nànkù anyi? Nudi nwitabuujà ne cidi mwà kwenjiibwa cyàkàbidi leelù ewu anyi? Ëyowà. Mpindyewu, mmunyi mùdi mufwànyine kucìlenga?

¹⁷⁷ Bible mmwambè ne Yêyè ùdi Mwakwidi Munène, Mwakwidi Munène mpindyewu mene, musòmbè ku dyàbalùmè dyà Nzambi Mutàmbe bunène, bwà kutwàkwila pa dijikula dyètù. Tudi tujikula ne tudi baMwitàbùùje, ne tudi baswè kulenga Mwakwidi Munène awu. Ne twètù baMulengè,

mmunyi mùdìYe mufwànyine kwenza maalu? Yèyè ùdi mwaba ewu mu mmwènekelu wa Nyumà Mwímpè. Dìbà adi Yèyè's mmufwànyine kukwandàmwinamù ne kukwambila ànu mùdibi menemene. Mmwômò anyi? Mpindyewu itàbùùjaayi nànkù ne shàlaayi ànu basòmbe, bapùwe, shàlaayi ne kaneemu ne batàngile. Mpindyewu, Yèyè ànu mucyènzè misangu nànsha yisàtù cyanààná, aci's neciikalè cikùmbàne, ki mmwômò anyi? Misangu yisàtù, bu Yèyè mwà kucyènza. Ùmwè, ibìdi, isàtù, bu Yèyè mwà kucyènza.

Wetwàwu!

¹⁷⁸ Mpindyewu, katanci kakesè cyanààná patùdi tusambila apa. Nwamònu's, eci cìdi ne, mèmè ncyèna. . . Eci ncintu kampànda ciikàle cishiilàngàne ndambù mpindyewu mene; ndi muyiishè, ne pashiishe mukùdimùkile ku cyôci eci. Mpindyewu, ncyèna musòke Mukalenge bwà cyôci eci to kùkaadi ntàntà mule, kàdi Mukalenge Nzambì mmumanyè mwoyi wànyì, nènku Yèyè àkupèèsheku dilòmbà dyèbè. Ne ndi nciitabuuja ne, Yèyè neàcyènzè.

¹⁷⁹ Mpindyewu, muntu mukàji nyewù mwimàne mwaba ewu, katwèna bamanyàngàne to. Bwà ku dyànyì pàànyì dimanya, nciitukù mwànji kumumòna to kacya bàndela. Mmufwànyine kwikala musòmbe mu batèeleji mwaba kampànda anyi mummanyine ku mikàndà kampànda mibala, kàdi Taatù wa mu Dyulu ngudi mumanyè, bwà ku dyànyì dimanya, nciitukù mwanji kumutwishila mèsù to kacya bàndela. Mmwenyi.

¹⁸⁰ Mpindyewu, pùikalàbi ne Yèyè ùdi umwèumwè awu, muntu mulùme ne muntu mukàji mbaabà mùvwà Yesù mutuutàkèene ne muntu mukàji kampànda ku cìnà cyà màyi amu, cìmvwà ngàmbe kùkaadi katanci aci. Yèyè kucyùka mukàji awu. Mpindyewu, ewu mukàji pàmwàpa kì mmupiiile bwà cintu cìmwècìmwè civwà naaci mukàji awu to, kàdi kùdi cintu kampànda kaciyi bìmpè to. Kàdi Yèyè ùdi ùmucyùka menemene ànu mùdìYe ùcyùka mukàji awu amu. Nwamònu's, Yèyè ùdi ùcyùka. Mpindyewu, pààkacimòná mukàji awu, wàkacijingulula. Mpindyewu ntwètù aba bùbìdi bwètù biimàne mùshindù ewu. Mpindyewu, kacya nciitukù mwànji kumumòna to.

¹⁸¹ Mpindyewu, bu Nyumà Mwímpè munène, Udi kàyì umwèka awu, mpindyewu bu byumvwilu byà diitabuuja mwà kuMumanyisha patòòke kùndì. Wàtwàdi byumvwilu byà diitabuuja, ne Dìyì Dyèndè ndiciseemeje pabwìpì menemene mu matùkù à ndekeelu aa mu mùshindù wà ne Yèyè mmu Cìkwàcishe ne fòtò kuntu kwàka. Mmuciseemèje pabwìpì menemene ne byumvwilu byètù, bilabìibwe, mbiyè ne bìMumòne ùbwela mwab'ewu ne ùnyùnguluka mu mmwènekelu wa Dikunji dyà Kapyà awu. Ki mmwômò anyi? Mpindyewu Yèyè ùdi kaaba aka, ndi mumanyè ne Yèyè ùdi kaaba aka. Diitabuuja dyànyì didi

dyàmba ne Yèyè ùdi kaaba aka. Mpindyewu bu Yèyè ànu mwà kuDivwija bikùmbàne cintu cyà bàlenga ne byanza mwab'ewu bwà kubàkulakù nsòmbelu wa mukàji ewu, nwamònu's, bu mwàkalayàYe ne Neenzè amu. Nyumà Mwímpè's mmufwànyine kwenza cyenzedi cimwècimwè cyàkenzàYe aci.

¹⁸² Mpindyewu mèmè, bu mùmvwà nyiisha, ndi njinga kwakulakù ànu neebe bwà katanci kakesè cyanààna bwà kumòna.

¹⁸³ MwàkenzàYe bwà mukàji wa ku ciina cyà mâyi amu, kwambaYè ne: "Ntwàdilèku mâyi à kunwà." Nudi bamanyè's, Yèyè ùvwa ànu. . . Pàmwàpa Ùvwa musòmbè mwaba awu wèla meeji bwà aba bàvwà bayè kakèba byàkudya abu, kàdi dîbà adi bìvwa bìkèngela bwà Yèyè—Yèyè kuyiikilanganakù ndambù ne mukàji awu, nudi bamanyè. Taatù nguvwa muMutùme kuntwaku. Byàkakèngela bwà Yèyè kukùya. Ùvwa ùya ku Yelèkò; ki kuyaYè ku Sàmàlèyà, aku mpa mukùnà, bìvwa "bìkèngela bwà kupicilaYe kuntwaku."

¹⁸⁴ Èè, mu mùshindù kampànda, bìvwa bìkèngela, Taatù mmunguumùshe mu Arizona, muntùme mùneemu emu, pèènu kulwamù. Pa nàнку bìdi byònsò ànu cintu cimwècimwè aci. Kakwèna cidì cyènzekà ku mpùùkàpùùkà to, byònsò bìdi byènzeka ànu bwà kabingilà kampànda. Ngàsà wa Nzambi, ncyà bushùwà.

¹⁸⁵ Mpindyewu, ncìyi mukumanyè to, kàdi udi umwèka menemene ne bukòlè bwà mubidi, ne kí ncifwànyine kwikala aci cyùdi muvwilè kaaba aka to. Ncimfwànyine kwikala cintu cyà pàtupù. Ncifwànyine kwikala munanga webè kampànda, ncifwànyine kwikala maalu à kumbèlu, à mfranga. Mèmè ncyèna ne mùshindù wà kumanya to, aci udi mumanyè. Kàdi Yèyè mungumvwije cyùdi muvwilè kaaba aka, wèwè neùmanyè ne mbulelèlè anyi kí mbulelèlè. Ne batèèleji nebiitabuujè ne mwoyi wùmwe dîbà adi anyi? Mpindyewu tûtèèlèjaayaaku, ne bìdi bìkwàciibwe pa mikàbà yà mèyi, ne tudi biimàne ànu pa cibumbà cyà ku cyambilu apa.

¹⁸⁶ Inàbànzà, ndi mmumòna kacya wàbandisha mutù wèndè mùshindù ewu. Yèyè, ùdi ne dîsaamà dyà mutù dîdi dimutàcisha, byenzè bu mikenyi yà dîsaamà dyà mutù wà mu dîsù. Ndîsaamà dyà mutù dyà kashèndèndè diikàle dilwa dîbà dyònsò. Aci ncilelèlè. Ní mmwòmò, elà cyanza muulu. Nwamònu anyi? Ncyà bushùwà. Cintu cikwàbò, yèyè ùdi ne lutàtù lwà kamina-bidyà, lùdibò bamwambile, nànsha nàнку, cì—cidì cikutàcisha, ne yèyè awu mmwambilemù, nkamina-bidyà. Nènku dîbà adi udi ànu ne ntàtù mikòdyàkàne, bintu ànu byàbùngi bìdi bìkutàcisha; ubìnduluka, utàcishiibwa, upeta dilubakana ne, "misangu mikwàbò ndi ndikonka ne ndi mwimànyine pènyì, ne mèmè mwine ndi munda anyi ndi pambèlu." Ne aci ncyà bushùwà. Mbulelèlè. Mpindyewu, Yèyè mmukumanyè, kwènàku

mufwànyine kusokoma mpindyewu to bu ne bivwa bikèngela wêwè kusokoma. Nwamònu anyi? Udi witabuuja ne Yéyè ùdi mwà kungambila cyùdi, ne udi nganyi anyi? Èè, Viola, alùkilà kumbèlu, Yesù Kilistò wàkusàngaji.

Udi witabuuja anyi?

¹⁸⁷ Mémè ncyèna mumanyè to. Yesù Kilistò ngudi mumanyè bintu byònsò. Mmwenyi mukwàbò kúndi. Nzambi ngudi mutùmanyè bònsò bàbìdi. Nudi nwtabuuja ne ndi muprófeta Wendè, musadidi Wendè anyi? Nudi nwtabuuja ne bintu bingàayiishi mu Dìyi edi ebi Mbulelèlà anyi? Nudi nwtabuuja anyi? Bu Mukalenge Yesù mwà kungambila cyùdi muvwilè kaaba aka, udi witabuuja ne mémè ndi musadidi Wendè. Ne Yéyè ùdi wènza cyòci eci bwalu Udi ùkucyùka. Yéyè, dicyùka Dyèndè didi bwèbè wêwè, Udi wènza cyòci aci bwalu Udi ùkucyùka. Udi ùcyùka bakwàbò bàdi balwè mu mulongo aba. Ùdi ùbacyùka. Wêwè udi mupeté lutàtù, njiwù, njiwù yà màshinyi. Udi munyùkùshiiibwe yònsò bwà cyòci aci. Mmwòmò. Udi ne lutàtù ne mukòlò wèbè awu. Ncyà bushùwà. Newùsangalè, ne dibìnduluka nedikuumukè, pa nàнку tùngùnukà ùye ànu kumbèlu, mwikàle usàkidila Mukalenge, wamba ne: “Mukalenge àtumbè!”

“Bu wêwè mwà kwitabuuja, byònsò bìdi mwà kwenzeka.”
Èyo.

¹⁸⁸ Udi witabuuja anyi? Ncyèna mukumanyè to, udi mwenyi kúndi. Kàdi Nzambi mmukumanyè. Udi witabuuja ne Yéyè ùdi mwà kungambila cyùdi muvwilè kaaba aka, anyi cintu kampànda cikwàbò cidi cikutàngila anyi? Udi mufwànyine kucitabuuja anyi? [Mukàji awu ùdi wàmba ne: “Èyowà”—Muf.] Muntu mukàji mukwàbò nyèyè awu. Kàvwa ngwèwè to, wamònu’s. To, kí nàнку to. Ngwèwè, udi kaaba aka bwà muntu kampànda. Udi apa mbwà kampànda, mmamwèbè. Ncyà bushùwà. Yéyè pèndè, ùdi ne lutàtù ne mukòlò wèndè. Ncyà bushùwà. Kèna mùneemu to. Udi pabwipi ne mwaba wùdi wùmwèka, wùdi wùmwèka kúndi bu Anglais, byenze bu, mwaba kampànda kwìnshì eku. Wêwè, ncyà bushùwà, udi witabuuja anyi? Èyo, tùngùnukà. Yéyè wòndòpiibù. Tùngùnukà ànu cyanààna.

¹⁸⁹ Kùvwa bantu bakàji bàbìdi. Umwe wa kùdìbo ùvwa mukùlumpè bikolè, ki mémè—mémè kudìkonka ne nkwèpi. Mvwa ntàngila bwà kumòna ne pàvwa mpenyi—mpenyi apu. Mukalenge Nzambi mmumanyè bintu byònsò, kí mmwòmò anyi? Ne Yéyè ùdi mwà kwenza bintu byònsò. Udi witabuuja nàнку anyi? Amen. Yéyè kí mmulenga wa dikèma anyi? Mémè ndi muMunangè. Yéyè, Yéyè ki wànyì Mwoyi. Yéyè ki cyònsò cìndi naaci. Yéyè ki cyònsò cìndi naaci dijinga. Tùngùnukà ànu cyanààna, Yéyè wàkusàngaji, mukalenge.

¹⁹⁰ Dilaabiibwa ndilondè inábànzà awu. Kùdi inábànzà mukwàbò musòmbè mwaba awu mwikàlè mutàcishìibwe ne disaamà dyà mutù, ne ùdi ne cyùjà mwinshì mwà dibòkò dyèndè. Mmwómò anyi? Pààkutentèkèdiye byanza dibà adi apu, wèwè umvù njiyà yà pabwàyì menemene. Kacivwa cyà bushùwà anyi? Ki pààkwondòpùYe mpòpò apu. Newikalè mwà kusàngala. Yesù Kilistò. Tàngilàayi mwaba wùdiye awu. Mukàji ùvwa usambila awu, anyi apa, nwamònu's. Nuvwakù bamòne pàvwàye ùsambila apu anyi, pàmvwà mèmè mmusambidila apu, cyènzèkì ncinyi? Nwamònu anyi? Mvwa mumòne mukàji mukwàbò, ki mèmè kutàngila luseke alu. Kùvwa njiyà minène. Bàdi ne cyà kwikala bàmanyàngàne, cintu kampànda, anyi biibidilàngàne muntu ne mukwèndè, bwalu mukàji awu ùvwa ne njiyà kampànda bwà mwinè mukàji ewu. Nènku dibà adi mukàji ewu ùdi ùpwekelela ùmulenga, nènku, mmwenzè ànu ùmulenga, mèmè kutàngila è kumòna cintu kampànda dyàmwàmwa, nènku ki yèyè awu mwimàne mwaba awu mene. Ncitungù mwanji kumòna mukàji wàwa to kacya bàndela. Nzambì mu Dyulu mmumanyè nàнку. Kaa, ekèlekèlè! Nudi bafwànyine kwela mpatà bwà cinyi?

¹⁹¹ Wèwè mwà kwitabuuja, Yèyè mmufwànyine nànsha mene kukuumusha too ne biibidilu kampànda. Udi witabuuja nàнку anyi? Udi witabuuja ne Yèyè neàkuvwijè tumatuma anyi? Tùngùnukà, ne neùcimànyike mpindyewu mene ne kashidi kèèbè kùyikù mwà kunwà mfwankà kàbidi to. Tùngùnukà, ne itàbùùjà ne mwoyi wèbè wònsò. Ikàlà ne diitabuuja mu Nzambì. Kwèdi mpatà to.

¹⁹² Udi witabuuja anyi? Tukaadi ne bàsàtu anyi? Ikàlà ne diitabuuja mu Nzambì. Kwèdi mpatà to. Itàbùùjà cyanààna. Udi witabuuja ne dilaabiibwa Dyèndè didi kaaba aka mpindyewu anyi? Amen. Kwèdi mpatà to. Itàbùùjà!

¹⁹³ Nènkutentèkèlè byanza, nènku itàbùùjà. Udikù mwà kwitabuuja pàmwè naanyì anyi? [Mwanèètù wa balùme awu ùdi wàmba ne: “Èyowà's, mukalenge.”—Muf.] Mu Dìna dyà Yesù Kilistò, mwanèètù wa balùme ewu òndopìlbwè. Amen. Ikàlà ne diitabuuja mpindyewu, kwèdi mpatà to. Indilà kakesè.

¹⁹⁴ Kùdi cintu kampànda cyènzèkì mu batèèleji mwàmwa kàdi ncìyikù mwà kucimòna to, cìdi paanyimà apa mene. Ngeela meeji ne mbacìnsokòke mpindyewu mene. Ncyòci eci. Ndi ncimòna mu mundidìmbì kampànda. Mmuntu mulùme, ne ùdi ùsaama dinyungùluka dyà mutù. Udi ne mwànà wa balùme mwikàlè ne cisekì. Itàbùùjà ne mwoyi wèbè wònsò, mukalenge. Udi witabuuja anyi? Ki cyòci aci. Èyowà, tentèkèlè nsongàalùme awu cyanza ne yèyè neàsangalè. Amen. Mukalenge àtumbè.

¹⁹⁵ Udi witabuuja anyi? Démon awu ùvwa wèla meeji ne mmufwànyine kusokoma ku aci, kàdi's wàcìpangidì. Udi witabuuja anyi? Cintu aci cìcìdi ànu cinyungakana mwaba kampànda. Kaa, ekèlekèlè, bwà ngàsà ne dicyùka's! Kùdi

mwena ciseki mukwàbò kaaba aka mwaba kampànda. Èyowà, nyèyè ewu mwab'ewu mene. Udi witabuuja anyi? Ikàlà ne diitabuuja. Udi witabuuja ne Nzambi mmukumanyè anyi? Udi mwà kwalukila ku Ohio, muumvwè bîmpè, Mukalenge Nelson T. Grant. Ki dîna dyèbè ndyadi. Wèwè mwitabùuje, bintu abi nebikuumùkè ne kabyadyàkukutàcishakù kàbidì to. Ncitukù mwanjì kumòna muntu ewu kacya bàndela to, ncyèna mumanyè kantu nànsha kàmwè pa bìdì bìmutàngila to.

Mpindyewu kwèna mwà kucisokoka to, Nyumà Mwîmpè ùdi apa!

¹⁹⁶ Twînyikàayi ànu mitù yètù ne tupèèshàayi Nzambi butùmbi. Mukalenge Yesù, tudi tuKwela twasàkidila. Wèwè udi umwèumwè awu makèèlèlà, leelù, ne kashidi. Ngàsà Webè kàtukù ùpangila to, Mukalenge, ngwa mwomùmwè bikondo byònsò. Ndi ndòmba bwà luse Lwèbè lunènè ne bwîmpè bìshaalè pa cisàmbà eci. Wèwè udi mutàmbe kucyùka, Mukalenge, bwà kulwa kuDishindika. Wèwè udi Nzambi. Udi wa Cijila munènè Awu, Nyumà Mwîmpè munènè awu. Mpindyewu swàku bwà bantu aba bìtabùujè, Mukalenge, pàdìbo bènda bàpicila apa apu, ne yònsò wa kùdìbo òndopiibwè. Bu mùdì dilabiibwa Dyèbè kaaba aka, ndi ndyàdija mèmè mwinè pa mishwalà eyi. Ndi ndòmba, Mukalenge, bwà Wàdamunèku malòmba aa, Taatù. Enzàku nànkù, Mukalenge, ne apa ne mu batèèleji emu.

¹⁹⁷ Nènku swàku bwà muntu yònsò udi usanganyibwa mu Bwikadi bwà Nzambi àtambè kucyùka mpindyewu bwà kwitabuuja ne Wèwè wàkatàmba kucyùka bwà kajuuka mu ditùkù dyà ndekeelu munkaci mwà cisàmbà Cyèbè, ne kujaadika! Kwèna mwà kubòndopa to, Mukalenge, Kwèna mwà kwenza cyÙkàadi mumanè kwenza to. Wèwè ukàadi mumanè kubòndopa. Nènku eci ki cintu cimwèpelè cidì mwà kwenjiibwa, bwà kubàfikisha ku kwitabuuja. Ne Wèwè udi utàmba kucyùka, nànsha bupidyà mutùdì tutetukila bwikàle bwàbùngì bìshi, Wèwè ucitu ànu utàmba kucyùka bwà kuDileejja ne mwoyi ne mubiike ku bafwè, munkaci mwètù. Swàku bwà tuKwimikilè ntatù yètù, ne muntu yònsò udi mu Bwikadi bwà Nzambi òndopiibwè, ne mu musùkà ne mu mubidi. Mu Dîna dyà Yesù Kilstò. Amen.

¹⁹⁸ Èyo, vwilàayi lwà eku nùnkù, bantu bàlondelè lwà eku. Èyo, Billy neàbàbìkilè, ku kasùmbù ku kasùmbù. Kanwikadi, mpindyewu katwàkulu kàbidì to, di—dilaabiibwa didì pambidi pàanyi, nwamònu's. Ndi muswè kumutentekela byanza pàcidì Cyòci ecipù apa. Nwamònu anyi? Ncyèna mwà kwimanyikila pa dijingulula adi to. Mèmè mwenzè nànkù...Mbanganyì mwab'ewu bàkèngelà kubàsambidila, elàayi cyanza muulu. Batwè ku byà pa lukàmà makumi mwandamutekete. Nwamònu anyi? Tudi mpindyewu dîbà ùmwè kushàale tusunsa dikùmi. Mudimu wà dibàtiiza wùdì wùlonda paanyimà pàà ewu. Ncyèna mwà kucyènzà to, kàdi nudi mwà kwitabuuja. Yèyè utàmba

kucyùka bwà kuDileeja, s' bivwa biknègela bwà nwênù kutàmba kucyùka bwà kwitabuuja. Ncyà bushùwà anyi? Èyo, batèèleji bônso sambilaayaaku. Nènku Billy anyi Mwanèètù Neville, ewu anyi ewu, neàkwate mudimu ne eyi, neàkwatè mudimu ne cikòlokolo eci. Tùshaalàayi ànu ne mitù yètù miinyika ne túsambilàayi pàdibo bàpicila mu mulongo apu. Mpindyewu, ndi nsambidila yónsò wa kunùdi mpindyewu, nnütentekela byanza ne ndòmba bwà yónsò udi mukwàciibwe kùdi nyumà ya bukooya yinùdi naayi, yà bubì ayi, yinùmùmukè panùdi nupìcila mwínshì mwà kaaba kàdi dilabiibwa aka mpindyewu mene, byòbì bikèngela bwà mèmè kucyàmba mùshindù awu. Dilaabiibwa didi paanyimà pààpa ànu mudìdi apa emu. Kàdi ndi ncyènza ànu bwà diitabuuja dyènù, ngàmba cyòci aci. Bantu bônso sambilàayaaku mpindyewu.

¹⁹⁹ Mu Dîná dyà Yesù Kilstò, mwànà mukèsè wa balùme ewu òndopiibwè. Amen. Nzambì, mu Dîná dyà Yesù Kilstò, mwanèètù wa balùme ewu òndopiibwè. Mu Dîná dyà Yesù Kilstò. Ndi ntùmikila díyi Dyèbè ditùma, Mukalenge. Wèwè wákamba ne: “Bimanyinu ebi nebìfilè beena kwitabuuja.” Beena kwitabuuja, twètù bônso. “Bòbò batentèkèle babèèdi byanza, babèèdi nebàsangalè.” Mu Dîná dyà Yesù, ndi ngenza cyenzi eci. Mu Dîná dyà Yesù Kilstò ndi ntentekela mwanèètù wa balùme ewu byanza. Amen. Mu Dîná dyà Yesù Kilstò, ndi ntentekela mwanèètù wa balùme byanza, bwà dyondopiibwa dyèndè. Amen.

²⁰⁰ Yèyè ùdi ùkucyùka, mwanèètù wa bakàji. Ndi ncyùka bwà kukutentekela byanza. Udikù utàmba kucyùka bwà kwitabuuja anyi? Amen. Mu Dîná dyà Yesù Kilstò, bìikalè nàнку bwà mwanèètù wa bakàji òndopiibwè.

²⁰¹ Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù Kilstò, mwanèètù wa bakàji òndopiibwè. Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù Kilstò, mwanèètù wa bakàji òndopiibwè. Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù Kilstò, mwanèètù wa balùme òndopiibwè. Mu Dîná dyà Yesù, ondòpàku mwanèètù wa bakàji ewu, Mukalenge. Mu Dîná dyà Yesù, ondòpàku mwanèètù wa bakàji ewu. Mu Dîná dyà Yesù, ondòpàku mwanèètù wa balùme. Mu Dîná dyà Yesù Kilstò, ondòpàku mwanèètù wa bakàji ewu. Mu Dîná dyà Yesù Kilstò, ondòpàku mwanèètù wa bakàji ewu. Mu Dîná dyà Yesù Kilstò, ondòpàku mwanèètù wa bakàji ewu. Mu Dîná dyà Mukalenge Yesù Kilstò, ondòpàku mwanèètù wa bakàji.

Mwanèètù wa balùme, Yèyè ùdì ùcyùka. Wèwè udi ucyùka anyi? Mu Dìná dyà Yesù, ondòpàku!

²⁰² Bantu bònsò mu disambila mpindyewu, bantu bònsò sambilaayi. Eci ncisàmbà cyènú munkaci mwà kupita.

²⁰³ Mu Dìná dyà Yesù, ondòpàku mwanèètù wa bakàjì. Mu Dìná dyà Yesù, ondòpàku mwanèètù wa balùme ewu. Amen. Mu Dìná dyà Yesù Kìlistò, ondòpàku mwanèètù wa balùme ewu. Mu Dìná dyà Yesù Kìlistò, ondòpàku mwanèètù wa bakàjì ewu. Mu Dìná dyà Yesù Kìlistò, ondòpàku mwanèètù wa bakàjì. Mu Dìná dyà Yesù, ondòpàku mwanèètù mukèsè wa bakàjì ewu. Mu Dìná dyà Yesù Kìlistò, ondòpàku mwanèètù wa bakàjì ewu. Mu Dìná dyà Yesù Kìlistò, ondòpàku mwanèètù wa bakàjì ewu, Mukalenge. Mu Dìná dyà Yesù Kìlistò, ondòpàku mwanèètù wa bakàjì ewu. Mu Dìná dyà Yesù Kìlistò, ondòpàku mwanèètù wa bakàjì ewu, mwanèètù wa balùme. Ondòpàku mwanèètù wa bakàjì ewu. Ondòpàku mwanèètù wa bakàjì ewu, Mukalenge. Ondòpàku mwanèètù wa bakàjì ewu, ndi ndòmba mu Dìná dyà Yesù. Ondòpàku mwanèètù wa bakàjì, Taatù, mu Dìná dyà Yesù. Ondòpàku mwanèètù wa bakàjì, mu Dìná dyà Yesù.

²⁰⁴ Mwanèètù wa bakàjì, Yèyè ùtu ùcyùka. Wèwè utu ucyùka anyi? Mu Dìná dyà Yesù, akidilà dyondopiibwa dyèbè. Mu Dìná dyà Yesù, akidilà dyondopiibwa dyèbè, mwanèètù wa bakàjì. Mu Dìná dyà Yesù akidilà dyondopiibwa dyèbè. Mu Dìná dyà Yesù Kìlistò, akidilà dyondopiibwa dyèbè. Mu Dìná dyà Yesù Kìlistò, ondòpàku mwanèètù wa bakàjì ewu. Ondòpàku mwanèètù wa bakàjì ewu, Taatù, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù. Ondòpàku mwanèètù wa balùme, Mukalenge, mu Dìná dyà Yesù Kìlistò. Ondòpàku mwanèètù wa bakàjì, Taatù, mu Dìná dyà Yesù. Ondòpàku mwanèètù wa balùme ewu, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù. Ondòpàku mwànà mukèsè wa balumè ewu, mu Dìná dyà Yesù. Ondòpàku Mwanèètù Creech, Mukalenge, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù Kìlistò. Bòndòpèku, Taatù, bònsò bàbìdì, mu Dìná dyà Yesù Kìlistò. Amen.

²⁰⁵ Nzambì àkubènèshè, mwanèètù wa balùme. Awu mmwanèèbè anyi? Mukajèèbè? Èè, ncìvwa mucìmanyè to. Mukalenge àkubènèshè, mwanèètù wa balùme. Ondòpàku mwanèètù wa balùme ewu, mu Dìná dyà Yesù. Ondòpàku mwanèètù wa bakàjì ewu, Taatù, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù. Ondòpàku mwanèètù wa balùme ewu, mu Dìná dyà Yesù. Ondòpàku mwanèètù wa bakàjì ewu, mu Dìná dyà Yesù Kìlistò. Ondòpàku

mwanèètù wa balùme ewu, Mukalenge, mu Dîna dya Yesù Kilistò. Ondòpàku mwanèètù wa bakàji ewu, mu Dîna dya Yesù Kilistò. Ondòpàku mwanèètù wa balùme ewu, mu Dîna dya Yesù. Bòndòpèku, Taatù, mu Dîna dya Yesù.

²⁰⁶ Ndi ndàmbula disambila dyànyì dya meeji matòòke, bwà umwe ne umwe. Cyùkaayi mpindyewu. Yesù ùtu ùcyùka. Yesù mmutùme Mukenji. Yesù mmutùme Nyumà Wendè. Yesù mmutùme Dìyi Dyèndè. Yesù mmutùme musadidi Wendè. Tudi bònsò tucyùka. Mpindyewu wêwê udi ucyùka anyi? Wêwê ucyùka, cītàbùùjè, cītàbùùjè ne meeji matòòke, necyènjiibwè.

Mu Dîna dya Yesù, ondòpàku mwanèètù wa balùme ewu.

Mu Dîna dya Yesù, ondòpàku ewu nùнку, mwanèètù wa bakàji ewu.

Mu Dîna dya Yesù, ondòpàku mwanèètù wa bakàji ewu.

Mu Dîna dya Yesù, ondòpàku mwanèètù wa balùme ewu.

²⁰⁷ Nzambì, mu Dîna dya Yesù Kilistò, ondòpàku ewu nùнку, mwanèètù wa bakàji ewu. Enzàku nàнку, Taatù.

Mu Dîna dya Yesù Kilistò, ondòpàku mwanèètù wa bakàji ewu.

Mu Dîna dya Yesù, ondòpàku ewu nùнку, mwanèètù wa bakàji ewu.

Mu Dîna dya Yesù Kilistò, ondòpàku mwanèètù wanyì wa bakàji ewu.

Mukalenge, mu Dîna dya Yesù, ondòpàku ewu nùнку, mwanèètù wa balùme ewu.

²⁰⁸ Éyi Nzambì wa mu Dyulu, ikàlàku ne luse bwà kwondopa; enzàku nàнку's, Mukalenge. Swàku bwà mubidi ne dikànda bìlwe mu Dîna dya Yesù Kilistò.

Nzambì, mu Dîna dya Yesù Kilistò, ondòpàku ewu nùнку, mwanèètù wa balùme ewu.

Nzambì, mwanèètù wa bakàji udi mu nkwasà ewu, ndi ndòmba bwà Ùmwondòpèku ne ùmusàngàjè, Mukalenge, mu Dîna dya Yesù.

²⁰⁹ Nzambì, ondòpàku mwanèètù wa bakàji ewu, bwà cyenzedi cyèndè cìmpè cyà luse aci, ambùlwishàku mukàji ewu, mu Dîna dya Yesù.

Nzambì, mu Dîna dya Yesù Kilistò, ondòpàku ewu nùнку, mwanèètù wa bakàji ewu.

Nzambì, ondòpàku mwanèètù wa balùme ewu, ndi ndòmba, mu Dîna dya Yesù Kilistò.

Nzambì, mu Dîna dya Yesù Kilistò, ondòpàku mukàji mununu ewu.

Mu Dîna dya Yesù Kilistò ondòpàku mukàji ewu.

Mu Dîna dya Yesù ondòpàku . . . ? . . .

Mu Dîna dya Yesù Kilistò, ondòpàku ewu nùнку, mwanèètù wa bakàjì ewu.

Mu Dîna dya Yesù, ondòpàku . . . ? . . . Mukalenge.

Mu Dîna dya Yesù, ondòpàku mwanèètù wa balùme ewu.

Mu Dîna dya Yesù, ondòpàku ewu nùнку, Mukalenge.

Mu Dîna dya Yesù Kilistò, ondòpàku mwanèètù wa balùme ewu, Mukalenge.

Mu Dîna dya Yesù Kilistò, ondòpàku ewu nùнку, mwanèètù wa bakàjì ewu.

Mu Dîna dya Yesù Kilistò, ondòpàku . . . ? . . .

Ondòpàku mwanèètù wa balùme ewu mu Dîna dya Yesù Kilistò.

Ondòpàku mwanèètù wa balùme ewu mu . . . ? . . . [Katùpà kàà mukàbà wà mèyi munda mutupù—Muf.]

²¹⁰ Lwâ ne meeji matòòke ônsò, kwèdikù mpatà to, cìtábùjè wèwè ànu cyanààna. Bantu bônsò sambilaayi mpindyewu. Eci ncisàmbà cyètù cidì munkaci mwà kupita mwaba ewu eci, bânà bàà Nzambi. Itabùùjaayi.

Ondòpàku mwanèètù wa bakàjì mutekète ewu, Taatù, mu Dîna dya Yesù.

²¹¹ Ondòpàku mulundà wanyi wa musinga mukolè ewu, Mukalenge. Nzambi, mmwindile ntàntà mule be; swàku bwà edì diikalè dîbà mene adi. Amen.

Mu Dîna dya Yesù, ondòpàku ewu nùнку, mwanèètù wa bakàjì ewu.

Mu Dîna dya Yesù . . . ? . . .

Mu Dîna dya Yesù, mwòndòpèku, Taatù.

Mu Yesù . . . ? . . .

Mu Dîna dya Yesù Kilistò, mwòndòpèku, Taatù.

Mu Dîna dya Yesù, ondòpàku ewu nùнку, mwanèètù wa balùme ewu.

Mu Dîna dya Yesù Kilistò, ondòpàku mwanèètù wa bakàjì ewu.

Ondòpàku mwanèètù wa bakàjì ewu, Taatù, mu Dîna dya Yesù.

Mu Dîna dya Yesù, ondòpàku mwanèètù wa balùme ewu.

Mu Dîna dya Yesù, ondòpàku ewu nùнку, mwanèètù wa balùme ewu, Mukalenge.

Mu Dîna dya Yesù, ondòpàku mwanèètù wa bakàjì ewu, Taatù.

Mu Dîna dya Yesù . . . ? . . .

Nzambi, ondòpàku mwanèètù wa bakàjì ewu, mu Dîna dya Yesù.

Nzambi, mu Dîna dya Yesù Kilistò, ondòpàku mwanèètù wanyi wa bakàjì ewu.

²¹² Nzambi, mu Dîna dya Yesù umùshaku ciseki kùdi mwanèètù wa balùme ewu, Mukalenge, musàngàjèku, Taatù.

Nzambi, mu Dîna dya Yesù, ondòpàku ewu nùнку, mwanèètù wa balùme ewu.

Mu Dîna dya Yesù, ondòpàku ewu nùнку, bukwendè bwànyì wa balùme ewu, ndi ndòmbakù.

²¹³ Mu Dîna dya Yesù, ondòpàku ewu nùнку, mwanèètù wa bakàjì ewu, Mukalenge; Nzambi mwondòpèku, mu Dîna dya Yesù Kilistò.

Ondòpàku mwanèètù wa bakàjì ewu, Taatù, mu Dîna dya Yesù Kilistò...?...

²¹⁴ Éyi Nzambi, mpindyewu, ki amwè malòmbà ngòwò aa, enzàku bwà bìikalè nàнку, mu Dîna dya Yesù.

²¹⁵ Mpindyewu, ki mùshindù wà kubìpeta ngwòwò awu, mwanèètù. Mpindyewu, bwalu Mukalenge wàcyènjì.

²¹⁶ Mònaayi mwànà awu ní kèna...?...Mpindyewu, Yèyè ngudi ummanyisha cìdì cìkutàcisha. Ncyèna ànu ncitùndubula to...?...mu Dîna dya Yesù Kilistò... .

²¹⁷ Éyi Nzambi, nyèyè ewu mwimàne...?...mmwimàne kaaba aka bwà Edith. Tudi tutùma meeji ku kaacintu kakesè aku, Mukalenge. Ûvwa mwaba ewu bwà kusukumiibwayè, ànu mpindyewu ewu. Yàyèndè mmwimàne pa kaaba kèndè, Mukalenge. Enzàku, Éyi Nzambi, andàmùnàku malòmbà aa, mu Dîna dya Yesù, bwà bwalu bwèndè.

²¹⁸ Nzambi, ikàlà ne luse kùdi mwanèètù wa balùme ewu umwondòpèku, Taatù, mu Dîna dya Yesù.

²¹⁹ Nzambi, mu Dîna dya Yesù Kilistò, lengàku ewu nùнку, mwanèètù wa balùme wa mushinga mukolè ewu ne ùmusàngàjèku, Taatù.

Mu Dîna dya Yesù Kilistò, ondòpàku mwanèètù wa bakàjì ewu.

Mu Dîna dya Yesù Kilistò, Mukalenge, ondòpàku mwanèètù wa bakàjì ewu.

Ondòpàku mwanèètù wa balùme ewu, Taatù, mu Dîna dya Yesù.

Mu Dîna dya Yesù Kilistò, ondòpàku ewu nùнку, mwanèètù wa bakàjì ewu.

Éyi Nzambi, mu Dîna dya Yesù Kilistò, ondòpàku ewu...?...

Nzambì, ondòpàku mwânà mukesè wa balùme ewu, mu Dîna dyà Yesù Kilstò.

Mu Dîna dyà Yesù Kilstò, ondòpàku mwanèètù wa balùme ewu, Mukalenge.

Mu Dîna dyà Yesù, ondòpàku wetù . . . ? . . .

Éyi Nzambì, mu Dîna dyà Yesù Kilstò, ondòpàku mwanèètù wa bakàji ewu.

Mu Dîna dyà Yesù Kilstò, ondòpàku . . . ? . . .

Ondòpàku mwanèètù wa bakàji . . . ? . . . mu Dîna dyà Yesù.

Éyi Nzambì, ondòpàku ewu nùнку, mwanèètù wa bakàji ewu, ndi ndòmба, mu Dîna dyà Yesù.

Nzambì, ondòpàku mwanèètù wa bakàji ewu, bwalu ndi ndòmба mu Dîna dyà Yesù.

Nzambì, musàngàjèku; enzàku nàнку, Mukalenge, mu Dîna dyà Yesù.

²²⁰ Nzambì, lengàku mwanèètù wa balùme ewu; n'Diyi Dyèbè; Wèwè ngwàkacilaya, Mukalenge, ne tudi tulwa biikàle tucìitabuuja, mu Dîna dyà Yesù.

²²¹ Mu Dîna dyà Yesù Kilstò, ondòpàku mwanèètù wa bakàji ewu, Mukalenge; mmulwè ne meeji matòòke, mwikàle wìtabuuja mpindyewu; swàku bwà àye ne àsangalè.

Mu Dîna dyà Yesù àye ne òndopiibwè, Mukalenge.

²²² Nzambì, tentèkàku byanza Byèbè byà dyondopa abi pa . . . ? . . . swàku àlukilè kumbèlu kwèndè mupeta dilòmbà dyèndè. Éyi Nzambì, filakù dyondopiibwa, Mukalenge.

Ondòpàku mwanèètù wa bakàji ewu, Taatù, mu Dîna dyà Yesù.

Ondòpàku mwanèètù wa bakàji ewu, mu Dîna dyà Yesù.

Nzambì wa mu Dyulu, ondòpàku mwanèètù wa balùme ewu, mu Dîna dyà Yesù Kilstò.

Ne mwanèètù wa bakàji ewu, mu Dîna dyà Mukalenge Yesù.

Ondòpàku ewu nùнку . . . ? . . . mu Dîna dyà Yesù.

Ondòpàku ewu, mwanèètù wa bakàji Daulton ewu, mu Dîna dyà Yesù.

Ondòpàku mwanèètù wa bakàji ewu, Taatù, mu Dîna dyà Yesù.

Ondòpàku mwanèètù wa balùme, Mukalenge, mu Dîna dyà Yesù.

²²³ Mpindyewu, Yèyè ùtu ùcyùka; wèwè udi ucyùka pèèbè, mwanèètù wa balùme. Ndà ùMupè butùmbi ne ùMusàkìdìlè, mu Dîna dyà Yesù Kilstò . . . ? . . . Enzàku nàнку, Mukalenge, majitu èndè ngààbùngi; àpeepèjèku mpindyewu, Taatù, mu Dîna dyà Yesù Kilstò, ondòpàku mwanèètù wa balùme ewu.

224 Swàku ùtumè luse pambidi pèndè . . . ? . . .

225 Nzambi, filakù dyondopa dyà mwanèètù wa bakàji ewu, mwaba ewu. Mòna mùdiye mwimàne ku ciibi, mwindile, Nyumà Mwimpè mumunyungùlùkile. Nzambi, swàku bwà àye ne àKwitàbùjè. Enzàku nàнку, Taatù.

Mu Dìna dyà Yesù, swàku bwà àye mudishikàmìne, Taatù.

Nzambi, mu Dìna dyà Yesù Kilistò . . . ? . . .

Mu Dìna dyà Yesù, ndi ndòmba bwà Wòndopèku mwanèètù wa bakàji ewu.

Mu Dìna dyà Yesù, ondòpàku ewu nùнку, mwanèètù wa bakàji ewu.

Nzambi, mu Dìna dyà Yesù Kilistò, ondòpàku mwanèètù wa balùme ewu.

Nzambi, mu Dìna dyà Yesù Kilistò . . . ? . . .

Nzambi, sàngajàku mwanèètù wa balùme ewu, mu Dìna dyà Yesù Kilistò.

Nzambi . . . ? . . . seemena . . . ? . . . bukole nebùmusàngàjè.

226 Éyi Nzambi, ondòpà . . . ? . . . ne ùmuleejè . . . ? . . . mwaba ewu. Cipwekèshe, Mukalenge, ne swàku bwà yêyè ùmwè bukole bwà Nzambi, mu Dìna dyà Yesù . . . ? . . .

Nzambi, ondòpàku mwanèètù wa balùme ewu, Mukalenge, ne swàku bwà yêyè ùmwè bìmpè.

Mu Dìna dyà Yesù Kilistò, ondòpàku mwanèètù wa bakàji ewu, Nzambi.

227 Nzambi, ondòpàku . . . ? . . . mmuKumòne wenza bintu byàbùngì. Enzàku mpindyewu bwà bònsò bìikalè . . . ? . . .

Ondòpàku . . . ? . . . Mukalenge, ndi ndòmba luse, Mukalenge munanga Yesù.

228 Nzambi, ondòpàku ewu . . . ? . . . wàmusàngajakù . . . ? . . . Mukalenge, kàdi ntàtù yèndè nyààbùngì ne tudi tuyààbànyàngana. Mpindyewu, swàku bwà yêyè ìkalè . . . ? . . .

Mu Dìna dyà Yesù, ondòpàku ewu nùнку, mwanèètù wa bakàji ewu, Mukalenge.

Ondòpàku mwanèètù wa balùme ewu, mu Dìna . . . ? . . .

Nzambi, ondòpàku mwanèètù wa balùme ewu, ne ùmusàngàjè . . . ? . . .

Ondòpàku mwanèètù wa bakàji ewu, Mukalenge, mu Yesù Kilistò . . . ? . . .

Ondòpàku mwanèètù wa bakàji ewu, mu Dìna dyà Yesù.

Ondòpàku mwanèètù wa balùme mukesè ewu, mu Dìna dyà Yesù Kilistò.

Nzambi, ondòpàku ewu nùнку, mwanèètù wa balùme ewu, mu Dìna dyà Yesù Kilistò.

Nzambì, mu Dîna dyà Yesù Kilstò, ondòpàku ewu nùnkù, mwanèètù wa balùme ewu.

Nzambì, ondòpàku mwanèètù wa bakàjì ewu. Mu Dîna dyà Yesù, swàku yéyè òndòpiibwè.

²²⁹ Nzambì, ondòpàku ewu nùnkù, mwanèètù wa balùme ewu, swàku ikalè, mu Dîna dyà Yesù Kilstò ikalè. . . ? . . .

Nzambì, ondòpàku mwanèètù wa bakàjì ewu, mu Dîna dyà Yesù Kilstò.

²³⁰ Ondòpàku mwanèètù wa bakàjì ewu, Mukalenge, mu Dîna dyà Yesù Kilstò, swàku bwà àyè ne. . . ? . . .

²³¹ Nzambì, mupèèshèku dilòmbà dyèndè, mu Dîna dyà Yesù Kilstò, ndi ndòmba bwà ùmupèèshèku dilòmbà adi.

²³² Nzambì, Mwanèètù wa bakàjì Simmon, swàku bwà ngàsà ne luse lwà Nzambì, bìmukùmbànyìnè bu mùdiyè mwindilè pa dîbà edi, dîbà dìdiyè mwà kubìkùpa pànshì. . . ? . . . Nènku swàku àsangajiibwè. . . ? . . .

²³³ Nzambì, Mwanèètù wa Ungren. . . ? . . . Nzambì, yéyè ùdi ne dîyì dyà ngòlò, mwikàlè wèla mpungi wa Èvànjeeliyò. Mulamèku bìmpè, Nzambì; enzàku nànkù, mu Dîna dyà Yesù.

²³⁴ Nzambì, Mwanèètù wa bakàjì Kidd udi ùsòka Dîna dyà awu. . . ? . . . Ndi ndòmba bwà bukolè Bwèbè bumuvwijèku mudìshikàmìne mpindyewu. . . ? . . . ne meeji matòòke ònsò à maamù mutekète ewu. . . ? . . . mu matùkù mwandamutekète bìvwa bikèngela ikalè ne mamwèndè. Enzàku nànkù, Taatù, mu Dîna dyà Yesù Kilstò.

²³⁵ Nzambì, bwà bânà bèndè, Éyì Nzambì, bàdi bàlalakana, ne bààbúngì bàà kùdìbo biikàlè bàsaama, ne nsongàakàjì awu ùdi ùsaama, ne. . . ? . . . Éyì Nzambì, ndi ndòmba bwà Wènzakù nànkù, mu Dîna dyà Yesù Kilstò.

²³⁶ Ne kusàkidila kwàbúngì bwà Mwanèètù Tom, Mukalenge, ndòmba bwà Ùmwondòpè ne ùmukwàcishèku. Dîna adi dîbèneshiibwè. . . ? . . .

²³⁷ Kùdi muntu mulùme lwà kwinshì eku. . . ? . . . Udi pèèbè muswè bwà bàkusambidilè anyì, mwanèètù wa balùmè? Mukalenge Yesù. . .

[Katùpà kàà mukàbà wà mèyì munda mutupù—Muf.]

Ùdi ùkucyùka,
Ùdi ùkucyùka;
Pa muunyà anyì mu dilèjì,
Ùdi ùkucyùka.

Ùdi ùkucyùka,

MwiMikila wèwè ànu ntatù yèbè, dîbà adi.

Ûdi ùkucyùka;
Pa muunyà anyi mu dilèjì,
Ûdi ùkucyùka.

238 Wèwè udikù uMùcyùka anyi? Udikù ucyùka Dìyì Dyèndè anyi? Amen. Mukalenge ànùbènèshè. Twinyikàayi mitù yètù bwà katançi kakesè cyànàànà. Ngeela meeji ne ngändamùnù malòmba aa. Ngändamùnù ku malòmba, kî mmwômò anyi, yònsò wa kunùdì.

239 Kwènji katançi kùngènji kaantùpàkànyì kakesè mu disangisha emu, ndi mutwishiiibwe ne muntu kampànda ùvwa mucimòne. Ne Mukalenge mmufùme ku dimfunkwinaci mpindyewu mwaba kampànda. Ndi mwambè cintu kucyòmepakaja cyà muntu kampànda pàmvwà mucyàmbe bwà mukwàbò apu. Ncyèna mwà—ncyèna mwà kumòna muntu awu mwaba wùvwaye ùsanganyiibwa to, kàdi ùvwa mmuntu kampànda ùmvwà mwelè dibènesha pamutù pàà muntu mukwàbò. Nènku mèmè... Bàvwa bàpita lukàsa menemene, ne ncìvwa mumòne to. Kàdi ncìvwa... Èyowà, mmùvwàbì, ngàcimònu mpindyewu. Mmuntu mulùme ewu ne muntu mukàji bàdì basòmbe mwaba ewu mene aba. Mèmè ncìyi mutùpàkàne to, ndi mubàlabùle ku cyanza dilòòlò dishàale edì mu—mu—mu cibambalu cyà cilààla-beenyi, anyi cintu kampànda cikwàbò, mu bulà bwà cilààla-beenyi, mu Villa wa mu Jefferson emu. Mèmè kwambila muntu awu cintu kampànda, mmubiikila ne “mwanèètù wa bakàji” pamutù pàà “mwanèètù wa balùmè,” panwàpicidi mwaba awu apu. Uvwakù mumòne cyòci aci anyi? Mvwa muswè kucyàmbe bwà mukàjèèbè. Mpindyewu, mmupetè lutàtù bwà cikondo kampànda, lutàtù lwà dila ntàntà mule. Udi wa ku Illinois. Mandàmù Mongaland, ncyà bushùwà, ki dîna dyèbè ndyòdì adi. Mpindyewu, s’udi mumanyè ne mèmè ncìvwa mukumanyè to, kàdi udi ànu mu dipetangana mpindyewu. Udi witabuuja ne mwoyi wèbè mujimà, nènku nekwikalè dyupa mu kabujimà ànu mwàbì ne kale mùvwàbì misangu yònsò amu, bu wèwè mwà kwitabuuja. Bwà wèwè kumòna ne dîbà dyònsò, mpindyewu ndi . . .

240 Cintu cimwèpelè cîndì mumanyè, makèèlèlè dilòòlò awu ndi mvùluka mùmvwà ndyàmbedila bwà muntu awu, mvwa ngeela meeji ne ùvwa ne nsukì milenga be, mupandè nsukì yèndè munkaci, muntu wa mutù wa mvyà udi musòmbe apa ewu. Kwenzekabì ne ntangilè, nènku ki Bukènkè abu bwèla nsèsè bunyùngùlùkile ku mutù wèndè aku mùshindù awu. Nènku ki cìvwàku ncyòci aci. Ke pashiishe mèmè kumòna cikèènà-kumòna cibwayika. Ncyèna mumanyè ne bàvwa mbanganyì anyi cintu nànsha cimwè pa bwalu abu to. Inábànza awu ùvwa pambèlu pàapa makèèlèlè dilòòlò awu, mèmè kwamba ne: “Udi ulwa mu disangisha anyi?” Yèyè ne: “Èyowà.” Kàdi ngàsà wa Nzambì kucyalujayè cyàkàbìdì, nènku ki cìvwaci. Uvwakù mucimòne mu mulongo wà babèèdì anyi, mwanèètù wa balùmè,

ne cintu kampàndà cìvwà cyambiibwe cìvwà cicyàmàkàne aci anyi? Cìvwà bwà mwanèètù wa bakàjì pamutù pàà cyèbè wéwè. Aci, aci cìvwà cyà bushùwà, cìvwà ciyè kùdì—kùdì mwanèètù wa bakàjì wàwa.

²⁴¹ Mpindyewu bwà nwamòna mwà kumanyane, mu mulongo wa babèèdi awu, Mwanjèlo wa Mukalenge awu ùvwà mwab'awu. Cìvwà mwà kubiikila. Kàdi paùdì ubiikila apu, cidi cyènda cìteketa, cìteketa, cìteketa. Nwamònu anyi? Pa nàнку Yèyè ùdi ùkucyùka, ne mèmè—mèmè ndi nkucyùka. Mvwa ànu mwà kutùngùnukila ne banaayi anyi bataanu bakwàbò, ne pashiishe, katanci aka anyi, Billy's ùvwà mwà kulwa kunguumusha mu cyambilu. Ki mèmè kudyàmbidila ne, cyà bushùwà, bu ne ndi—ndi musòmbe neenù bònsò bidimu byònsò ebi, ne mu nyùngulukululu ne mu dikòsolola dyà ditùnga, nudi—nudi bamanyè ne ndi munùnangè. Kaa, ndi munùnangè byenzè bu ne nuvwà bânà bàanyi balela, ne nwènù biinè nudi bânà bàanyi mu Èvànjeeliyò. Ndi munùlelèle Kilistò, ku Èvànjeeliyò. Nènku mpindyewu ndi ngeela meeji ne ebi, dilòmba edi ne bikwàbò mwab'ewu, ngàbyàndàmùnù.

²⁴² Mpindyewu, ndi munùnangè. Ki mèmè kudyàmbidila ne, bu mèmè mwà kuya kanùtentekela byanza, ne nuvwà bamòne ne Nyumà Mwimpè nguvwa wenza cyòci aci, nènku dîbà adi dipampakana kampànda kujuukadi mu disangisha mu mulongo mùshindù awu. mèmè kucipangila, cipita lubilu lukolè, e kwamba dibènèsha kampànda kùdi mukwàbò, ki dîbà adi Nyumà Mwimpè kukùdimuka paanyimà pàà disangisha dimané kujika e kucileejulula. Nwamònu anyi? Kanwèna bamòne anyi, Yèyè's ùdi ucyùka! Mpindyewu wéwè udi ucyùka anyi? Udikù utàmba kucyùka bwà kwamba ne: “Kuumukila ànu ku dîba edi, kùdi cintu kampànda munda mwà mwoyi wànyì cidi cìngambilà ne ntàtù yànyì yàjikì. Ndi—ndi bîmpè, nèngùmfwè bîmpè” anyi? Nudi nuciitabuuja anyi? Elàayi byanza byènù muulu ne: “Mèmè ndi ngiitabuuja Aci!” Nzambi ànùbènèshè.

Pa muunya anyi mu dilèjì,
Ùdi ùkucyùka.

²⁴³ Edi's didi ànu difestò dinènè dyà dinanga. Tùwìmbàayi ne tulabulanganaayi ku cyanza muntu ne mukwèndè.

Ùdi ùkucyùka,
Ùdi ùkucyùka;
Pa muunya anyi mu dilèjì,
Ùdi ùkucyùka.

²⁴⁴ Ndi munùlamè ntàntà mule be mu dindà emu mu mùshindù wà ne ndi—ndi. . . Mpaasàtà wanyi kàtu ùyiisha ntàntà mule bu mùntù mèmè nyiisha to. Yèyè neàteetè bwà kunùtwàdila diyiisha dilòòlò edi, nènku netùnumanyishè bwà ne nekwikalè disangisha mu dyàlumingu dilwalwà mwinshì mwà. . . cyena-bwalu aci. Mèmè nciyi mwenzè nàнку to, nekwikalè ànu masangisha.

Pa nàнку nwênù bônso, Mukalenge ànùbènèshè, muntu ne muntu. Ngeela meeji ne kùdi mudimu wà dibàtiiza wikalà mwà kwenzeka mpindyewu mene.

²⁴⁵ Pa nàнку bu nwênù mwà kujuukilakù kuulu bwà katanci, bwà ditangalajangana. Twĩmbàayi kàbìdì cyôci aci. “Mwimikilè ntàtù yèbè, bwalu Yèyè ùdi ùkucyùka.” Nènku mpindyewu panwikalà nuMucyùka, twãmbàayi ne: “Mukalenge, ndi...” Panùdi nwenza eci, nudi—nudi nwamba díyì edi ne: “Mukalenge, ndi mumanyè ne Wêwè utu ucyùka. Nènku ndi ngeela byanza byànyì muulu ne, ndi nKucyùka.” Nènku twèlàayi byanza muulu mpindyewu mu edi difestò dyà dinanga ne luse, patùdi twimba apa.

Ûdi ùkucyùka,
Ûdi ùkucyùka;
Pa muunya anyi mu dilèji,
Ûdi ùkucyùka.

²⁴⁶ Mpindyewu patùdi twinyika mitù yètù apa, ambàayi... [Mwanèètù Branham ùdi wimbila mu matàma *Ûdi Ûkucyùka*—Muf.] Kaa, kalolo kàà Mukalenge wanyì! Kwènàku umvwa dinanga Dyèndè dikukòka dikubàndisha kuulu pabwìpì Nèndè anyi? Ambà ne: “Nènku, Mukalenge, ndi muKunangè. Ndi muKunangè. Wêwè utu ucyùka, Mukalenge. Wêwè wàkatàmba kucyùka mu mshindù wà ne pãmvwà ngènzàmpèkààtù Wêwè wàkamfwilà. Wêwè wàkatàpiibwa mpùtã bwà dishipa dyànyì dyà mikenji, ku mibùndàbùndà Yèbè ngàkondopiibwa.”

Ûdi ùkucyùka,
Ûdi ùkucyùka;
Pa muunya anyi mu dilèji,
Yèyè ùcidi ànu ùkucyùka.

²⁴⁷ Vùlukàayi ànu cyôci aci mpindyewu panùdi nwinyika mitù yènù apa. Nèndombèku Mwanèètù Edwards muntwemu bu yèyè mwà kutùtangalajakù ne mwakù wà disambila. Kàdi, dyàmbedi, twãnjàayi kwimbila cyàkàbìdì cyôci aci mu matàma. Vùlukàayi, muunya anyi dilèji, Yèyè ùcitu ànu ucyùka. Yèyè wàkacyùka. Wêwè udi ucyùka anyi? Ambà ne: “Èyowà, Mukalenge, ndi ndaya ne ndi ncyùka. Ndi ntùngunuka mpindyewu mene. Kuumukila ànu apa, ndi ncyùka. Ndi ncyùka bujaadiki bwànyì.”

Ûdi ùkucyùka.

Mwanèètù Edwards.



YÉYÈ ÛTU ÛCYÛKA. WÈWÈ UTU ÛCYÛKA ANYÌ? LUA63-0721

(He Cares. Do You Care?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dindà, mu dyà matùkù 21 à ngondo wa mwandamutekete, cidimu cyà 1963, mu Branham Tabernacle mu Jeffersonville, Indiana, U. S. A., Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org